

**Mijere lavitra
Saintsaino ny amin'ny Tarika Madinika
Manangana fiaraha-monina kristiana
David Cox**

FIZAHAN-TAKELAKA

TENY FAMPIDIRANA

Andeha atao hoe nandia tontolo andro lava sy mazamazana ianao ary dia valaka sy noana. Soa anefa fa efa akaiky ny trano. Tsy andrinao ny hihinana sakafo tsaratsara sy ny mba haka aina. Tampoka eo anefa dia mihovitrovitra ny fiaran-dalamby misy anao sady miato, na ihany koa mitohana izay tsy izy ireo fiarakodia manoloana. Lasa ihany ny antsasak'adiny kanefa dia zara raha mikisaka ianareo ary dia toa mbola lavitra erỳ ny lalana mody. Azo antoka tokoa fa tsy ilainao akory ny mahazo an-tsaina ny amin'izay vao avy notantaraiko teo satria efa nitranga taminao manokana koa izany- Ary mety efa im-betsaka aza. Sarotra ny manam-paharetana ao anatin'ny toe-javatra toy izany, sa ahoana hoy ianao? Na ahoana na ahoana anefa, ny lalam-by sy ny lalambe roazotra, dia natao hampihena ny fotoana lanintsika rehefa mandeha mody fa tsy hampitombo. Amin'izao fotoana izao àry dia fotoana sy vola be tokoa no lany amin'ny fikarohana izay azo atao ho fanatsarana ny lafiny fitaterana, satria eken'ny rehetra izany-tsy afaka ny hiharitra lava toy izao isika. Indrindra indrindra moa fa eto am-piomanana hiditra amin'ny taonjato faha-iraika amby roapolo.

Tahaka izany koa ve ny Fiangonana?

Manontany tena aho hoe: Nieritreritra zavatra toy izany koa ve ianao vao haingana mikasika ny fiangonana? Raha tsy diso aho, dia Advantista maro no kivikivy ihany manoloana fitarazohan'ny asan'ny Fiangonana. Tsara fiaingana ity fihetsehana ity. Efa mipetraka tsara ny fandaminana sy ny rafitra ary tetik'asa maro no volavolaina ho fampielezana haingana ny hafatry ny anjely telo maneran-tany. Tsy misy isalasalana ny momba izany-miharihary ny zavatra efa vitan'Andriamanitra tamin'ny alalan'ny Fiangonana tamin'ny taona lasa rehetra. Mahatalanjona tokoa ny fitomboan'ny fihetsehana sy ny fielezany maneran-tany. Na izany aza, araka ny vinavina natao dia tokony ho efa vita ny asan'Andriamanitra eto ambonin'ny tany ary tokony efa tonga Jesosy. Nefa mbola eto ihany isika hatramin'izao ary any amin'ny firenen-kafa aza dia zara isika raha mandroso. Ny tena marina dia betsaka noho ny efa nisy hatrizay ny fihaihana miandry antsika amin'izao fotoana izao, indrindra eo amin'ireo olona marobe izay mbola tsy nandre ny Filazantsara na tsy mahazo izany.

Nefa kosa, miaraka amin'izay, dia lehibe kokoa amin'izao fotoana izao ireo tombontsoa ahafahana mizara ny Vaovao Mahafaly raha oharina amin'ny taloha. Raha efa betsaka ny firenena nikatona tamin'ny fivavahana kristiana no efa misokatra ankehitriny, dia misy ihany koa ny fahalianana vaovao amin'ny zava-panahy any amin'ny firenen-tsamihafa toa an'i Angletera izay nandà ny Filazantsara nandritran'ny taona maro. Betsaka kokoa ny kristiana (sy ny Advantista) noho ny tany aloha; manana ny tambajotran'ny radio advantista maneran-tany isika amin'izao fotoana izao (AWR), ny fitoriana amin'ny alalan'ny zana-bolana, ny internet ary ny ireo fitaovam-pifandraisana azontsika ampiasaina izay tsy nananan'ireo taranaka teo aloha. Ary ao ambadik'ireo rehetra ireo dia manana ny teny fikasan'ny herin'ny Fanahy Masina isika, izay manetsika

antsika handroso. Nahoana ary isika no tsy mihetsika haingakaingana kokoa?

Fotoana fanovana fomba fiasa

Taona vitsivitsy lasa izay dia maro ireo famantarana mampahery manao hoe: Manomana ny fiangonany Andriamanitra ary manazava ny lalana ho amin'ny dia mandroso izay mbola tsy nisy hatrizay ary hitondra antsika ho any amin'ny tapany farany amin'ny dia lavitra sy hitondra antsika ho any an-trano ao amin'ilay tany nampanantenaina. Novain'i Elton Trueblood kely ny sary an'ohatra ny amin'ilay fizotry ny dia lavitra ary manoro hevitra fa misy zavatra azontsika atao:

“Ankehitriny, aty aorian'ny telon-jato taona noho mihoatra dia azontsika atao, raha hataontsika, ny manova indray ny fomba fiasa. Ny tombotsoantsika hanao dingana lehibe dia miankina amin'ny fisokafan'ny asa fanompoana ataon'ny kristiana tsotra, atao mihoatra noho ny namelan'ireo razantsika ny kristiana tsotra hamaky Baiboly. Amin'ny heviny iray dia midika ho fitokanana Fanavaozana vaovao ny fanaovana izany. Amin'ny heviny hafa kosa dia midika ho famitana hatramin'ny farany ny Fanavaozana nisy tany aloha, ka tao anatin'izany ny fahafantarana tsara ireo foto-pinoana ijoroantsika izay sady tsy azo amin'ny fahafenoiny no tsy narahina ara-dalana.”¹

Angamba tsotra tsy araka ny fiheverantsika azy ny vahaolana ny amin'ny fisehoan'ny “fitohanana ao am-piangonana”. Fotoana mety hanoloana ny fomba fiasa angamba izao. Fotoana fanatanterahana izay efa nokasaintsika atao izao, ilay antsoina hoe “fanokafana ny asa fanompoana ataon'ny kristiana tsotra”. Ny fanontaniana dia hoe: Amin'ny fomba ahoana? Nosoratana ity boky ity ary

¹ Elton Trueblood, *Your Other Vocation* (New York: Harper and Brothers, 1952) 32, voalaza ao amin'ny bokin'i William Beckham, *The Second Reformation* (Houston, TX: TOUCH Publications, 1995), 15.

inoana fa hita ao amin'ny asa ataon'ny tarika madinika ny ankamaroan'ny valim-panontaniana.

Ny tombontsoa ananan'ny tarika madinika.

Mino aho sy ny olona maro hafa koa fa tsy tambo isaina ny fahafaha-manao hampitomboana ny fiangonana satria ivony i Kristy, tarihin'ny Fanahy, tsara fandaminana ary misy ny fikasana hanetsika ny tarika madinika. Fantatro fa tsy vaovao amin'ny ankamaroantsika ny teny hoe: "tarika madinika". Anisan'ny ao anatin'ny fiangonana efa ho am-polo taona maro izay ireo vondrona trano sy fivoriana an-tranokely. Nefa dia tena vaovao sy nampitolagaga ny fomba niroboroboan'ny tarika madinika sy ny fomba nampiasain'Andriamanitra azy ireny hampitomboana ny isan'ny mpino. Azo sary an-tsaina ny zavatra hitranga amin'ny Fiangonana Advantista maneran-tany raha apetraka amin'ny toerana rehetra tokony hisy azy ny tarika madinika!

Tsy milaza aho akory hoe ireo dia misy hery majika hamitana ny asa fitoriana ny Filazantsara, hampielezana ny firaisana sy ny fitiavana ao amin'ny fiangonana ary hitarika ny isambatan'olona ho amin'ny fahamatorana ara-panahy ny tarika madinika. Manoro hevitra fotsiny aho fa fitaovana voahosotr'Andriamanitra mba hanampy antsika hanatratra ireo tanjona ireo izy ireny.

Mety hisy hihevitra fa hiroborobo ho azy amin'ny alalan'ny hafanana sy ny fifandraisana efa misy ao amin'ny Fiangonana ny tarika madinika ary mety toy izany mihitsy no niandohan'ny tarika sasany. Ao anatin'ny tontolo tena izy, na izany aza, dia ilaina hitaomana olona-kristiana sy tsy kristiana-ireo vondrona madinika satria mifandray ety dia ety izy ireo mba hitomboan'ny hafanana sy ny fifankatiavana ary hizarana ny Filazantsara.

Ny tanjon'ity boky tari-dàlana ity

Miezaka fotsiny ny hanome fampidirana fohy ny amin'ny tarika madinika amin'ny alalan'ity boky ity aho ary manome fijery

ankapobeny ny amin'ny hoe inona no ataon'izy ireo, ahoana ny fomba fiasany ary inona no fomba mahomby indrindra hampidirana azy ireny eo amin'ny fiainan'ny mpino Advantista eo an-toerana. Ao anatin'ny fizotran'ny resaka dia betsaka ny an-dalan-teny ampiasaiko izay avy amin'ireo boky tena tsara sy boky tari-dàlana nosoratan'ny mpanoratra hafa izay misy eny amin'ireo Ivo Toeran'ny Boky Advantista sy ny toeram-pivarotam-boky kristiana. Mamporisika anao hijery azy ireny aho.

Na dia boky tari-dalana aza ity dia azoko atao ve ny manosokevitra anao mba hamaky miaraka amin'ny vavaka? Mety antsoin'Andriamanitra ianao mba ho mpitarika vondrona madinika iray na koa hampiroborobo fahaiza-manao iray. Raha tsy voantso ho mpitarika ianao dia inoana fa tiany ianao handray fitahiana izay tsy hita raha tsy amin'ny fidirana ho anisan'ny tarika madinika. Tiany ho fitahiana hoan'ny hafa koa ianao ary maro amin'ny fanomezam-pahasoavan'ny Fanahy ho amin'io tanjona io no tena mahomby ao anatin'ny sehatry ny vondrona madinika.

Ny fihaikana ny amin'ireo zavatra goavana hoavy

Iray amin'ireo boky mampiaiky indrindra novakiako tao anatin'ny taona vitsy lasa ny an'i Russell Burrill "Revolution in the Church"(Fanavaozana ifotony ao amin'ny Fiangonana). Hevero ity andalan-teny manaitra ity:

"Alaivo sary an-tsaina ny fiangonana iray mirehitry ny herin'ny Fanahy Masina. Toy ny ahoana izany fiangonana izany? Moa ve mitovy amin'ny Fiangonana Advantista Mitandrana ny Andro Fahafito misy anao?"

"Azoko sary an-tsaina fa velona miaraka amin'ny filazantsaran'i Kristy ny mambra ao. Tsy endrikendrika ivelany ny fanompoam-pivavahany fa velomin'ny herin'ny Fanahy Masina satria mizara isan-kerinandro ny amin'ny nataon'I Jesosy teo amin'ny fiainany ny mambra. Mifaly ny fiangonana isan-tSabata fa nahazo olona vaovao izay vao nahalala an'i Kristy amin'ny alalan'ny asan'ny laika. Samy manana ny andraikiny

avy ny mambra ao anatin'io fiangonana azoko sary antsa-ina io. Tsy misy ny midonanam-poana ao amin'io fiangonana io satria ny maha-kristiana ao dia mira ho tafiditra ao anatin'ny asam-pitiavana hoan'ny Tompo. Samy hita ao amin'ny mambran'io fiangonana io avokoa ny fitiavana, fifaliana, fiadanana satria maneho ny toetran'i Kristy eo amin'ny fiaraha-moniny izy ireo. Ary dia mamaly ny antso ny fiaraha-monina..."²

Toa mitovy tamin'ny zava-nisy tamin'ny fiangonan'ny Testamenta Vaovao taorian'ny Pentekosta no fahenoana izany, sa tsy izany? Izany ilay fiangonan'ny zava-dehibe- vina lehibe, fanandramana lehibe ny amin'Andriamanitra ary vokatra goavana. Mety efa misy any ho any ny Pentekosta moderna mamokatra, izay farafaharatsiny mitovy amin'ny voalohany.

Satria akaiky ny fotoana iavian'i Kristy, dia manan-javatra hoan'ny fanahin'ny fiangonana Andriamanitra, zavatra izay mbola tsy nisy hatrizay. Hatramin'izao fotoana izao dia mbola miasa amin'ny fomba miavaka hatrany Izy mba hisarika antsika eo amin'ny toerana tiany hisy antsika hahafahantsika mandray anjara ao amin'ny drafiny. Mitsoka avokoa ny rivotra madion'ny Fanahy Masina izay mitondra fanavaozana sy fiovana, manomana antsika ho amin'ny zavatra goavana efa nomaniny ho antsika. Izany famantarana rehetra izany dia ny asa ataon'ny tarika madinika izay mitana toerana goavana hanatanteraka ampahombiazana ireo drafiny ireo.

Miangavy anao aho aho hamaky hatramin'ny farany ary mino aho fa hanaiky izany ianao. Ny hoe mieritreritra be dia midika hoe mihevitra ireo tarika madinika.

David Cox

Departemantan'ny Asa ataon'ny tena manokana

Misionan'ny Angletera Atsimo

² Russell Burrill, *Revolution in the Church* (Fallbrook, CA: Hart Research Center, 1993), 21.

Teny nataon'ny mpitarika fanavaozana iray

Tsy mbola nahita toerana tety ambany lanitra aho izay nananako namana eo akaikiko foana, mitovy fijery amiko ary miaramandinika zavatra iray; olona izay samy resy lahatra ka tokana ihany no asa ataon'izy ireo eto ambonin'ny tany; mahatazana avy lavitra ny tena momba ilay asa tokana, amin'ny maso tokana sy fo madio; izay, mba hanatanterahana izany araky ny heriny, dia nanolo-tena tanteraka hoan'Andriamanitra izy ireo, nanaraka ny Tompony, nandà ny tenany ary nitondra ny hazo fijalian'izy ireo isan'andro. Fitahiana izay tsy hitako n'aiza n'aiza eto amin'ny fanjakana ny fananana, na dia vitsy monja aza , namana toy izany izay afaka miaro hatrany ny fanahiko ary mananatra sy manoro hevitra amin'ny fahafenoiny sy ampahatsaram-panahy. (John Wesley)³

³ *Journal of John Wesley*, December 10, 1734, voalaza ao amin'ny bokin'i Jimmy Long (co-ordinator) *Small Group Leaders' Handbook* (Downers Grove, ILL: Intervarsity Press), 29,30

FIZARANA VOALOHANY

TARIKA MADINIKA- Anisan'ny planin'Andriamanitra

« ary aoka isika hifampidinika hampandroso ny fitiavana sy ny asa tsara ; aza mahafoy ny fiarahantsika miangona, tahaka ny fanaon'ny sasany, fa mifananara kosa, mainka satria hitanareo fa mihantomotra ny andro ».(Hebreo 10 :24,25)

Tsy zava-baovao amin'ny Fiangonana Advantista Mitandrana ny Andro Fahafito intsony ireo vondrona madinika. Ny Kilasin'ny Sekoly Sabata isan-kerinandro dia vondron'olona vitsy. Ny komitin'ny tarika madinika no manao ny fanapahan-kevitsika. Mitarika ny semineran'ny Apokalipsy isika ao anatin'ny tarika madinika. Manao zavatra hafa ihany koa ao. Nefa araka ny hitantsika fa efa « antomotra ny andron'i Tompo » dia tian'Andriamanitra ny manasa antsika mba hijery ifotony sy amin'ny fomba vaovao ireo tarika madinika.

Samy manamarina ny tantaran'ny Baiboly sy ny fanandraman'ny fiangonana fa hatramin'ny niandohan'ny tantaran'olombelona ka hatramin'izao, dia hita fa anisan'ny planin'Andriamanitra hoan'ny fianakaviana ny tarika madinika na toy ny inona na toy ny inona no endriny. Ankehitriny, arakaraky ny anakaikezantsika

ny ora farany sy iomanantsika ho amin'ny fiverenan'i Jesosy dia mandodona antsika ny Soratra Masina mba hifantoka amin'ny fanorenana fifandraisana izay tsy hita raha tsy amin'ny alalan'ny tarika madinika. Eritrereto ity manaraka ity :

- Voatokan'Andriamanitra ho voalohany sy sarobidy indrindra ny firaisan'ny fianakaviana. Mbola mitoetra ho hazondamosin'ny fiaraha-monina maneran-tany ihany ny fianakaviana na dia efa miala amin'ny sitrapon'Andriamanitra aza ny isam-batan'olona ao aminy ankehitriny.
- Taorian'ny Eksodosy dia neken'Andriamanitra ny soso-kevitry i Jetro ny amin'ny tokony hizaran'i Mosesy ny fokon'ny zanak'israely (mety ho mihoatran'ny roa tapitrisa ny lehilahy sy ny vehivavy⁴) ho antoko roa, tsy ny hanamorana ny asan'i Mosesy ihany fa mba hanamorana ny fifandraisan'Andriamanitra amin'ny olona (Eksodosy 18:23)
- Na dia nanana mpianatra maro aza Jesosy dia nandany ny androtokon'ny fotoanany sy ny heriny tamin'ny fampandrosoana ny vondrony madinika misy mambra roa ambin'ny folo. (Marka 3 :13-15, Lioka 6 :12,13). Nampianatra azy ireo Izy mba hiankina tanteraka Aminy sy amin'ny izy samy izy.

Ity fandaminana ity dia mazava fa tena fitaovam-panofanana tsara sy feno ary nampivoatra ny tenan'izy ireo; natao ho modely hoan'ny fiangonana hoavy ka izy ireo no mpitarika tao; nefa manome fifanohanana sy famporisihina koa hoan'ireo mpianatra sy i Jesosy tenany mihitsy izany. Teo i Jesosy rehefa nila Azy ny mpianany. Ary na dia nanao izay nampalahelo Azy aza izy ireo indraindray dia mazàna teo foana ny mpianatra rehefa nila azy ireo i Jesosy. Nankasitrahan'i Jesosy izany (Lio 22:28)

⁴ *Journal of John Wesley*, December 10, 1734, voalaza ao amin'ny bokin'i Jimmy Long (co-ordinator) *Small Group Leaders' Handbook* (Downers Grove, ILL: Intervarsity Press), 29,30

- Tarika madiniky ny fiangonana tamin'ny andron'ny Testamenta Vaovao. Ny antony iray dia satria ny fifamatorana nisy teo amin'ireo mpianatr'i Kristy voalohany dia azo tamin'ny fisian'ny tarika madinika ary ny antony hafa dia satria ny fankahalan'ny Jiosy dia nanasarotra ny fivoriant'izy ireo amin'ny toerana miharihary, hany ka mihaona any amin'ny isan-tokantranony tsirairay avy ny mpino. Na oviana na oviana ary na aiza na aiza no toerana mahavory lanina azy ireo dia avy tamin'ny fifamatorana nisy teo amin'ny tarika madinika nisy azy ireo tsirairay avy no harena fototra sy fahaizana nananan'ny fiangonana apostolika. Nitana toerana manandanja teo amin'ny fitomboan'ny isan'ny fiangonana taorian'ny andro Pentekosta ny tarika madinika (nanomboka tamin'ny 120 ka hatramin'ny 10 000 ny isan'ny mpino tao anatin'ny volana vitsy monja), ary nampiroborobo ny firahalalahiana izay nampiavaka azy izany (Asa 1:15; 4:4; 5:42 etc.).

Ny didy navoakan'i Nero tamin'ny taona 64 TrK izay manohitra ny fivavahana kristiana ihany koa dia midika fa tsy azon'ireo kristiana atao ny manorina toeram-pivavahana na izay antsointsika hoe fiangonana, n'inton'ina endriny, satria voararan'ny lalàna ny fivoriant'ny kristiana. Nefa tsy hoe zara raha velona ny fiangonana fa niroborobo nanerana ny ampira Romana na dia tsy nisy trano fiangonana aza nandritran'ny 250 taona hatramin'ny andron'i Constantin.

- Ny fitotonganan'ny fiangonana taorian'ny vanim-potoana apostolika izay niteraka fihemorana tanteraka dia vokatry ny fiovan'ny rafitra izay niaraka tamin'ny fanovana maro ny foto-pinoana. Tsy hoe tompon'andraikitra fotsiny tamin'ny lalàna sivily voalohany mikasika ny Alahady fotsiny ihany i Constantin fa izy ihany koa no nanangana ny ankamaroan'ny fiangonana tamin'ny andron'ny ampira

Romana. Na mampianatra aza ny Testamenta Vaovao fa ankehitriny Andriamanitra dia mitoetra ao amin'ny olony fa tsy ao anaty trano, dia nataony ho fitoerany masina ny fiangonany ary natokana ho amin'ny lafiny ara-pivavahana ihany ka ny mpitandrina no voatendry hanompo ao.

Izay no niantombohan'ny fomba fijery hoe ny trano lehibe, fa tsy ny tokantrano, no nihalasa tsikelikely ho ivon'ny fiainan'ny fiangonana. Nanampy koa izany teo amin'ny fanavahana tsy ara-Baiboly ny mpitondra fivavahana sy ny laika izay mbola mitoetra hatramin'izao. Nanomboka teo dia nihodikodina teo amin'ny resaka trano fivavahana ny fiainan'ny fiangonana fa tsy teo amin'ny olona ary hita fa napetraka ho andraikitry ny pastora ny asa fanompoana fa tsy hoan'ny kristiana tsirairay.

- Mitana toerana goavana eo amin'ny fifohazana sy ny fanavaozana ny tarika madinika. Milaza i Howard Snyder fa *"Saiky isaky ny misy fihetsehana lehibe ho amin'ny fanavaozana ara-panahy ao amin'ny fiangonana kristiana dia tsy maintsy miaraka amin'ny fiverenana amin'ny tarika madinika, ny fianarana Baiboly an-tokantrano ao amin'ireny tarika ireny, ny fivavahana ary ny ady hevitra ara-pinoana izany."*⁵

Iray amin'zany fihetsehana izany ny fifohazana miavaka izay niseho tany Angletera, notarihan'i John sy Charles Wesley. Toy izao ny nosoratan'i John Wesley *"Tsy misy fiangonana hitombo raha tsy misy ireo tarika eo anivon'ny mpiara-mivavaka."*⁶ Lasa toeram-pivavahan'ny fiangonana Metodista ny tarika madinika tao an-tranony. Nisy olona roa ambiny folo tao ary lasa nahatonga ny firoboroboan'ny fotoam-pivavahana an-trano tahaka ny tarika madinika ao amin'ny fiangonana Advantista izany.

⁵ Howard Snyder, *The Problem of Wineskins* (Downers Grove, ILL: Intervarsity Press, 1975), 164.

⁶ Quoted by John Mallison, *The Small Group Leader* (Bletchley, England: Scripture Union, 1996), 1.

- Natomboka tamin'ny fanamafisana hentitra ny tarika madinika⁷ ny Fiangonana Advantista mitandrana ny Andro Fahafito satria avy amin'ny fototra Metodista no anisan'ny nahatonga izany ary ny toro-hevitra ara-paminanian'i Ellen White⁸ koa no antony iray hafa nahatonga izany. Nandritran'ny fitsidihana nataon'I Ellen White tany Australie ohatra dia nisy fifohazana kristiana lehibe tao Melbourne, ary 2000 no isan'ny tarika madinika manao fivoriam-bavaka any an-tokantrano manerana ilay tanàna⁹. Nanoratra izy avy eo hoe: *"Ny fiforonan'ireo vondrona kely ireo ho fototry ny ezaka kristiana dia nasehon'ilay Anankiray ahy izay tsy mety diso."*¹⁰
- An'arivony amin'ireo vondrona kristiana maneran-tany no efa nandalo fitomboana ara-panahy sy arak'isa taona vitsy lasa izay. Saiky tsy misy anavahana fa tena mitana toerana sy mbola hitana ny toerana eo amin'ireo mpino hatrany ny fisian'ny tarika madinika.
- Any amin'ny firenena maro toa an'i Sina izay misy ny fanenjehana, izay rahonana hofioanana ny fiangonana dia tsy hoe mbola velona ihany ny fiangonana fa mitombo amin'ny alalan'ny asan'ny tarika madinika, na dia tsy misy pastora matihanina amin'ny fitarihana aza.
- Any Angletera dia eo amin'ny iray tapitrisa eo eo ny isan'ny olona¹¹ tafiditra ao anatin'ny tarika madinika, izay ampiasain'ny Fanahy Masina hisarika ny tsy mpino ao amin'ny finoana, hamelona indray ny fiainana ara-panahin'ny isam-batan'olona sy ny vondron'ny mpino ary hifototra eo amin'ny fianarana ny Baiboly.

⁷ Jereo ny bokin'i Russell Burrill, *The Revolutionized Church of the 21st Century* (Fallbrook, CA: Hart Research Center, 1997)

⁸ Jereo ny filazan'i Ellen White ny amin'ny tarika madinika, Tavana D.

⁹ Jereo ny tenin'i Ellen White, ao amin'ny bokin'i Kurt Johnson, *Small Group Outreach* (Hagerstown, MD: Review and Herald, 1991), 18,19.

¹⁰ Ellen G. White, *Testimonies, Vol 5* (Mountain View, CA: Pacific Press), 21,22

¹¹ Peter Cotterell, *Small Groups, Big Results* (Eastbourne, UK: Kingsway Publications Ltd., 1993), 5.

- Ao amin'ireo fiangonana izay misy tarika madinika miasa am-pahombiazana dia:

- Mitombo haingana kokoa ny fahamatorana ara-panahin'ny mambra

- Vitsy ny mihemotra mangingina

- Iainan'ny fiangonana sy ny mpiara-mivavaka kokoa ny fifampikarakarana sy ny fifampiheverana

- Misy ny fifankahazoana na dia eo aza ny fahasamihafana ara-kolontsaina raha toa ka fiaraha-monina maro kolontsaina no misy ao amin'ny fiangonana

- Mora kokoa ny mahafantatra sy mampandroso ireo fanomezam-pahasoavana maro ao

- Mora voasarika ao amin'ny finoana an'i Kristy kokoa ny olona tsy mpiditra am-piangonana

Mazava ary fa anisan'ny ao anatin'ny planin'Andriamanitra hoan'ny lehilahy sy ny vehivavy hatrany ireo tarika madinika na dia mbola tsy tena miasa araka izay niheverany azy aza. Alohan'ny tena hamaranantsika ity fizarana ity dia andeha tsy hisy ajanona na dia ny tsipiriany iray monja aza.

Satria efa naseho teo amin'ny tantaran'ny taranak'olombelona ny planin'ny famonjena dia trangan-javatra telo no misongadina.

Toy izao izy ireo:

- Ny Eksodosy
- Ny fiverenan'i Kristy voalohany
- Ny Fiverenany fanindroany

Amin'ireo fotoana telo ireo- ny fananganana ny firenena Israely, ny fananganana ny Fiangonana kristiana ary ny fanangonana sy fanomanana ny olon'Andriamanitra manoloana ny fiorenan'ny fanjakan'Andriamanitra - dia hitantsika fa efa nisy ny tarika madinika ary natokan'Andriamanitra mba handray anjara goavana.

Tombontsoa ho antsika sy andraikitsika ny miaina ao amin'ny fahatanterahan'ny fahatelo sy ny farany amin'ireo trangan-

javatra goavana ireo. Araka ny maha-antomotra ny andron'ny Tompo dia afaka miandrindra ny Fanahy Masina isika hitarika ny fiangonana ho amin'ny fitomboana ara-panahy sy arak'isa izay efa nofisintsika sy nivavahantsika hatrizay. Inoana fa ireo tarika madinika nampiasain'Andriamanitra ireo dia hanao mihoatra nohon'ny zavatra hafa rehetra mba hanomana antsika ho amin'izany fanandramana izany ary hiaro antsika rehetra mandram-pahatongan'ny andron'i Tompo.

Inona indray no antony tsara mihoatra noho izany mba hangatahantsika an'Andriamanitra hanampy antsika hahita tarika madinika araka ny hahitany azy, dia ny hitarika antsika hanao ny fandaminana azy ireny sy hanampy antsika hanandrana ny tombontsoa ananany.

Voaova

Nihaona tao amin'ny efitrano ambanin'ny tany tao amin'ny efitra malalaky ny Toby-Kendall izahay. Nopihana ny fahitalavitra ary dia nanao faribolana teo ambony seza lava mivelatra sy karipetra efa simba izahay. Isan-karazany izahay no tao amin'ilay vondron'ny mpianatra vaovao, tranainy, mpianatra momban'ny fanabeazana, mpianatra mozika, ny tsy dia be resaka, ireo manana toetra sariaka. Samy nanokatra ny Baiboliny teo am-pofoany ny tsirairay avy ary nijery ny tao amin'ny bokin'ny Romana. Rehefa namaky sy nandinika ny tenin'Andriamanitra izahay dia nanova ny isam-batan'olona sy ny vondrona ireo fahamarinana tao. Indraindray misy tsy azonay ary dia mipetraka amin-tahotra izahay. Nefa dia hitanay amin'ny fotoana rehetra Andriamanitra.¹²

¹² Patty Pell, *Small Group Leaders' Handbook* (Downers Grove, IL: InterVarsity Press, 1995)

FIZARANA FAHAROA

Ny maha-izy ny tarika madinika

“Ary tsy nitsahatra nampianatra sy nitory an’i Jesosy ho Kristy isan’andro teo an-kianjan’ny tempoly sy tao an-trano izy.(Asa 5:42)

Misy foana ireo tarika madinika. Mety manana hery miasa mangina tsara na ratsy eo amin’ny fiangonana izy ireo. Mitondra fiainana vaovao eo amin’ny mpino ilay vondrona madinika ary hanakana ny fitomboana hoan’ny sasany. Milaza ny fikarohana fa toy izao ny famaritana ny tarika madinika tsara indrindra :

- a) Ampahany manana ny maha-izy azy eo amin’ny fiainana sy ny rafitry ny fiangonana
- b) Manana ny toe-tsain’ny fitomboana
- d) Mampifandray

Andeha hojerentsika akaiky ireto toe-pahasalaman’ny tarika madinika kristiana ireto.

a) Ny tarika madinika dia manana ny toerany eo amin’ny fiainam-piangonana sy ny rafitra ao

Betsaka ny fiangonana Advantista no efa manandrana ny manao tarika madinika ary miovaova ny fisehon’ny fahombiazana. Mampalahelo fa na dia eo amin’ny tantaram-pahombiazana niavaka indrindra aza dia toa niserana ihany izany. Mijanona eo na maty mihitsy aza ireny tarika kely ireny taorian’ny fahombiazana efa nisy tany am-boalohany. Ny antony iray amin’ity tsy fahombiazana ity dia satria natao ho toy ny fanampin-javatra ny tarika madinika, hamenoana ny programam-piangonana izay efa feno, namboarina hanampiana tanjona iray toy ny asa fitoriana, fanabeazana, vavaka na fianarana Baiboly.

Mba hahatonga ny tarika madinika hahomby tsara, na izany aza, dia tokony ho lasa fototra iorenan’ny Fiangonana mihitsy izy. Tamin’ny andron’ny Testamenta Vaovao, dia ny tarika madinika no nandrafitra ny fiangonana, tahaka ny sela izay mitambatra ho vatana. Toy ny fiasan’ny vatana izay miankina

betsaka amin'ny sela. Mitombo ny vatana rehefa mitombo ny sela. Noho izany dia manatanteraka izay kasain'ilay vondrona kely atao ny fiangonana misy azy. Ary mitombo ny fiangonana satria mitombo ny tarika madinika.

Raha toa ka azo atsangana ny zana- tarika madinika mba hanatrarana tanjona isan-karazany dia tokony hiasa toy izany koa ny vondrona madinika mba ho fototry ny fiaraha-monina kristiana hatrany.

Zana-tariky	ny	loholona
zana-tarika mpanohana (oh: ny reny sy ny zaza)		
Zana-tariky	ny	komity
Ny tarika madinika fototra		
(ny tanora, fanompoam-pivavahana, Sekoly Sabata, sns.)		(Fiaraha-monina kristiana fototra)
zana-tarika mpandranto (oh: asa soratra)		
Zana-tariky	ny	diakona
zana-tarika mpampianatra (oh: kilasin'ny sekoly sabata)		

Izay mambra mampanandroso ny tambajotran'ny tarika madinika toy izao, izay zava-dehibe tokoa eo amin'ny fiainan'ny fiangonana sy ny rafitra ao aminy, dia azo faritana ho fiangonan'ny tarika madinika fa tsy hoe fiangonana misy tarika madinika fotsiny. Lasa tena fototry ny fiangonana ireo tarika ireo ary tokony manara-maso ny pastora na ireo mambra zokiny ao amin'ny ekipa pastoraly.

b) Manana ny toe-tsain'ny fitomboana ny tarika madinika

Tsy hoe fikambanan'olom-bitsy miara-mivory fotsiny ny tarika madinika. Olona vitsivitsy (matetika 5 hatramin'ny 12) izay miara-mivory ary mikendry ny hitombo isa. Misy fiangonana iray any Chicago izay nitombo avy tamin'ny olona vitsikely ary lasa

mambra miisa mihoatra efatra arivo sy iray alina tao anatin'ny roapolo taona latsaka. Ary amin'izao fotoana izao dia an-jatony isan-taona ireo tsy mpiangona niova fo atao batisa ary misy tarika madinika an'arivony manerana ilay tanàna. Toy izao no filazan'ny tarika madinik'izy ireo:

“ Mampifandray olona any anaty vondrona (misy olona efatra hatramin'ny folo) mba hitombo tahaka an'i Kristy, hifankatia ary handray anjara ho amin'ny asam-piangonana mba hiderana an'Andriamanitra ary hanao mpianatra ny firenena rehetra”¹³

Ity fanambarana ity dia maneho ny fomba fisainan'ireo mpino vokatry ny asa fitomboana nataon'ny tarika madinika. Marihan'ilay fanambarana koa fa ny tarika madinika dia farafahakeliny miasa amin'ireto sehatra telo ireto:

i. Mitombo amin'ny fifandraisana amin'Andriamanitra. Ny maha-mpianatra kristiana dia mahafaoka ny fifandraisan'ny fahatokiana, fitiavana ary fankatoavana manoloana Persona iray fa tsy fanekena foto-pinoana isan-karazany. Ny antony iray ilantsika ny tarika madinika dia mba hitomboan'ny fifandraisantsika manokana amin'Andriamanitra, tsy amin'ny alalan'ny vavaka mitokana ihany, na fianarana Baiboly sy fanoloran-tena, fa koa amin'ny alalan'ny fifandraisana ety amin'ny samy olona eo amin'ny fianarana Baiboly, vavaka sy fanompoana.

Ny asan'ny tarika madinika dia mifototra amin'ny fampianaran'ny Baiboly izay milaza fa ny fiangonana (Ny olon'Andriamanitra) no tenan'I Kristy (Efesiana 1:22,23) sy ny hoe raha olona vitsy miangona amin'ny anaran'i Kristy dia ho eo aminy Izy (Matio 18:20). Raha Kristy no votoatin'ny fiainan'ny tarika madinika dia tokony ny fitomboana miaraka ao Aminy no tanjony, toy izany koa ny isam-batan'olona.

¹³ Bill Donahue, *Leading Life-Changing Small Groups* (Grand Rapids, MI: Zondervan Publishing House, 1996), 21.

ii. Fitomboan'ny fifankatiavantsika. Mety hihevitra isika fa mitombo ho azy ny fifankatiavan'ny olona izay mihaona ao anaty vondrona. Tsy voatery ho ohatr'izay ny fomba fiasany. Nefa koa marina ny fomba fiteny hoe "izay miara-mivavaka no miara-mitoetra". Fantatsika fa voatery ho tsotra tahaka izany ny fifandraisan'olombelona.

Avy any anatintsika lalina any ny faharesen-dahatsika ara-pivavahana sy ara-panahy. Amin'ny maha-Advantista antsika dia mandala ireo soa toavina ireo isika, toy ny "fahamarinana ara-Baiboly" sy ny "fenitra ara-Baiboly" ny amin'ny fomba fiainana. Natao hitondra hafatra isika hatrany am-piandohana ary atahorantsika sao dia hihen-danja ny hafatra entintsika hany ka manitatra ny ady hevitra eo amin'ny foto-pinoana na olana eo amin'ny fomba fiainana.

Tsy mahagaga fa rehefa miaro ny fampianarantsika sy manohana ny fenitra arahantsika isika dia indraindray masiaka sy mitsara an'ireo izay tsy mitovy amintsika- eny fa na dia amin'ireo namantsika Advantista aza- ary misy ny tohina vokatr'izany. Betsaka no mandao ny fiangonana satria tapaka ny fifandraisana vokatry ny tsy fitovian-kevitra eo amin'ny foto-pinoana. Diso fanantenana ny sasany rehefa tafiditra tao amintsika.

Nefa tsy tokony ho izany. Natao hanorenana fifandraisana tsara, lalina ary maharitra eo anivon'ny isam-batan'olona ny tarika madinika ary amin'ny alalan'ny fomba mampiray toy ny fianarana Baiboly sy vavaka izany. Ity paikady ity, izay hiadian-kevitra misimisy kokoa amin'ity boky ity, dia sady mahatonga fifandraisana mijidina (amintsika sy Andriamanitra) ary fifandraisana mitsivalana (amintsika samy isika) mba hampandrosoana miaraka ary tsy misy marimaritra iraisana izay heverintsika ho manan-danja sy marina

I Jesosy mihitsy no nanome ny fanahin'ny fanomezana laharam-pahamehana ny lalàna eo amin'ny teny amin'ny didy, ary hazavainy tsara fa ny fahamarinana rehetra dia hisy heviny sy

lanjany rehefa azo tsara ny fifandraisantsika amin'Andriamanitra sy amin'ny samy isika (Matio 5:21-48;22:40). Noho izany ireo mambran'ny tarika izay tsy mifankahazo- mety ho kristiana roa na kristiana sy tsy kristiana- dia mbola afaka mamitrana ny fifandraisana rehefa tena maniry mafy ny hampitombo ny fifandraisany amin'Andriamanitra izy ireo.

iii. Ny fitomboan'ny tarika madinika amin'ny alalan'ny asa fitoriana. Tokony handeha ho azy amin'ny kristiana ny fiheverana ny amin'ny fitomboana arak'isa eo amin'ny fiangonana sy ny tarika madinika tsirairay. Tokony hiorina ao an-tsaintsika ny fizarana amin'ny hafa ny fanandramana nankafizintsika sy ny faniriantika ny ho ampiasain'ny Fanahy Masina mba hitarika azy ireo ho amin'ny finoana an'i Kristy. Voalaza ao amin'ny tarika madinika fa vavaka sy tanjon'izy ireo ny hitombo sy hihamaro. Ny foto-kevitra dia ny hoe hitombo isa toy ny fitombon'ny tariky ny mpino.

d) Mampifandray ny tarika madinika

Ny ankamaroan'ny fivavahana ao amin'ny fiangonana Advantista, raha tsy izy rehetra, dia mifototra amin'ny endrika roa : torinteny sy fampianarana. Miantefa amin'ny mpiangona ny hafatry ny mpitory teny ary mihaino ny mpiangona: voafetra eo amin'ny fanekena toy ny "Amena" ny teny atao. Eo amin'ny fampianarana kosa ny mpampianatra - izay manao ny ankamaroan'ny resaka- dia miresaka amin'ny mpianatra, izay amporisihina hanao fanamarihana na hametra-panontaniana amin'ny mpampianatra. Manaraka ity fomba fampianarana ity, amin'ny ankapobeny, ny tarika fianarana Baiboly, kilasin'ny Sekoly Sabata, seminera, fivoriam-bavaka an-tranokely, sns...

Mba hahombiazana eo amin'ireo lafiny telo voafaritry tetsy aloha ireo dia maniry ny tarika madinika ny hisian'ny fifandraisana mba hahatonga ny mambran'ilay vondrona

hifampikasoka satria mitovy. Mampiseho izany fahasamihafana amin'ny endriny telo izany ity diagrama ity:

Diagrama fanampiny ao amin'ny Stanborough Press
(Jereo pejy 24 ao amin'ny boky)

Raha ohatra ka azo ambara fa manainga fanahy no asan'ny torinteny ary mizara vaovao kosa ny asan'ny fampianarana (matetika akambatsika ireo endrika roa ireo), ny an'ny fifandraisana kosa dia ny manorina fifampikasohana mba hahatonga ny mambran'ny tarika hifampizara izay tsapany, sy ny fanandramany. Mpanamora no anjara asan'ny lehiben'ny mpitarika, mpamporisika ny rehetra ao handray anjara, mihazona ny fianarana sy ny fampianarana tsy hivaona ny lohahevitra sy hanatratra ny tanjona kendrena. Rehefa zatra sy mahazo aina tsara ao amin'izay fomba fiasa izay ny tarika dia tsy ny mpitarika intsony no hiresaka betsaka fa ny tarihina.

Ny tantaran'i Katherine

Mipetraka any Rosia Sovietika i Katherine, taona vitsivitsy talohan'ny nirodanan'ny kaominisma. Satria Kristiana izy dia nalefa tany amin'ny toby fiasana tany Siberia niaraka

tamin'ireo namany Mennonita maro. Faran'izay tsizarizary ny fiainana tao amin'ireo kitranotranokely. Kesika rakotra mololo ny fandriany.

Taty aoriana dia nahazo alalana hitsidika azy ny havany avy any Canada. Naloan'izy ireo ny tapakilany ary nahazo taratasy fahazoan-dalana telo volana hivahiny any izy, na dia ny hitsoaka hiala any Rosia sy tsy hiverina any intsony aza no tetiky rizareo. Toa ny fahatogavan'i Alice tany an-tany mahagaga no fahatongavany tany Canada. Rehefa nandeha tamin'ny fiara tsara tarehin-drizareo izy, nandalo ireo trano tsara tarehy dia tsy hainy eritreretina ny fiandrianana ao amin'ny fiainana feno harem-be. Tsy nino izy hoe afaka manan-javatra betsaka ny olona tsotra.

Herinandro maro taty aoriana dia gaga ny havan'ny Katherine naheno azy niteny hoe tsy andriny izay hodiaha any an-trano. Tsy naniry ny hijanona any Canada izy. "Mandainga ianao", hoy izy ireo. "Arak' ireo rehetra nolazainao taminay, nahoana ianao no te-hiverina any Siberia?"

Tsotra ny valin-tenin'i Katherine." Tsy haiko ny manazava ny antony manosika ahy hiverina any. Ny zavatra azoko ambara dia anananareo ny zavatra rehetra ary hita fa miodikodina eo amin'ireo ny fiainanareo. Tsy manana n'inon'inona izahay any, izahay samy izahay no anananay. Te-hiverina any amin'ireo anadahiko sy rahavaviko ao amin'i Kristy aho fa any izahay tena miara-miaina."¹⁴

¹⁴ Ity tantara ity dia hita ao amin'ny bokin'i in Albert J. Wollan, *God at Work in Small Groups* (London: Scripture Union, 1983), 43,44.

FIZARANA FAHATELO

Nahoana no hoe tarika madinika?

“Ary niakatra teo an-tendrombohitra Jesosy ka niantso izay tiany hankeo aminy aminy. Dia nankeo aminy ireo, ary nanendry roa ambin’ny folo lahy ireo...”(Marka 3:13,14)

Anisan’ny fiainana ny tarika madinika. Mbola hitan’ny ankamaroan’ny olona hatrany fa ny vondrona kelin’ny fianakaviana no fototry ny fiaraha-monina. Malaza ny toeram-pisotroan-toaka. Tsy dia hoe noho izy mivarotra toaka fa noho izy manome toerana hihaonan’ny mpinamana. Mandroso ny fikambanana isan-karazany satria misarika antokon’olona mitovy fironana amin’ny fanatanjahan-tena, mozika, fikoloana ny bika, sns.

Mitana toerana goavana koa ny tarika madinika eo amin’ny fiainam-baovaontsika ao amin’i Kristy. Ny tena marina dia afaka mahita antony telo manan-danja isika ny amin’ny ilantsika ireo tarika madinika ao amin’ny fiangonantsika.

a) Manorina fiaraha-monina kristiana izy ireny

b) Manome hery ny mambra ho amin’ny asa izy ireny

d) Mifameno amin’ny tarika vaventy izy ireny

a) Manorina fiaraha-monina kristiana ny tarika madinika

Raha misy zavatra iray katsahin’ny olona mafy mihoatra nohon’ny zavatra rehetra amin’izao tontolo maoderina misy antsika izao dia tsy isalasalana fa ny toetra te-ho anisany, fitiavana ny ho tafiditra ao anaty fiaraha-monina. Tahaka ny anazavan’I Gilbert Bilezikian tsara hoe,

*“Ny fiontanana mangina manjaka ao anivon’ny tenantsika dia ny faniriana lalina ny te-hahafantatra sy ny te-ho fantatra, te-hahazo sy te-mba ho azo, te-hanana sy mba hanan- tompo, te-ho an’ny hafa tsy misy fepetra ary mandrakizay ka tsy matahotra ny ho very, ho voafitaka na holavina. Izany no tsiaron’ny maha-iray antsika tany ampiandohana, ny fanenenana mangina ny amin’ny paradisa very, ny fotoana lava nikatsahana fifanotronana izay fantatsika fa izany no namoronana antsika. Izany no fikatsahana...fahafahana mba ho tonga amin’ny tena maha-izy antsika, tsy misy henatra na endrikendrika ivelany fotsiny, mba halalaka sy haka aina toy ny voaaro ao ankibon’ny fanekena tsy mety ritra sy ny fitiavana manenika”.*¹⁵

Nahoana isika no maniry mafy izany toetra te-hanan-tompo izany? Satria noforonina ho amin’izany isika ary tsy afaka ny tena ho velona raha tsy misy azy. Nefa dia nalain’ny fahotana an-keriny teny amintsika izany ary amin’ny toetrantsika be fahotana dia tsy vitantsika mihitsy ny manandrana izany. Na izany aza Jesosy, amin’ny maha-Mpamonjy antsika Azy, dia tonga mba hamerina amin’ny laoniny izay very noho ny amin’ny fahotana. Ny tena betsaka tamin’ny nambaran’i Jesosy sy ny nataony dia mikendry ny hanorina indray ny fiaraha-monina kristiana ary ny fanandramana nolalovan’ny fiangonana voalohany no firaketana mampiseho fa azo atao izany. Amin’ny alalan’i Kristy, dia afaka miravoravo indray ao anatin’izany firahalahiana nokendren’Andriamanitra ho antsika izany isika, amintsika sy Aminy ary amintsika samy isika.

- Ny filàna izany firahalahiana izany eo amin’ny tontolo maoderina dia inoana fa lehibe kokoa noho izay efa nisy, na dia eo anivon’ny kristiana aza. Eritrereto ireto trangan-javatra manaraka ireto:

¹⁵ Gilbert Bilezikian, *Community 101* (Grand Rapids, MI: Zondervan Publishing House), 15.

- Ny fiombonan'ny fianakaviana dia tsy marin-toerana toy ny taloha intsony (42% amin'ireo mariazy any Angletera no miafara amin'ny fisarahana ankehitriny ary tsy mifankaiza amin'izay salan'isa izay ny hita eo amin'ny fiaraha-monin'ny fiangonana)
- Araky ny salan'isa dia hita fa miova tokantrano in-telo ny olona mandritran'ny andro rehetra iasany.
- Ahitana fahasamihafana ara-poko sy kolontsaina ny tanàndehibe, izay matetika isehoan'ny hevitra mibahana mialoha sy tsy fitokisana.
- Mitombo mihoatra noho ny teo aloha ny tsy fifankahazoana eo amin'ny antitra sy ny tanora.
- Ny kristiana dia mahita matetika fa izy ireo ihany no mino an'i Kristy ao anatin'ny sehatry ny fianakaviana na eo anivon'ny mpinamana ao am-piasana.
- Ny fanarahan-dalànan'ny fiangonana izay miorina eo amin'ny finoana ny "hafatra" na ny foto-pinoana dia tsy hita ho manan-danja intsony tahaka ny taloha. Ny kristiana dia mila mifampihevitra amin'ny fomba manokana kokoa.

Nefa moa ve tsy fiaraha-monina kristiana sahady ny fiangonana Advantista? Ampitahao amin'ny fiangonana voalohany araka ny voafaritry ao amin'ny bokin'ny Asan'ny Apostoly (2:44-46, 4:32-35 sns) ny fanandramanao ny fiangonanao ary manapaha hevitra. Ny sasany amin'ireo mpiara-mivavaka dia maneho firahalahiana ekena sy mafana mihoatra ny hafa. Mety ekenao angamba fa ny ankamaroany dia mbola mitady lalana ialana. Ireto avy ny antony telo:

- i. Ny fanompom-pivavahana fahiny dia tsy namela ny firoboroboan'ny fironana ho ao anaty fiaraha-monina kristiana. Indrindra fa ao amin'ny fiangonana lehibe misy antsika, ao anatin'ny fotoam-pivavahana Sabata-izay eo no tena atrehin'ny ankabeazan'ny mambra-izay misy ny hira, vavaka ary torinteny, ka zara raha

afaka mifampizara ny fanandramany sy mifankahalala tsara ny mambra. Na ny kilasin'ny Sekoly Sabata sy ny fivoriam-bavaka aza dia mirona be any amin'ny fanontaniana sy valim-panontaniana momban'ny fianarana Baiboly sy vavaka.

- ii. Betsaka amin'ireo mpivavaka ny Sabata maraina no manatrika mba hahatsapa ho anisan'ny vahoaka kristiana mifaly sy mankalaza ny fahasoavan'Andriamanitra; nefa mety maro loatra izy ireo ka mananosarotra ny manandrana lalina ny lanjan'ny fiombonana izay toa zavatra hafa mihitsy. Raha tsy misy fotoana omanina hanampiana ny mambra sy ny namana mba hahalala sy hahatsapa fa tena anisan'ny ao anatin'ny fiaraha-monina kristiana izy ireo, dia sarotra ny mahatsapa firaiketana tanteraka ao amin'ny Sabata maraina ao amin'ny fiangonantsika maro.

Na eo aza izany rehetra izany, satria voafetra ny fotoana, dia voafetra koa ny isan'ny olona azontsika ifandraisana. Arakaraky ny mahabetsaka ny isan'ny mambra no tsy hisongadinan'ny tsirairay. Eritrereto fotsiny ny fisian'ny endri-pifandraisana maro mahagaga sy matanjaka misy eo amin'ny olom-bitsy. Raha afaka miresaka amin'ny olona hafa ny olona tsirairay dia toy izao no mety ho endriky ny kajy:

Olona folo: $10 \times 10 - 10 = 90$ zotram-pifandraisana

Olona zato: $100 \times 100 - 100 = 9900$ zotra

Olona dimampolo sy roan-jato: $250 \times 250 - 250 = 62\ 250$

zotra

Marina fa mihaona mba hiresaka mitsitokotoko eny ny mpinamana aorian'ny fotoam-pivavahana, nefa na ireny aza dia mety mahatonga fanilihana fa tsy fampidirana ny hafa izay tsy mba ao anatin'ilay andiany. Ny fiangonana tsirairay dia mila tarika madinika tsy manavaka mba hanampy amin'ny fananganana fiaraha-monina tena izy.

iii. Na isika mbola tsy nianatra mihitsy na adinontsika, ahoana no fomba hamoronana toetra tia mifandray eo amin'ny olona izay mbola tsy nifankahalala. Ny fisakaizana mateza dia mora mitombo ao anatin'ny fotoana izay hanompoan'ny Kristiana sy ny fifankatiavana isan-kerinandro mandritran'ny fotoana maro. Nefa ilaintsika ny manaiky fa niseho azy izany teo amin'ny fiangonana salantsalany, farafaharatsiny amin'izao tontolo maoderina izao, izay mbola tsy nisy tamin'ny fiaraha-monin'ny Testamenta Vaovao.

Ilaintsika ny fifankatiavana izay mitombo amin'ny alalan'ireo tarika madinika mandeha tsara mba hanamora ny firaisam-po misy eo amin'ireo izay mifankatia ao amin'ny fiangonana.

Ny toro-hevitra ny amin'ny hoe "mifankatia". Mampianatra ny mpianany "hifankatia" tahaka ny nitiaivany azy ireo Jesosy (Jaona 13:34). Nolazainy mihitsy aza hoe ny fifankatiavan'izy ireo no mandresy lahatra ny olon-kafa fa tena mpianatra tokoa izy ireo. Mino izany isika. Nefa manao izany ve isika? Ny tena zavadehibe kokoa dia hoe azontsika tanterahana ve izany ary hitan'ny tsy mpino ve isika rehefa manao izany. Manahoana ny fomba fanaovantsika fiangonana amin'izao fotoana izao? Efa manao izay azontsika atao isika nefa koa mbola afaka manao tsaratsara kokoa!

Fehezan-teny vitsivitsy ny amin'ny "fifankatiavana"

"Mifankatiava araka ny fifankatiavan'ny mpirahalaha" (Romana 12:10)

Mifanomeza voninahitra (Rom 12:10)

" Mifaneke hianareo" (Romana 15:7)

" Mifananara hianareo" (Romana 15:14)

"Mifanompoa" (Gal 5:13)

"Mifampitondrà izay mavesatra" (Galatiana 6:2)

"Mahareta, mifandefera amin'ny fitiavana" (Efesiana 4:2)

"Aoka samy halemy fanahy amin'ny namany avy hianareo" (Efesiana 4:32)

"Mifanaiky amin'ny fahatahorana an'i Kristy" (Efesiana 5:21)
"Mifampianara" (Kolosiana 3:16)
"Mifananara"(Kolosiana 3:16)
"Mifampionona" (1Tes 4:18)
"Mifampahatanjaha" (1Tes 5:11)
"Mifaneke heloka" (Jak 5:16)
"Mifampivavaha" (Jak 5:16)

Eo amin'ny sehatry ny fivoriam-bavaka isan-kerinandro, ny fihaonan'ny mambra rehetra dia toy ny miserana ihany ary betsaka amin'ny fifankatiavana no sarotra ampiharina. Misy ny mitady toerana hafa ahafaha-mifandray lalindalina kokoa. Ireo fampitandremana ny amin'ny fifankatiavana ireo dia miantefa hoan'ny tarika madinika kristiana izay nandrafitra ny fiangonan'ny Testamenta Vaovao. Araka ny natoron'i Jesosy ny mba hifankatiavan'ireo mpianany ankehitriny dia ilain'ny fiangonana amin'izao fotoana izao koa ny hanana ny tambajotran'ny tarika madinika mba hampandroso ny fiaraha-monina ao ka amin'ny alalan'izany no hanehoana ny fitiavana.

b) Manome hery ny mambra hiasa ny tarika madinika.

Inoantsika ny fampianaran'ny Baiboly ny amin'ny maha-mpisorona ny mpino rehetra. Ekentsika koa fa mpitandrin'i Kristy ny mpino tsirairay avy- mihoatra noho ny pastora- izay voaantson'Andriamanitra hanompo Azy araka ny fanomezam-pahasoavana sy ny fahaiza-manao nomeny azy ireo. Nahoana ary izany no mbola mihanaka ny fiheverana fa mbola tsy tokony avela hiasa malalaka amin'ny fahafenoany ny mambra laika eo amin'ny fahaiza-manao ananany?¹⁶ Antony iray (ary inoana fa mbola misy antony hafa ihany koa) dia inoana fa ny fahafantarantsika fahiny ny asan'ny laika dia vokatry ny hoe voafetra ny rafi-pandaminan'ny fiangonana eo an-toerana.

¹⁶ Fanontaniana mifanaraka amin'izany ity, izay fanadihadiana nataon'ny mpanoratra. "Fihetseham-pon'ny mambra izy ity, ary mety tsy fantany angamba ny fanomezam-pahasoavana ananany sy ny dikan'ny asam-panompoana Kristiana.

Indraindray isika taloha no nihevitra fa raha tsymiasa mavitrika ao amin'ny raharaham-piangonana ny mambra dia satria tsy manana fanoloran-tena rizareo, be atao, kamo, tsy mahavita azy na mila pastora hafa sy mahay kokoa mba hanentana azy ireo. Mba hampitombo sy hanatsara ny fidiran'izy ireo an-tsehatra eo amin'ny fiainam-piangonana dia nahompanay ho an'izy ireo ny herinay: manabe azy (atrik'asan'ny departemanta, kilasin'ny baiboly, sns...); mamporisika azy ireo (fanomezana fankasitrahana, sns); manao izay hahatsapan'izy ireo ho meloka (mitatitra ampahibemaso ny torinteny hoe: "Inona no mety ho nataon'i Jesosy?", sns) mampitandrina azy ireo (torinteny momban'ny fitsarana, sns) ary manatsara ny fifandanjana misy eo amin'ny pastora sy ny mambra.

Nefa ahoana raha tsy ireo olona ireo no tena olana? Ahoana raha ohatra ka ny androtokon'ny mambra no manolo-tena, mahay, tena manompo marina ny Tompony am-pahombiazana nefa voafetra ny azony atao hampandrosoana ny fiangonana noho ny antony tsy miankina amin'izy ireo? Manaiky izany trangan-javatra izany I Lyle Schaller ao amin'ny bokiny "The Change Agent"(Fitaovana enti-manova). Toy izao no nosoratany:

*"Raha tsy misy ny fanovana ny lalan-kombana, tombambidy sy fandraisana an-tànana ny fandaminana dia matetika hentitra ny famerana ny zavatra azo tanterahana eo amin'ny fanovana olona na ny fanampiana ny isan'ny mpiara-miasa vaovao"*¹⁷

Raha marina izany dia tsy vahaolana ny fikasana ny hisarika ny mambran'ny fiangonana hiasa bebe kokoa na hamokatra bebe kokoa ao amin'ny sehatr' asa ataon'ny laika na ny mampitombo ny isan'ny pastora matihanina ho ao anatin'ny lisitry ny Misiona. Ilaintsika kosa ny mijery ny rafi-pandaminana- momban'ny laika sy ny asam-panompoana matihanina sy ny hoe ahoana ny mety hanovana na hanatsarana ny fomba fiarahantsika manompo.

¹⁷ Lyle E. Schaller, Beckham, *The Change Agent: The Strategy of Innovative Leadership* (Nashville:Abingdon, 1972), 175, voalaza ao amin'ny bokin'i Beckham, *The Second Reformation*, 144.

Ireto misy fomba efatra mety ho nahavoafetra ny fidiran'ny mpino tamin'ny asam-panompoana teo amin'ny fiangonana:

- i. Ny fomba fisainan'ny mpitondra fivavahana sy ny mambra laika. Ny pastora no tena mpitandrina raha araka ny fijery azy. Voaofana sy mandray karama amin'ny asa izay ataony. Hita ho mpanohana azy amin'ny asany kosa ny mambran'ny fiangonana. Noho izany dia hita fa misy fihenana ny fandraisan'anjara amin'ny sehatra sasany amin'ny asa fanompoana. Heverina ho natokana hoan'ny pastora ihany izany, toy ny fitarihana ny fanompoam-pivavahana Sabata, fanomanana ny mpino vaovao ho amin'ny batisa ary ny famangiana ny mambran'ny fiangonana. Ny laharam-pahamehan'ny fiangonana sy ny programany dia mazàna miankina amin'ny an'ny pastora. Rehefa miova ny pastora dia miova toy izay koa ny programan'ny fiangonana.

Izany no mahatonga ny laika hihevitra fa tsy dia ilaina loatra izy ireo amin'ny asam-piangonana

- ii. Ny zava-mateti-pitranga ao amin'ny fiangonana Advantista. Ny fiangonana dia mikasa ny hampiasa departemanta vitsivitsy izay ahazoan'ny mambran'ny fiangonana mandray anjara amin'ny asa fanompoana toy ny asa fanampiana ny mpiara-belona, ny tanora, asa ataon'ny tena manokana sy ny fiainam-pianakaviana izay tsy miankina amin'ny habetsaky ny mambra. Lasa miha-mitovy amin'izay koa fotoam-pivavahan'ny fiangonana maneran-tany: Mampiasa fitaovam-pianarana Baiboly mitovy ny Sekoly Sabata, manaraka drafitra efa voapetraka mialoha ny fotoam-pivavahana ary na ny fivoriam-bavaka koa aza dia mitovy ny fanaovana azy. Tsara avokoa izany rehetra izany arakaraky ny fahaelan'ny fampiharana azy. Nefa amin'izany fitoviana izany dia sarotra hoan'ny fiangonana eo an-

toerana ny manao ny asany mifanaraka amin'ny fanomezam-pahasoavana sy ny fahaiza-manaon'ny mambra sy ny manatanteraka izay ilain'ny manodidina.

iii. Ny maha-zava-dehibe ny Sabata. Satria tena zava-dehibe amintsika ny Sabata dia mora ny milaza fa ny fotoam-pivavahana Sabata no tena mavesa-danja indrindra. Tsy mahagaga raha ny fanatrehana ny fanompoam-pivavahana ny Sabata no tena iandrasana indrindra ny fanoloran-tenan'ny mambra laika. Mety ho antony hafa koa no mahatonga ny mambra laika ho mpitazana raha ny asa fanompoana no resahana.

iv. Ny maha-zava-dehibe ny trano fiangonana. Mitovy ny olana miseho eo amin'ny fanomezantsika lanja ny trano fiangonana. Lasa ivon'ny asa fanompoana ny trano fiangonana hoan'ny mambra maro satria ao no anatanterahana ny ankamaroan'ny programa. Tadidintsika ve fa ny fiangonana dia tsy ny vatantrano na ny programa, fa ny olon'Andriamanitra n'aiza n'aiza misy azy? Nohon'ny maha-voafetra ny fotoana omena ny fiangonana dia mety ho tena sahirana misahana ny programa ao am-piangonana ny mpitarika laika mahay hany ka tsy manam-potoana intsony hampivelarana feno ny asa-panompoana ataony manokana.

Mazava fa ilaintsika ny manova ny fomba fanompoantsika ao amin'ny fiangonana eo an-toerana raha matotra tsara isika ny amin'ny fanomezana andraikitra goavana ny mambra laika. Inoana fa fomba tsara indrindra hanaovana izany ny fampidirana ny tarika madinika. Raha toa ka tsy misy afaka misolo toerana ny Fanahy Masina amin'ny famporisihina sy fanomezana hery ny fiangonana hanao izay ataony dia tsy misy azo asolo ny rafitra tena izy ihany koa.

Tsy hoe fanampin-javatra asosoka ao anaty programa efa feno ao amin'ny fiangonana akory ny asa fanompoan'ny tarika madinika.

Mampiseho modelim-panovana izay manome hery ny mambra hiasa izany satria ny tarika madinika dia:

- Tsy mankasitraka ny fanavahana tsy ara-Baiboly misy eo amin'ny mpitondra fivavahana sy ny laika, fa kosa mahatonga fifandraisana tsara ara-panompoana eo amin'ny pastora sy ny mambra
- Afaka mampiasa amin'ny fahafenoany ny fanomezam-pahasoavana nomen'Andriamanitra ny mambran'ny fiangonana
- Manamaivana ny pastora amin'ny asa tokony ataony amin'ny fanofanana ny mambra hiasa
- Manome fahafahana ny tarika tsirairay hiasa araka ny zavatra ilainy
- Mandanjalanja ny tombambin'ny Sabata mihoatra ny andro hafa amin'ny herinandro eo amin'ny fiainana sy ny fahasalaman'ny fiangonana
- Manova ilay iray (trano fiangonana) izay ivon'ny asa fanompoana ho lasa marobe (ny trano fiangonana sy ny tokantranon'ny mambra)

Jereo ao amin'ny fizarana fahaefatra ny momban'ny fampandrosoana ny fanomezam-pahasoavana amin'ny alalan'ny tarika madinika raha hijery bebe kokoa ny amin'ity lohahevitra ity ianao.

c)Mifameno amin'ny tarika vaventy ny tarika madinika

Isan-kerinandro dia an'arivony ny olona mandray anjara amin'ilay antsointsika hoe "lalao baolina andrana". Fizarana roa no mandrafitra ity fanandramana ity. Ny zavamisy rehetra tsapan'ny vahoaka mpijery mandritran'ny lalao sy ny an'ireo andiana mpanohana ny ekipa mialoha na aorian'ny lalao. Ny andaniny maneho hafaliana, fihetseham-po, fihobiana ary fahatsapana fa tafiditra ao anatin'ny zavatra goavana sy manan-danja. Ny ankilany kosa mifanome saina sy fihetseham-po mampionona sy mampahery eo am-

pandinihana sy fieritreretana tamin'ilay andro nanetriketrika. Samy hafa nefa mifameno ireo fanandramana roa ireo. Samy manan-danja izy roa.

Ilain'ny kristiana avokoa ny fiarahana amin'ny besinimaro sy ny fiarahana amin'ny vitsivitsy. Ilaintsika ny vory lanina amin'ny fankalazana (Fiankohofana amin'ny Sabata, asa fitoriana ampahibemaso, sns.) sy ny fiarahana vitsivitsy mampahery sy ijoroana vavolombelona mba hifampizaran'ny tena manokana ny fiainana nolalovana (tsy amin'ny kilasin'ny Sekoly Sabata fotsiny ihany na amin'ny fifankahitan'ny mpinamana izay mitovy firehana).

Tsy mitovy amin'ny zava-miseho ao amin'ireo tarika lehibe ny zava-misy ao amin'ireo tarika madinika. Misy tanjona tratrarinna ao anatin'ny fivoriam-bavaka tsara rafitra sy manara-penitra. Ny fiaraha-mivavaka tsy dia manara-drafitra kosa dia manampy tanjona hafa. Na dia tsara aza ny fotoam-bavaka sasany nefa tsy mba manana tambajotran'ny tarika madinika voalamina, manana tanjona sy mahataona olona dia tsy afaka ny handroso ara-panahy sy hitombo arak'isa ny mambra. Raha ny marina dia mitovy amin'ny sambo voizina amin'ny famoy iray fa tsy roa izany, hany ka mora mihodikodina fotsiny eo fa tsy mizotra amin'ny lalana mahitsy. Sarotra ny mandroso amin'ny sehatra sasany raha tsy misy karazana asa ataon'ny tarika madinika.

Ohatra iray ny amin'ny fomba tsotra hanampian'ny tarika madinika antsika ny fankalazana ny Sabata. Ampifandraisin'ny Soratra Masina amin'ny fialan-tsasatra ny Sabata. Nefa koa andro iray amin'ny herinandro izay mahabe asa indrindra ny Advantista ny Sabata. Amin'ny fiangonana sasany dia betsaka ny asa atao hatramin'ny fiandohana sy ny fiafaran'io andro io ary tsy hita soritra mihitsy ny fitsaharana. Saino ary ny fomba ampiasantsika ny oran'ny fanompoam-pivavahana: Indraindray dia tsy ampiasaintsika afa-tsy amin'ny fiankohofana ihany izany nefa tsy nahatsapa ny fanatrehan'Andriamanitra ny olona rehefa mody.

Ny antony dia ezahantsika atao ao amin'ireo fivoriambe ireo izay rehetra tokony ho natao tany amin'ny tarika madinika. Ary ao anatin'izany fizotrany izany dia mety tonga hatramin'ny tsy fanaovana n'inon'inona isika. Tadidio ary ny fanovana mety ateraky ny tarika madinika na dia amin'ny Sabata aza.

- Mora ny mampifantoka akaiky ny fijery amin'ny fankalazana ny Sabata. Afaka manamaivana ny vesatry famahanana, fampianarana, fijoroana vavolombelona, fananganana fifandraisana, sns., ny tarika madinika ary malalaka tsara amin'ny fankalazana sy fahazoana aimpanahy izany. Azo ampiharina ny tenin'i Burrill ao amin'i pejy fahaefatra. , izay misy ny mpino vaovao sy ireo naman'ny mambra. Ohatr'zany indraindray amin'ny fiangonana sasany. Mety toy izany koa matetika ny ao amin'ny fiangonantsika rehetra. - miaraka amin'ny tarika madinika voatahy sy ampiasain'Andriamanitra.
- Azo atao koa ny tarika lehibebe kokoa. Mety ho fomba tsara indrindra hatrany ny mampitombo ny vondrona madiniky ny mambra. Nefa manova zavatra ny fandehan'ny fotoana ary mipetraka amin'ny tanàn-dehibe ny ankamaroa'ny olona any amin'ny firenena toy ny Angletera amin'izao fotoana izao. Mety misy angamba ny fanomezan-toerana hoan'ny mambra maromaro kokoa eo amin'ny rafitra Advantista raha ampitahaina tamin'izay efa fantatsika taloha. Rehefa tafapetraka ny tambajotra matanjaky ny tarika madinika dia azo tanterahana sy antenaina ny vondron'ny mambra toy izany. Araka ny fijerin'ny matihanina eo amin'ny fitomboan'ny fiangonana dia tsy misy ny fetra farany ambony tratarina eo amin'ny haben'ny fiangonana voaforon'ny tarika madinika. Ankoatry ny zavatra hafa dia tsy dia tsy ilain'ireo zana-piangonana ny manakarama pastora maro.

Azo tanterahana avokoa ny zava-drehetra rehefa voalamina araka ny tokony ho izy sy ampiasaina hifameno ny asampanomboan'ny vondrona lehibe sy ny tarika madinika. Amin'ny lafiny arak'isa dia manoro hevitra ny fiangonana lehibe indrindra maneran-tany fa ny lanitra no fetra rehefa tonga eo amin'ny fitomboana ireo fiangonan'ny tarika madinika. Ao amin'ny Fiangonana Yoido Full Gospel (Filazantsara Feno) any Seoul, dia i Korea no manana mambra betsaka indrindra maneran-tany, miisa 800 000 ny mambra. Nilaza i Pastora Paul Yonggi Cho fa tsy hoe sady lehibe indrindra ny fiangonany fa kely indrindra ihany koa satria tamin'ny vinavinan'ny ankamaroan'ny mambra dia hita fa tahaka ny fifankatiavan'olona folo na roa-polo ihany ny an'izy ireo. Vory lanina ao anaty fiangonana, toy ny kianjabe, ny mambra mba hankalaza sy hivavaka. Mandritran'ny herinandro kosa dia 650 000 amin'izy ireo no manompo sy tompoin'ny fiangonana amin'ny alalan'ireo tarika madinika miisa 55 000. Tsy misy izany hoe mahatsiaro tena ho very sy tsy fantratr'olona izany rehefa mandeha mivavaka ny mambra satria fantatr'izy ireo tsara sy iainany tsara izany hoe tena voaray ao anatin'ny izany.¹⁸

Asehon'ny pastoran' ny fiangonan- fiangonana iray amin'ny fomba hafa izany. Hoy izy ho "afaka ny ho tonga fiangonan-dehibe isika satria haintsika ny fiangonana kely".¹⁹ Azontsika amboarina amin'ny alalan'ny asan'ny tarika madinika ny endrika izay tiansika hananan'ny fiainan'ny mpiara-mivavaka. Ho voasarika ny olona rehefa tsara ny kalitao.

Tarika madinika iray lasa telo

Nanomboka nankany am-piangonana niaraka tamin'ny mamany i Annette sy John²⁰ satria nisy havany any ivelany nanoro azy

¹⁸ Carl F. George, *Prepare Your Church for the Future* (Grand Rapids, MI: Fleming H. Revel, Division of Baker Book House.), 22.

¹⁹ Peter Cotterell, *Small Groups, Big Results* (Eastbourne, England: Kingsway Publications, 1985), 5.

²⁰ Novaina ny anarana sy ny tsipiriany momban'ny tantara mba tsy hilazana ny mombamomba ireo olona ireo

ireo ny finoana Advantista.Sarotra tamin'izy ireo ny fanandramana tamin'ny voalohany. Mbola kely izy ireo tamin'izay- teo amin'ny iraka ambiny folo sy telo ambiny folo taona teo; mbola tsy niditra am-piangonana mihitsy izy ireo taloha; tsy mahalala n'iza n'iza ary ny tena olana dia tsy manaiky ny rainy. Mino an'Andriamanitra izy nefa tsy mba kristiana.

Fotoana fohy taorian'izay dia voaasa hanatrika ny fivorian'ny tarika madinika, izay mailly roa na telo miala ny tranony, ny renin'izy ireo. Tapaka ary fa natao hoan'ny fianakaviana izany ka nanatrika tany koa i Annette sy John. Tsy dia nisy azony firy tamin'ny voalohany, nefa misy ny sokajin-taona rehetra ilay vondrona ary hita fa mifankahazo ny tsirairay, na dia tena tia milalao sy manao sary aza izy ireo dia tiany foana ny manatrika izany..

Raha afohezina ny tantara tao anatin'ny roa taona dia natao batisa i Annette sy John ary ny reniny ary lasa mambran'ny fiangonana. Tahaka ny tanora hafa dia niady mafy rizareo teo amin'ny fanarahana ny finoany sy ny fiangonana.Fa inty misy zavatra mahaliana.

Ankehitriny, dimy ambiny folo taona taty aoriana dia samy mipetraka any amin'ny firenen-tsamy hafa i Annette sy John (samy nanambady) sy ny mamany. Nefa dia samy mitarika vondrona madinika any an-tokantranony avy izy ireo. Mbola ao an-tsain'izy ireo foana ilay tarika madinika tany am-boalohany , ny lanjan'izany teo aminy ary ny fomba nanampiany azy ireo hahita toerana tao am-piangonana. Satria tena zava-dehibe amin'izy ireo ny fanandramana azony tamin'ny tarika madinika ary tiany ny hizara izany amin'ny hafa.

FIZARANA FAHAEFATRA

Ny asan'ny tarika madinika

“Koa mandehana hianareo dia ataovy mpianatra ny firenena rehetra, manao batisa azy ho amin'ny anaran'ny Ray sy ny Zanaka ary ny Fanahy Masina sady mampianatra azy hitandrina izay rehetra nandidiako anareo.” (Matio 28:19, 20)

Manao ny olona ho mpianatra ny tarika madinika. Farafaharatsiny, izay no tanjona satria izay no nanirahan'i Jesosy ny mpianany hatao (Matio 28:19, 20). Araky ny famaritana, ny antsoina hoe: mpianatra dia manolo-tena tanteraka hanaraka an'i Jesosy. Noho izany dia lasa mpianatra isika manomboka amin'ny andro anapahantsika hevitra ny hanaraka an'i Jesosy ary mitoetra ho mpianatra isika amin'ny fiainantsika rehetra. Tsy mbola afaka mihevitra mihitsy isika fa efa tratrantsika ny toerana tokony ho maha-izy antsika, nefa isaky ny dingana dia azontsika atao ny manolo-tena ny hanaraka Azy.

Mahafaoka ny lafim-piainana sy ny fitsipika kristiana rehetra ny maha-mpianatra. Hianarana ny maha-mpianatra, mianatra avy amin'ny mpampianatra azy amin'ny alalan'ny fijerena sy ny fampiharana. Nirahina hamporisika ny hafa hiaraka amintsika isika satria anisan'ny fianarana ho antsika sy fitomboan'ny fanandramantsika izany.

Ny mpianatra dia ilay iray izay

- **Miara-dia** amin'Andriamanitra, mifaly amin'ny fifandraisan'ny tenany manokana amin'i Jesosy ary mitady ny hiara-mandingana amin'ny Fanahy Masina,
- **Mianatra ny tenin'Andriamanitra**, mitombo hatrany amin'ny fahalalana sy fankatoavana rehefa maniry mafy ny hampihatra ny fampianarana eo amin'ny sehatra rehetra eo amin'ny fiainana ary
- **Manao ny asa nanirahan'I Kristy**, hary fitaovana avy

amin'ny fanomezam-pahasoavana nomeny mba hanao ny hafa ho mpianany, amin'ny alalan'ny fiainana modely sy fanompoana ny mpiara-belona.

Mila tsaroantsika, na izany aza, fa ny mahatonga antsika ho lasa mpianatr'i Jesosy sy hitombo ao amin'izany fifandraisana Aminy izany dia tsy mitovy amin' ny hoe lasa mambran'ny fiangonana na miaina arak'izay tokony ho fiainan'ny kristiana "tsara", na dia mahatonga antsika ho lasa mambran'ny fiangonana aza ny maha-mpianatra, na ho ela na ho haingana. Azo atao ny mino fa marina ny Baiboly, azo atao ny vita batisa, ny mandeha any am-piangonana foana sy manao "asa fitoriana", nefa tsy lasa mpianatr'i Jesosy. Aoka ho azontsika antoka ny mametraka amin'ny toerany ny laharam-pahamehana. Ilaintsika ny mifantoka amin'ny maha-mpianatra!

Ahoana no hitomboana amin'ny maha-mpianatr'i Kristy antsika? Ary ny fomba hamporisihantsika am-pahombiazana ny hafa ho tonga mpianany? Ireo tarika madinika dia afaka manampy amin'ny fomba izay tsy hain'ny hafa atao. Raha toa ka ny vavaky ny tena manokana, ny fianarana Baiboly ary ny fanompoam-pivavahana isaky ny faran'ny herinandro no manampy antsika hitombo dia tsy ampy fotsiny raha izay. Toy izany koa, raha ny asa fitoriana hoan'ny besinimaro sy ny fianarana Baiboly isam-batan'olona no matetika mitarika ny olona ho mpianatra dia tsy ampy raha izay fotsiny. Mitana toerana iankinan'ny aina koa ny tarika madinika hanampiana antsika hitombo sy hitarika ny hafa ho mpianatra satria tsotra fotsiny-nohon'ny endriky ny zavatra ataon'izy ireo. Raha manana ny mampiavaka azy sy ny asa nanirahana azy manokana ny tarika madinika tsirairay avy ary miasa araka ny tokony ho izy dia hahafaoka ireto manaraka ireo izy ireo:

- a) Fianarana Baiboly
- b) Vavaka

- d) Fanompoam-pivavahana
- e) Fampandrosoana ny fanomezam-pahasoavan'ny Fanahy
- f) Fikarakarana pastoraly
- g) Fanabeazana
- h) Fijoroana vavolombelona

Tokony efa atao sahady eo anivon'ny mpiara-mivavaka ireo kasingan'ny fiainam-piangonana ireo raha efa mipetrapetraka tsara ny fandanjalanjana ny asa fiankohofana, fanabeazana, firahalahiana sy ny asa fitoriana. Manampy amin'ny fampidirana sy fikolokoloana ny fitsipika hoan'ny tena manokana koa ny tarika madinika araka ny hojerentsika manaraka.

a) Mampifandray ny fianarana Baiboly ary tafiditra ao ny tsirairay avy

Tsara ny mampahatsiahy fa rehefa navoaka voalohany ny fitaovana fianarana Baiboly "Serendipity" (tamin'ny taona voalohandohan'ny fihetsehan'ny tarika madinika maoderina) dia iray tamin'ireo zavatra hitan'ny mpanoratra nokendreny atao dia ny "ilàna ny fampiharana ny fahalalana ara-Baiboly". Toy izao no nosoratany:

"Mitady fanampiana fatratra ao anatin'ny tontolo miha-feno zava-tsarotra ny kristiana mba hampihatra ny finoany an'i Kristy . Tsy ampy ny mahalala fotsiny izay voalazan'ny Baiboly- Tian'ny olona ho hay koa ny fampiharana izany fahalalana izany." ²¹

Tsy hoe miezaka ny hahatakatra ny hevitra ny hafatry ny Baiboly ihany ny fianarana Baiboly mampifandray fa mamporisika koa ny mambra tsirairay ao amin'ny tarika hilaza sy hampihatra izany hafatra izany ao amin'ny fiainany manokana. Tsy manontany fotsiny ny tarika hoe: "inona no lazain'ny Baiboly momban'ity lohahevitra ity?" fa hoe "Inona no lazain'Anriamanitra amintsika amin'ny alalan'ny Soratra Masina?" Amporisihina ny mambran'ny tarika mba hamantatra ny tenany mihoatra ireo olona sy tantara ao amin'ny Baiboly ary manaiky ny toerana misy azy

²¹ Lyman Coleman, *Serendipity Leaders' Guide* (London: Scripture Union, 1985), 5

sy ny toerana tiany hisy azy raha ny tanjona eo amin'ny fiainana no resahana.

Mikendry ny hampifandray ny tarika madinika araka ny efa nazavaina (Pejy 9, paragrafy'd'). Midika izany fa ara-dalàna sy manan-danja ny fandraisan'anjaran'ny mambra tsirairay avy ao amin'ny tarika. Tsy satria hoe "marina" ny fandraisan'anjara fa mampiseho ny toerana misy ny tarika eo amin'ny resaka fanandramana sy ny fahalalana. Midika izany fa ny tarika madinika iray dia sady misy kristiana sy tsy kristiana ary mbola mitombo hatrany amin'ny fifandraisany amin'Andriamanitra sy amin'ny izy samy izy, na dia eo aza ny tsy fitovian-kevitra. Raha atao fototra amin'ny ankamaroan'ny (raha tsy izy rehetra) fivorian'ny tarika ny fianarana Baiboly dia miovaova be ny lohahevitra. Ny tarika no matetika mifidy ny lohahevitra ianarana fa tsy ny mpitarika. Noho izany dia mifandraika tsara amin'ny tombontsoa sy ny filan'ny mambra ao izany.

Tsy voafetran'ny foto-pinoana ny fianarana Baiboly fa ao koa ireo lohahevitra maro mikasika ny fiainana andavanandro (oh: momban'ny ray aman-dreny, fanomezan-danja ny tena, sns), ny fitomboana kristiana (oh: momban'ny fahakiviana, fiantohana ao amin'i Kristy) ary lohahevitra mahaliana (oh: fanalàna zaza, trangan-javatra eto amin'izao tontolo izao, sns). Azo alaina any amin'ireo fivarotam-boky kristiana ireo fitaovana fianarana Baiboly efa vonona ary fitaovana vaovao maro no avoaka isan-taona.²²

Raha toy izany ny fomba fianarantsika Baiboly ary ampifanarahana amin'ny Soratra Masina sy amintsika samy isika ny fiainantsika dia zavatra roa no inoana fa hitranga:

- Mitombo ny toetra tia mandray andraikitra eo amin'ny samy kristiana izay manainga antsika hitombo amin'ny maha-mpianatra ary

²² A sample list of materials available can be obtained from the Department of Personal Ministries, 25, St. John's Road, Watford, Herts, WD1 1PY.

- Lasa tena izy ny maha-kristiana, an'ny tena manokana sy tsy mivaona, mamporisika ny hafa mba ho tonga mpianatra.

b) Tsotra, mandeha ho azy sy manokana ny vavaka

Satria anisan'ny drafitr'Andriamanitra hoan'ny fiangonana ny tarika madinika dia mazava ho azy fa angatahana ao anatin'ny vavaka ny tari-dàlana avy amin'Andriamanitra rehefa halamina tsara izany, rehefa hambara ny tanjona ary rehefa hasaina hanatrika ny namana. Fa mbola mihoatra lavitra noho izany ny asan'ny vavaka eo amin'ny asan'ny tarika madinika.

Ny vavaka tsy manara-penitra dia afaka manampy betsaka amin'ny toetra tia miaraka amin'ny besinimaro, izany rahateo no tanjona kendren'ny tarika madinika. Hoan'ny fiaraha-monina kristiana madinika, mikarakara, ny toro-hevitry'i Jaona hoan'ny mpino hoe "koa mifaneke heloka hianareo ary mifampivavaha mba ho sitrana hianareo"(Jakoba 5:16). Azo atao fomba iray ijoroana vavolombelona koa ny vavaka. Rehefa tao am-ponja i Dietrich Bonhoeffer dia toy izao no nosoratany ny amin'ny fankafizany ny firahalalahiana kristiana na ao an-tranomaizina aza:

*" Ny vavaka fanelanelanana no fanomezan-toky tsara indrindra hihaonana amin'ny mpifanolo-bodirindrina sy ny fiombonam-bavaka, atao amin'ny anaran'i Kristy, ilay endrika madio indrindran'ny firahalalahiana"*²³

Mety tsy tao anatin'ny fivorian'ny tarika tany am-boalohany ny vavaka amin'ny fotoana samihafa. Ohatra hoe ny tarika mikendry olona tsy mivavaka dia mila manaiky fa mety niteraka fisalasalana hoan'ny vahiny ny vavaka natao tany am-piandohana. Amin'izay fotoana izay dia azo atao ny manao vavaka fohy sy tsotra, ho famaliana ny antso mandritran'ny fianarana Baiboly na koa ho famaliana izay ilain'ny mambran'ny tarika. Mazava ho azy fa manokana fotoana betsaka ivavahana hoan'ireo izay mbola ivelan'ny fivorian'ny tarika ireo mambran'ny tarika foibe.

Vetivety dia mifankahalala ireo mambran'ny tarika madinika ary hahazo aina izy ireo amin'ny vondrom-bavaka izay atao isaky ny

²³ Dietrich Bonhoeffer, *The Cost of Discipleship*, (SCM Press), quoted in Mallison, *The Small Group Leader*, 136.

misy fivoriam-bavaka. Zava-dehibe tokoa ny hoe mifanaraka tsara amin'ny fivoriana ataon'ireo vondrona madinika ny vavaka. Tokony hipololotra ny fizarana fanandramana izay atao mialohan'ny fianarana Baiboly. Aompana amin'ny fisaorana sy fanelanelanana ny vavaka ary ampifanarahana amin'ny fanandramana sy ny filàn'ny mambran'ny tarika sy ireo olom-pantany manodidina azy.

Tsy misy ora, toerana, endrika voatondro anaovana ny vavaka ataon'ny tarika madinika. Azo atao tsara ny mivavaka hanombohana ny fianarana Baiboly ary matetika dia vondrom-bavaka no atao aorian'ny fianarana Baiboly. Nefa inona moa no tsy anaovana vavaka mandritra ny fianarana raha mila tari-dalana manokana na maneho fisaorana.

Ny fanendrena mpitarika ara-bavaka dia fomba tsara iray ahazoana antoka fa omena ny toerany araka ny tokony ho izy ny fampandrosoana ny fiainam-bavaka ao amin'ny tarika. Andraikitr'ilay lehiben'ny vavaka ny mahafantatra ny filan'ny tarika, mandray an-tsoratra ny valim-bavaka ary mandamina ny fotoana natokana hoan'ny vavaka. Afaka miasa ao amin'ity asa ity ny lefitry ny lehiben'ny vavaky ny tarika, ny mpampiditra olona. Tsy maninona izay olona hanao izany sy ny fomba anaovana azy. Ny vavaka tsotra, avy ao am-po sy manokana ataon'ny tarika madinika, toy ny fampiraisana azo avy amin'ny fianarana Baiboly, no manampy ny kristiana hitombo sy manainga ny hafa hiaraka amin'izy ireo.

d)Misy dikany hoan'ny isam-batan'olona sy amin'ny tarika ny fiankohofana

Amin'ny heviny ankapobeny ny fiankohofana fanomezam-boninahitra an'Andriamanitra dia mahafaoka ny zavatra rehetra ataontsika, manomboka amin'ny fizarana ny finoantsika ka hatramin'ny fanehoana hatsaram-panahy tahaka ny fiainan'i Jesosy. Izany no didy voalohany sady lehibe (Matio 22:37,38) ary ny tarika madinika , izay maneho ny maha-kristiana eo amin'ny fiainana

andavanandro, dia afaka mampitombo izany. Asa fiankohofana mihitsy ny fivoriam-bavaky ny tarika madinika.

Amin'ny heviny hafa, na izany aza, ny fiankohofana dia fihetsika fanehoana ny fanompoantsika an'Andriamanitra amin'ny fontsika, fanahintsika, saintsika ary ny tanjantsika izay mifantoka amin'ny hatsarany sy ny halehibeazany ary fanesorana ny zavatra hafa rehetra. Miopana amin'ny vavaka, hira ny fotoanan'ny tarika madinika raha ilaina izany. Ny hira fiankohofana tsara fidiana indrindra dia izay hiraina hoan'Andriamanitra sy miorina eo Aminy, fa tsy hoe mahakasika Azy fotsiny na ny momban'ny fanandramana momba Azy.

Eo amin'ny fiankohofana ataon'ny mambra dia miankina amin'ny komitin'ny fanompoam-pivavahana, pastora na mpitoriteny, ny halehibe sy ny nahazatra ny fiangonana ary fomba fijery maro hafa no endrika itondrana azy. Manara-drafitra izany ary tsy miova firy ny fisehony isan-kerinandro. Kely na tsy misy ny fanehoana ny fihetseham-po hoan'Andriamanitra rehefa tsapan'ny isam-batan'olona na ny mpivavaka rehetra ny fanatrehany. Amin'izany fiankohofana izany dia omem-boninahitra Andriamanitra amin'ny alalan'ny programa maty paika tsara sy midadasika izay mahatonga ny maro hifantoka amin'ny hatsarany sy halehibeazany ary hiara-hamaly ny antsony. Ilaintsika ny fiankohofana ataon'ny mambra. Tsy misy zavatra mahasolo izany. Mahazo voninahitra Andriamanitra ary voatahy ny olona rehefa omena Azy ao amin'ny tarika madinika ny fiankohofana. Mahakasika ny tena manokana sy lalina kokoa ny fiankohofana atao ao amin'ny tarika madinika raha mihoatra amin'ny atao ao amin'ny tarika vaventy. Azo alamina izany nefa mety hiova ny planina rehefa ny isam-batan'olona sy ny tarika manontolo no manaraka ny fomba fampahafantaran'Andriamanitra ny tenany amin'ny alalan'ny fianarana Baiboly, vavaka, fifampizaran'ny tarika fanandramana sy eritreritra. Raha toa ka fanekena ny fahalehibeazan'Andriamanitra sy ny fiandrianany (Andriamanitra Avo indrindra)ny fiankohofana ataon'ny mambra, ny fiankohofana

ataon'ny tarika madinika kosa dia toy ny fanekena ny maha-ao anatintsika an'Andriamanitra sy ny maha-iray antsika Aminy (Andriamanitra akaiky indrindra). Toy ny ilantsika ny hatahotra Azy nohon'ny voninahiny dia ilaintsika koa ny mahatsapa ny fikasihan'ny tàmàny feno hatsaram-panahy eo amin'ny fiainantsika.

Hoan'ny olona reraka, ory tsy mahita ny lalan-kombana nohon' ny rarin-tsaina avy amin'ny andro fiasana dia tsy misy afaka manome fampitoniana sy mamerina amin'ny laoniny ny fiainana tsara kokoa mihoatra nohon'ny fiankohofana amin'Andriamanitra ao amin'ny toerana kely sy feno fikarakarana misy ny tarika madinika.

e) Mora mipoitra sy ampitomboina ary ampiasaina ireo fanomezam-pahasoavanan'ny Fanahy.

Efa nomenay ny lisitra misy ny antony maro mahatonga ny mambran'ny tarika madinika, fototry ny rafitra misy eo amin'ny fiangonana, havitrika sy hahomby kokoa eo amin'ny asam-panompoana raha oharina amin'ny rafi-pandaminana tranainy.²⁴ Inty misy antony fanampiny- ny fomba hahafahana mamantatra sy mampivelatra ny fanomezam-pahasoavana.

Na eo aza ny fijerena akaiky ny lohahevitra momban'ny fanomezam-pahasoavana, vao taona vitsivitsy lasa izay, tamin'ny alalan'ireo boky, atrik'asa, fianarana ny leson'ny Sekoly Sabata dia mbola betsaka ny mambran'ny fiangonana no mbola tsy mahalala ny fanomezam-pahasoavana ananany na tsy tsapan'izy ireo fa hahomby ny talentany rehefa kolokoloina sy ampiasaina.²⁵ Ao amin'ny fiangonan'ny tarika madinika, dia tsy olana loatra izany satria:

- Amin'ny alalan'ny fihetsehana mampifandray ateraky ny tarika madinika dia mifankafantatra izay zavatra ilainy ny mambra ary mamaly izany filàna izany. Miseho ho azy ny

²⁴ Jereo ny fizarana faharoa, zana-pizarana b)

²⁵ Jereo ny soratra eo ambany ao amin'ny zana-pizarana **b)** ao amin'ny fizarana faharoa

fanomezam-pahasoavan'ny famporisihana, finoana, vavaka, fitarihana, sns... Lasa tafiditra ao anatin'ny fifampikarakarana mandritra sy ivelan'ny fivorian'ny tarika ny mambra. Sarotra hoan'ny olona ny miafina sy mijanona ho olon-tsy fantatra ao anatin'ny tarika madinika.

- Na dia tsy mahatsapa ny fanomezam-pahasoavana ananany aza ny tsirairay dia mifankahalala ny talenta ananany izy ireo ary manamarina ny fisian'izany. Rehefa mandray anjara amin'ny fianarana Baiboly sy mifanohana ary mifanao fihaikana ny mambra dia afaka sy tokony hilaza ny fankasitrahany ny amin'ny fomba nikasihan'Andriamanitra ny fiainany tamin'ny alalan'ny fifankatiavan'izy ireo. Manampy ny hafa hampivoatra ny fanomezam-pahasoavany isika rehefa miteny hoe: "Ampiasain'Andriamanitra hianao rehefa.../ Tena mandray fitahiana aho rehefa...hianao/ Mino aho fa manana fanomezam-pahasoavana manokana ao amin'io sehatra io ianao."
- Ny mpitarika vondrona tsara dia afaka mandinika ny fomba fandraisan'ajaran'ny tsirairay eo amin'ny fiainan'ny tarika ary mamantatra ny talentan'izy ireo sy ny fahaizamaony ary mampiasa ireny sy manankina andraikitra amin'izy ireo arak'izany.
- Tsy voafetra eo amin'ny fisian'ny sampana azo iasana ao amin'ny fiangonana ny fampivelarana ny fanomezam-pahasoavana. Ny fiovaovan'ny zavatra ataon'ny tarika madinika dia mahatonga azy ireo hanamboatra fomba fiasa vaovao izay mifanaraka amin'ny filàna sy fanomezam-pahasoavan'ny mambra.

Mikasika ny fiainan'ny mambra amin'ny alalan'ny olona Andriamanitra sy amin'ny fampiasana ny talenta nomeny azy ireo. Rehefa fantatra sy trandrahina ao anatin'ny asan'ny tarika madinika ireo fanomezam-pahasoavana ireo dia mahazo manantena

isika fa hitombo kokoa tahaka Azy ny mpianatr'i Jesosy sady hitombo isa.

Ny fitarihana dia ohatra iray amin'ireo fahaiza-manao/fanomezam-pahasoavana izay azo trandrahina sy ampiasaina ao anatin'ireo tarika madinika. Rehefa nitady mpitarika hoan'ireo fitambarana tarika madinika marobe voalaza ao amin'i Eksodosy 18 i Mosesy dia nahita azy ireo tao anatin'ny maro, izay andevo taloha nanaraka azy. Mety betsaka tamin'izy ireo angamba no mpibaiko ny mpanompo nandritran'ny fanandevozana tany Egypta. Ny antony dia satria farafahakeliny misy iray ao anatin'ny folo amin'ireo Israelita navotsotra ireo no mpitarika mahay.


Ny ohatra omen'ny Testamenta Taloha ny amin'ny tarika madinika dia manoro hevitra fa tsy miova tanjaka ny fitarihana ao amin'ny fiangonana eto amin'ity haavon'ny fitarihana ity. Roa ambiny folo no isan'ny tao anatin'ny tarika madinik'i Jesosy ary ny fiangonana an-tokantrano voalazan'ny bokin'ny Asan'ny Apostoly dia inoana fa tsy mifanalavitra amin'izay isa izay- ny salan'isan'ny tranon'ny Jiosy tany Jerosalema tamin'ny taona 50 Trk dia tsy afaka nampiantrano olona mihoatra ny roa ambiny folo.

Raha ohatra ka iray amin'ny Advantista folo no mpitarika mahay dia mety hanontany isika hoe: "Inona avy ireo tombontsoa azon'ny rafitra misy antsika ankehitriny omena ireo olona laika manan-talenta amin'ny fitarihana?" Ny andraikitra omena ny loholona eo an-toerana, diakona ary ny mpitarika departemanta, araka ny hamaritantsika azy izao, dia zara raha azo ampitahaina amin'ireo mpitarika fiangonana voalaza ao amin'ny Testamenta Taloha. Voaofana sy arahin'ny pastora maso ny mambra laika tamin'ny andron'ny apostoly- izay mandray andraikitra feno ao amin'ny fiangonana ao an-tokantranony. Ilaintsika ny tarika madinika mba hampivelarana sy ampiasana tanteraka ny fanomezam-pahasoavan'ny fahaiza-mitarika.

e)Voazara ny fikarakarana ataon'ny pastora. Fantatra ankehitriny fa ireo fiangonan'ny tarika madinika dia tsy dia

mila firy ny fikarakarana ataon'ny pastora raha oharina tamin'ny taloha. Satria miteraka fifankatiavana mafana ny tarika madinika, fahatsiarovan-tena ho ao anatin'ny tanteraka, manohana ny mambra ao ny fianarana Baiboly sy ny vondrom-bavaka ao.

Taona maro lasa izay dia nisy ny fanadihadiana²⁶ natao tamin'ny fiangonana Advantista mitandrina ny andro Fahafito ary nangatahana ny mambra hanao diagrama misy faribolana telo (mampiseho ny fiangonana) izay ahitana azy ireo. Nambaran'ny



fanadihadiana fa ny vondrona kely sy lehibe misy ny mambran'ny fiangonana dia tsy mahatsiaro ho anisan'ilay "faribolana anatin'ny indrindra". Any anatin'ny faribolana ivelany indrindra eo amin'ny fiainam-piangonana no misy azy, tahaka ny hoe tsy manova zavatra firy eo amin'ny fiangonana manontolo ny famonjeny na tsia ny fotoam-pivavahana. Araka ny salan'isa dia folo hatramin'ny dimy ambiny folo isan-jato no manisy marika ao amin'ilay faribolana anatin'ny indrindra, izay milaza fa mahatsiaro ny tenany ho tena ao anatin'ny fiangonana ary tena anisan'ny manan-danja eo amin'ny fiainam-piangonana izy ireo. Zara raha misy izany fahatsiarovana ho 'tsy ao anatin'na mitoka-monina izany amin'ireo kristiana izay ao anatin'ny tarika madinika. Olana azo sorohana mialohan'ny fanasitranana izany.

Tsy hoe misoroka izay tsy mety hitranga ihany ny tarika madinika fa mamaly ny filàna maro izay tena mitranga. Ao anatin'ny fikarakaran'ny tarika madinika dia rariny ihany ny fisian'ny fizarana enta-mavesatra izay hita fa tsy tiantzika ifampizarana raha ny tena izy, nefa efa mandeha ho azy kosa izany eo amin'ny tarika. Hitako foana ny tena fampiharana ny asa fikarakarana pastoral'ny rehefa ajanon'ny lehiben'ny tarika

²⁶ Jereo ny santionan'ny fanadihadiana ao amin'ny Tovana B. Tadidio fa tsy voatery niankina tamin'ny andraikitra sy ny asan'ny mambra ny valim-panontaniana, fa niankina tamin'ny fahatsapan'izy ireo ny fifandraisany tamin'ny fiangonana.

ny fianarana Baiboly sy ny fotoam-bavaka mba handinihana manokana ny fangatahana azo sy hanokanana fotoana hanoroan-kevitra, hanohanana, hamporisihina na hanaovana vavaka manokana. Mety azo avy amin'ity asa fanompoana ity avokoa ny fanasitranana tena izy ara-panahy sy ara-pihetseham-po ary fanavaozana.

Satria lasa tena izy sy mivelatra ny fifandraisana hita ao amin'ny tarika madinika dia azo ambara amin'ny fomba malalaka koa ny ahiahy sy ny fanontaniana. Ary akory ny fahagagana mahita fa rehefa mamaly ny iray tarika dia hita fa mpitranga eo amin'ny rehetra izany, eny fa na dia ho an'ny Advantista efa matotra ara-panahy aza! Izany- sy ny fijoroana vavolombelona ataon'ny tena manokana- dia tena fanasitranana matanjaka sy mahomby mihoatra ny ateraky ny toko sy andininy ao amin'ny Baiboly. Rehefa miara-manaiiky ny mambra roa na telo ao amin'ny tarika hoe *"izao no fijeriko azy- izao no fomba nanampian'I Jesosy ahy, dia tahaka izay koa no fomba anampiany anao"*. Ahoana ary no tsy hatanjaka ny finoan'ny sisa rehetra!

Manokana kokoa ny endri-panampiana kristiana ataon'ny tarika madinika izay voalamina hitondra ny olona rehetra mitovy hetaheta, mifankahazo sy mifanohana. Ohatra ao anatin'izany ny antokona reny sy ny zanany kely mianatra, ny misara-bady, mpianatry ny oniversite, ny misotro ronono, sns... (Misy fiangonan-dehibe sasany manofana ny mambra hiala amin'ny fisotroan-toaka sy ny fisaraha-panambadiana, sns)

Arakaraky ny maha-lehibe ny fiangonana no mahabetsaka ny filàna ny fikarakarana pastoral, izay azon'ny tarika madinika atao am-pahombiazana. Raha toa ka afaka miandrandra karazam-pitahiana avy amin'ny asa ataony ny fiangonana dia ireto misy tombontsoa manokana azontsika antenaina:

i. Vitsy kokoa ny olona mandao ny fiangonana. Tsy voatery handà an'Andriamanitra akory ireo izay nihemotra mangingina-indrindra fa ny tanora. Ny fihemorana dia matetika avy amin'ny olan'ny olona tsy mahita fampaherezana sy fanohanana rehefa

tojo ady sarotra izy ireo. Hijanona izy ireo raha mahazo ny fanohanana ilainy.

ii. Afaka handalina ny pastora. Ny asa ara-Baiboly ataon'ny pastora dia ny mampianatra/manofana, "(manomana) ny olona masina ho amin'ny asa fanompoana amin'ny fiangonana, ho amin'ny fampandrosoana ny tenan'i Kristy..."(Efesiana 4:11,12). Ireo pastoran'ny tarika madinika dia hanao ny asa fikarakarana hatrany ary koa hainy ny manao laharam-pahamehana ny fampivelarana ny fanomezam-pahasoavana sy ny fahaiza-manao izay nomen'ny Fanahy Masina ny mambran'ny fiangonana. Ny vokany dia miasa²⁷ arak'izay voalazan'ny Soratra Masina ny mambra- miasa araka ny tokony ho izy toy ny vatana izay manana ny rantsany.

f)Mahakasika ny haavo rehetra ao amin'ny tarika isan-karazany ny fanabeazana. Faritan'ny raki-bolana fa ny fanabeazana dia "fitaizana, famporisihana, famelomana."Dingana fampitomboana ho tahaka an'i Kristy mba ho ilaina amin'ny Asany ny fanabeazana kristiana ary mitohy mandritran'ny androm-piainantsika izany. Toy izao no nambaran'i Dale Galloway, pastoran'ny fiangonan'ny tarika madinika lehibe indrindra (izay nitombo avy tamin'ny tarika madinika tao an-tranony ka lasa nisy mambra mihoatra ny 5000 tao anatin'ny dimy amby roapolo taona latsaka):

*"Mino aho fa farafahakeliny mitombo haingana im-balo avo heny ny isan'ny olona rehefa ao anatin'ny tarika madinika sy manatrika fanompoam-pivavahana isan-kerinandro izy ireo... raha ampitahaina amin'ny hoe fotoam-pivavahana ihany no atrehina."*²⁸

Araka ny nasehon'i Paoly an'i Timoty dia mitana anjara asa goavana ny Soratra Masina ao amin'ity dingana ity satria ireny dia "mahaso koa ho fampianarana, ho fandresen-dahatra, ho fanitsiana izay diso, ho fitaizana amin'ny fahamarinana, mba ho tanteraka ny olon'Andriamanitra, ho vonona tsara ho amin'ny asa tsara rehetra."(2Timoty 3:16, 17)

²⁷ Romana 4 :4-8 ; 1Korintiana 12 :12-30 ; Efesiana 4 :16

²⁸ Dale Galloway, *The Small Group Book* (Grand Rapids, MI: Fleming H. Revell, Division of Baker Book House Co., 1995), 69.

Na izany aza ny kristiana dia tsy ho matotra ho azy amin'ny fiainana sy famakiana Baiboly fotsiny. Mety hitombo amin'izay fomba izay ny fahalalana, fa ny fahendrena sy ny fahasoavana kosa hitombo amin'ny alalan'ny fifandraisana amin'ny olon-kafa. Araka ny fijerin'i Petera dia aseho amin'ny alalan'ny "fitiavana ny rahalahy" (2 Petera 1:7) ny fahamatorana kristiana ary sarotra ny maneho izany na rehefa irery na rehefa miaraka amin'ny besinimaro. Izany no tena mampitombo ny kristiana rehefa tafiditra ao anaty tarika madinika izy ireo. Ampianarina, volavolaina ary ampiharina eo amin'ny tena zava-misy eo amin'ny fiainana ny Soratra Masina rehefa ao amin'ny vondrona madinika.

Satria miovaova ny zavatra atao ao amin'ny tarika madinika dia azo alamina arakaraky ny dingam-piainana kristiana nolalovan'ny olona ny tarika isan-karazany ary ampiasaina amin'izany ny fitaovana fianarana Baiboly mifanaraka amin'ny taonany sy ny fanandramana niainany.

Ny vondrona fanabeazana dia karazana tarika madinika hoan'ny kristiana vaovao ka ny fanabeazana no tena ifotorana mihoatra noho ny any amin'ny tarika hafa. Toy izao no fiasany:

- **Manome tombontsoa** hoan'ny mpino vaovao mba hana-namana kristiana ary hahatsiaro ho tena anisan'ny mambra
- **Mamantatra** haingana ny fanomezam-pahasoavana sy tombontsoa azo trandrahana mba hahatonga azy ireo hanana andraikitra ao amin'ny fiainam-piangonana.
- **Miantoka** ny fiorenan'ny fototra ara-panahy (mihoatra ny torinteny iray na fianarana Baiboly izany raha hoan'ny kristiana vaovao mba ahazoany tsara ny amin'ny famonjena rehetra sy mba ho azony antoka tsara ny fanandramany miaraka amin'i Kristy.)
- **Mamporisika** isan'andro ny fianarana Baiboly sy ny vavaka ataon'ny tena manokana

- **Mampitombo** ny fitokisana rehefa manomboka miara-mivavaka amin'ireo kristiana hafa

- **Mahatonga** ny mambran'ny tarika hanomboka hizara ny finoany Asehon'ity fanadihadiana nataon'i Win Arn avy ao amin'ny Institute of Church Growth (Ivon-toeran'ny Fitomboan'ny Fiangonana), Pasadena, California ity, taona vitsy lasa izay tamin'ireo olona 100 vao niova fo, ny maha-zava-dehibe an'ity karazana fanabeazana ny mpino vaovao ity, izay mampifandray azy ireo amin'ny mpino hafa amin'ny alalan'ny finamanana. Tamin'ny fotoana nanaovana ny fanadihadiana dia 50 tamin'ireo niova fo no mavitrika ao amin'ny fiangonany ary ny 50 tsy tonga intsony. Asehon'ity diagrama²⁹ manaraka ity ny fifandraisana mazava misy eo amin'ny fanoloran-tena hoan'ny fiangonana sy ny finamanana mandritran'ny enim-bolana voalohany niangonana.

Isan'ny namana vaovao ao am- piangonana	0	1	2	3	4	5	6	7	8	9+
Mavitrika	0	0	0	1	2	2	8	13	12	12
Miala an- daharana	8	13	14	8	4	2	1	0	0	0

Ao amin'ilay vondrona misy ireo mambra 50 mavitrika dia tsy misy latsaky ny telo ny isan'ny naman'izy ireo ary ny ankamaroany aza dia fito na mihoatra. Ao amin'ny vondrona misy ny 50 tsy mavitrika dia iray ihany no mana-namana mihoatra ny dimy raha toa ka iray, roa, na tsy misy ny an'ny ankamaroany. Ny vokany? Miala an-daharana izy ireo! Ary manosika antsika hampiroborobo ny tarika madinika koa izany- indrindra fa ny tarika fanabeazana ao amin'ny fiangonantsika.

g)Misy ny fojoroana vavolombelona. Ambara amintsika fa “nahita fitia tamin'ny vahoaka rehetra”(Asa 2:47) ny fiangonana voalohany. Mazava ho azy fa nisy zavatra niseho tao amin'ny

²⁹ Win Arn, Charles Arn and Carol Nyquist, *Who Cares About Love?* (Pasadena, CA: Church growth Press, 1986), 180, quoted in Kurt Johnson, *Small Group Outreach*, 36.

fiangonana ka nahasarika ny avy any ivelany. Hitan'ny olona fa hafa mihitsy ity fiaraha-monina ity. Hitan'izy ireo fa tia an'Andriamanitra ny kristiana, nifankatia ary tia azy ireo. Izany no nitarika azy ireo ho lasa kristiana araka ny nampanantenain'i Kristy. (Jaona 13:35)

Ireo "mpitady fahafinaretana" ankehitriny izay mahafantatra kely ny amin'ny fivavahana kristiana ihany koa dia mila ny mahazo tombontsoa mba hahazo asa-pitiavan'ny kristiana. Aiza indray moa no hahitany izany bebe kokoa mihoatra noho izay hitany amin'ny fifandraisan'ny mambra sy ny fifampizarany fanandramana. Rehefa afaka miresaka amin'ny fomba tsotra sy mazava ny amin'ny fomba nikasihan'i Jesosy ny fiainan'izy ireo ny kristiana dia ho hitan'ireo tsy mpiditra am-piangonana fa tena velona ny fivavahana kristiana.

Afaka mitombo ara-dalàna ny fisakaizan'ny kristiana sy ny tsy kristiana ao amin'ny tarika madinika. Zava-dehibe ny finamanana eo amin'ny dingan'ny maha-mpianatra, tsy aorian'ny fiovam-po ihany fa mialohan'izany! Fantantsika fa manao toy izany ireo izay miditra ho anisan'ny fiangonana Advantista, tsy hoe eken'izy ireo ny fampianarana Advantista fa nohon'ny fisakaizana amin'ny Advantista- na amin'ny mambran'ny fiangonana, ny pastora na ny evanjelista izany. Nivoaka tamin'ny fanadihadiana³⁰ vao haingana ny tatitra fa 70% n'ireo niova ho kristiana no manomboka mizotra ao amin'ny finoana amin'ny alalan'ny finamanana ary izany dia manoso-kevitra fa tokony hifantoka bebe kokoa amin'ny fampiroboroboana ny finamanana ny asa fitoriana amin'ny hoavy. Andeha atao izany. Amin'ny maha-Advantistadia antsika dia tsy tokony hoe hitarika ny olona ho tonga mambran'ny fiangonana amin'ny alalan'ny batisa sy ny tsangan-tànana ihany no tanjontsika. Tadidio fa mpianakavy isika? Ary miorina eo ambonin'ny fifandraisana ny fianakaviana. Voalaza fa mba hampahomby antsika eo amin'ny fitarihana ny hafa ho anisan'ilay fianakaviana dia tokony

³⁰ Christian Schwarz, "Loving Relationships," *Church Growth Digest* (British Church Growth Association: Spring 1997), 10,11

manaiky ny hampivelatra ny fifandraisantsika amin'izy ireny isika amin'ireto dingana telo samy hafa, fa tsy iray ireto:

Ny dingana voalohany dia maka namana vaovao, tsy misy resaka ara-pivavahana

Ny dingana faharoa dia ny mampiroborobo ny finamanana ho lasa fisakaizana kristiana ka Jesosy no lasa Tompony sy Mpamonjy tahaka ny antsika.

Ny dingana fahatelo dia mampiroborobo ny finamanana kristiana ho lasa finamanana Advantista rehefa manasa ny namana ho tonga anisan'ny fianakaviana ao am-piangonana Manamora ny fampitomboana tsikelikely ny fisakaizana ny tarika madinika. Manampy ny mpianatra tsirairay koa izany hahatonga ny hafa ho tonga mpianatra. , na mbola tsy havanana aza.

Nahoana no manamora kokoa ny fijoroana vavolombelona ny tarika madinika

- 1-Mamporisika ny asan'ny ekipa izany
- 2-Mahatonga ny olona saro-kenatra hifandray
- 3-Mahakasika ny tena manokana izy ireny
- 4-Mamporisika ny fandraisan'anjara betsaka izy ireny
- 5-Azo ovaovaina izy ireny
- 6- Fandaminana kely fotsiny no ilaina
- 7-Mihaona any amin'izay onenan'ny olona ny tarika
- 8-Mandeha ho azy ny fijoroana vavolombelona
- 9- Tsy misy fitsipika raikitra
- 10-Mora kokoa ny fifandraisana

Miompana betsaka amin'ny lohahevitra momban'ny fijoroana vavolombelona sy asa fitoriana ny fizarana fahaenina

Ho famintinana... Nahoana ary no tena manan-danja ny tarika madinika ao amin'ny fiangonana? Tsotra fotsiny, nohon'ny vokatra aterany. Ny tarika madinika dia miteraka mpianatra mitarika, miasa, mandray anjara amin'ny fanjakan'Andriamanitra, mpianatra mitady ny very, mpianatra mifanabe ary miara-mifaly rehefa manao ireo rehetra ireo.

*Niala ny enta-mavesatra rehefa afaka roa-polo taona taty
aoriana*

Dokotera i Sarai³¹ ary manan-janaka roa. Indray andro dia nantsoin'ny anadahin'ny Sarai, izay mambran'ny fiangonana any amin'ny toeran-kafa, ny pastora Advantista teo an-toerana raha mba afaka hitsidika azy amin'ny fotoana mahamety izany ary hanasa azy ho any am-piangonana. Nanao izany ny pastora, nanaiky ny fanasana izy ary nanomboka nandeha nivavaka matetika.

Tamin'izany fotoana izany dia niezaka hanomboka ny asa ataon'ny tarika madinika ny fiangonana ary nanomboka nihaona sy ninamana tamin'ny olon-kafa maro i Sarai. Tiany ny fianarana Baiboly- fa ny tena nanohina ny fiainany indrindra dia ny fomba nilazan'ireo mambran'ny tarika ny fanandraman'izy ireo amin'ny fomba misokatra. Tena toerana milamina tokony hisy ny tena izany. Afaka miseho amin'ny tena maha-izy azy ny olona ary rehefa mifampizara izay ilainy sy ny tebitebiny (ny fifaliany koa) izy ireo dia mahazo risi-po sy tanjaka avy amin'ny fitiavana sy vavaka avy amin'ireo izay ao amin'ny tarika. Toy ny Andriamanitra mihitsy no mikasika rehefa mihaona izy ireo.

Indray Alatsinainy hariva dia nankany amin'ny fivoriam-bavaka i Sarai niaraka tamin'ny enta-mavesatra tao am-pony. Tsy nikasa ny hilaza amin'olona ny olany izy. Nefa rehefa nianatra sy niady hevitra ara-Baiboly ny tarika dia nanomboka hitany tao anatin'ilay tantara voalazan'ny Baiboly ny tenany. Nanomboka nizara ny tao am-pony izy. Zavatra nentina teny foana nandritra nandritra ny roapolo taona izany- mbola tsy sahy nilaza izany tamin'olona mihitsy izy, na dia tamin'ny vadiny aza, satria tsy kristiana izy ary tsy ho azony mihitsy. Nihamaivana ny fony arakaraky ny nitenenany. Tsy hainy ny nanajanona ny ranomaso hanamaivana azy. Nohon'ny zava-nitranga

³¹ Novaina ny anarana sy ny tsipiriany momba ireo olona ireo mba tsy hiseho ny mombamomba azy

tamin'io hariva io dia vitany ny nanadino ny lasany ary dia nanomboka pejy vaovao teo amin'ny fiainany izy.

Volana vitsivitsy taorian'izay dia vita batisa izy.

FIZARANA FAHADIMY

Ny fihetsehan'ny tarika madinika

"Fa mba hanaraka ny marina amin'ny fitiavana ka hitombo amin'ny zavatra rehetra ho amin'Izay Loha , dia Kristy"

(Efesiana 4:15 NIV)

Fampitandremana: Sela velona ny tarika madinika-vimbino ampitandremana ! Ao anatin'ny tontolo feno fikarakarana ampitiavana ihany no afaka hitombo sy afaka hivoatra ny zavamanan'aina (Ny fiangonana sasany dia miantso ny tarika madinika ao aminy ho TLC noho izay antony izay). Mety misy ny tarika madinika izay tsy tafiditra ho anisan'ny mambra vokatry ny fitsipika napetraky ny komitin'ny fiangonana. Tsy voatery ho anisan'ny iray amin'ireny ny mambran'ny fiangonana. Tsy azo terena hitovy ny tarika tsirairay. Tsy misy toerana hoan'ny fanerena ao amin'ny asan'ny tarika madinika.

Tsy ny ataon'ny tarika madinka ihany no zava-dehibe fa ny fomba anaovany izany. Efa noresahantsika ireo zavatra azon'ny tarika madinika atao, izay tsy vitan'ny tarika lehibe ny manao izany. Nefa mahomby izy ireo tsy nohon'ny mahakely azy ihany fa vokatry ny fomba fiasany fa satria fehezin'ny foto-kevitra TLC (fikarakarana ara-pitiavana malemy fanahy) izy ireo.

Ireo soa toavina fototry ny tarika madinika

Na aiza na aiza no ifampiresahan'ny olona- any an-tokantrano, any am-pianarana, toeram-piasana- dia fehezin'ny soa toavina vitsivitsy ny fifandraisan'izy ireo. Tahaka ny fitsipi-dalao mametraka ny fomba filalaovana dia ireo soa toavina ireo no milaza raha manara-penitra na tsia ny fifandraisana misy eo amin'ny mpampiasa sy ny mpiasa, ny rivotra iainana ao an-tokantrano ve feno fikarakarana sa tsia, mendrika isakaizana ve ny fiangonana sa tsia, manome risi-po ve sa manakana ny fitomboana ny tarika madinika.

Ireo soa toavin'ny tarika madinika ireo no "fitsipi-dalao"- Atao ao anaty fifanekena ireo foto-kevitra azo ampiharina izay heverin'ny tarika ho manan-danja ireo. Ireto soa toavina³² manaraka ireto dia tena ilaina hoan'ireo tarika izay vonona ny hampitombo ny fifandraisan'ny samy olona, hahamatotra azy ao amin'i kristy ary ny hizarany amin'ny hafa izay ananany.

1-Fampaherezana. Mitaky ady hevitra misokatra sy mahitsy ary fandraisan'anjara'ny mambran'ny tarika rehetra ny fivoriana izay atao mba hahombiazana. Hisy izany fandraisan'anjara izany raha toa ka mahatsapa ny tenany ho omen-danja sy ankasitrahana izy ireo amin'ny maha-mambran'ny tarika azy ka mitombina sy manan-danja ny heviny sy ny fanontaniany.

Ilaintsika ny mifampizara izay ananantsika satria amin'izay lalana izay ihany no afaka hiroborobo ny endriky ny fiaraha-monina- izay fahalalana miankina aman'aina ny amin'ny fifampiankinantsika. Mampalahelo nefa fa vokatry ny tahotra ananantsika, ny tsy fisokafana ary ny fitadiavana fahaleovantena sy fitokatokanana dia zara raha hita izany fitiavana mizara izany eo amin'ny sehatry ny fiaraha-monina. Nefa ao amin'ny tarika madinika kristiana dia azo atao izany raha manolo-tena amin'ny fifampaherezana sy miara-mitombo ao amin'i Kristy isika. Avy amin'ny fanamafisana no tena iavian'ny

³² Ireo soa toavina ireo dia hita ao amin'ny Bill Donahue, *Leading Life-Changing Small Groups*, 88,89.

famporisihana. Tiantsika ny manorina toetra mahay manome lanja ny tenantsika eo amintsika samy isika.

Ny fampaherezana dia mifanohitra amin'ny faniliana. Lavintsika ny olona rehefa tsy rarahaintsika sy tsy raisintsika izy ka heverina ho toy ny tsy misy sy tsy misy dikany ny tenin'izy ireo sy izay ataony. Noho izany dia mampahery olona isika rehefa hajaintsika izy ireo, ampahafantarintsika fa manana ny lanjany amintsika izy ary maneho ankasitrahantsika ny teniny sy izay ataony. Ny mampahery olona akory tsy midika hoe ekentsika ny heviny na ny fomba fiainany. Tsy misoroka ny ady hevitra na ny fifandirana ny fampaherezana. Nefa rehefa tena mitranga tokoa ny fifandirana dia miantoka ny tsy fisian'ny fankahalana tanteraka sy ny fifanandrinana izany, izay mateti-pitranga rehefa misy ny mandresy sy ny resy any amin'ny farany. Afaka mifampahery ny mambran'ny tarika madinika amin'ny fitenenana hoe: "Faly aho fa eto ianao", na "misaotra ny amin'izany hevitrao izany" na "mahaliana izany. Ahoana no nahitanao izany hevitra izany?". Zava-dehibe koa ny fifandraisan'ny mambra an-tariby sy ny famangiana. Tokony ataon'ny lehiben'ny tarika indrindra ny mampahafantatra ny mambra tsy tonga fa tena nalahelo izy ireo ary ankasitrahana ny fitohizan'izany fihetsika na asa manokana ataon'ny mambra izany.

2- Fanoloran-tena. Eken'ny mambran'ny tarika fa natao hifanombo izy ireo ary manaiky ny hanao ny tenany sy ny fananany (fotoana, tanjaka, hevitra, fitaovana raha ilaina) avy hanampiana ny hafa. Ao anatin'izany ny fanaovana loha-laharana ny fanampiana ny fivoriantan'ny tarika. Tsy tokony hiditra ao anatin'ny tarika ny tsirairay raha tsy vonona ny hanolo-tena ho an'izany. Betsaka ny tarika madinika manao fanekena³³ ka ao anatin'izany ny mambra dia manaiky ny tanjona sy ireo soa toavina ao ary manolo-tena ny hiaraka amin'ny tarika.

³³ Jereo ny santionan'ny fanekena ao amin'ny tovana E

3- Fahatokiana. Mba hitomboan'ny fifampitokisana eo amin'ny mambran'ny vondrona ary satria isika mifampikarakara (jereo ny teboka 7 etsy ambany) dia tokony ho vonona ny hifanao ny marina izy ireo. Ao amin'ny sehatra misy ny tarika madinika dia midika hoe milaza izay tokony holazaina mba hahasoa ny tarika na ny mambra tsirairay ao. Araka ny tenin'i Jesosy dia manana andraikitra roa isika eo amin'ity sehatra ity. Raha fantatsika fa misy manana olana amintsika (vokatry ny zavatra nolazaintsika na nataontsika), dia tokony hanao izay azontsika atao hampilamina ny fandehan-javatra isika(Matio 5:23). Tahaka izay ihany, raha misy zavatra tsy nety izay nataontsika tamin'olona hafa dia tombontsoantsika ny milaza ny olana ary mitady fihavanana aminy (Matio 18:15-17).

Azo atao ny manao mahitsy an-terisetra. Na izany aza, rehefa miezaka ny hiaina araka ny fanahin-dalàna isika, tsy amin'ny soratra ihany, dia tsy hanimba zavatra ny fahitsiana, fa "mba hanaraka ny marina amin'ny fitiavana ... ka hitombo amin'ny zavatra rehetra ho amin'Izay Loha dia Kristy."(Efesiana 4:15). Tsy ho mora foana akory izany. Mora foana matetika ny milaza ny hevitra am-pahitsiana rehefa fianarana Baiboly ary ny olona efa matotra dia afaka manaiky ny toro-hevitra na koa ny fananarana ataon'ny tarika. Nefa araka ny teny izay Jesosy mihitsy no nilaza hoe: hisy ny fotoana izay firesahana ny olana amin'ny fomba mitokana, araka ny fitsipika tena izy,ary ala nenina farany ny fitondrana ny olana eo anivon'ny tarika.

4- Fisokafana. Finiavana ny ho marina amin'ny tenantsika tsotra izao izany, manala ny saron-tavantsika ary mampiseho ny tena maha-izy antsika. Mampalahelo fa vokatry ny fahotana dia mihevitra ny olona fa ilainy ny mifanafin-javatra amin'ny izy samy izy sy amin'Andriamanitra. Tsy tonga ho azy amintsika ny fisokafana. Na izany aza dia amin'ny olona mifankafantatra ihany no afaka mivelatra ny fifandraisana- midika ho fivoahana ao amin'ny fikatonana izany.

Tsy mitaky ny fizarantsika amin'ny tsipiriany amin'olon-kafa ny fiainantsika manokana akory ny fisokafana; fa kosa mila mahay manaiky isika fa samy olombelona ny ao amin'ny tarika- fa tsy milaza- na mampiseho izay zavatra tsy tena izy momba antsika. Tena manafaka izany hoe ao anaty vondron'olona izany, izay samy mahatsapa ho mahazo aina satria mifampizara ho azy ny fifaliany, ny fanaintainana, hambom-po sy ny fahadisoampanantenana. Fanampin'izay dia afaka mifanaiky mora foana ny olona raha mahafantatra ny tsirairay fa "izay hitanao no azonao".

5- Fihazonana tsiambaratelo. Tsy hitombo ny fisokafana sy ny fahamarinana raha tsy misy ny fihazonana tsiambaratelo. Fa any amin'izay misy ny rivotry ny fitiavana, fahatokiana, fifanekena fa tsy aely any an-toeran-kafa izay rehetra zaraina ao amin'ny tarika dia na ny mambra saro-kenatra aza hahatsiaro hilamina amin'ny maha-izy azy sy amin'ny fanehoany ny momba azy.

Tamin'ny dingana voalohany nisian'ny tarika, rehefa nanomboka nifankafantatra mambra ary nanasa ny namana mba ho tonga, dia mbola ivelambelany ihany ny fifandraisana ary mbola tsy olana ny fihazonana tsiambaratelo. Nisy nampiana ny iray tamin'ireo soa toavina ireo teny an-dàlana teny mba hiarovana ny tarika rehefa niha-lalina ny fifampizarana.

- **6.Toetra tia mangoraka.** Samy manana ny zavatra nolalovany, ny fihetseham-pony sy izay ilainy ny mambra tsirairay ao amin'ny tarika. Na ny olona mitovy amin-javatra betsaka aza-tombontsoa, asa, maha-lahy na vavy, taona, foko, sns.- aza dia hahita tsy ho ela fa mbola betsaka mihoatra ny fitoviany ny fahasamihafany. Samy manana ny tenantsika isika rehetra ary raha toa ka hampitombo ny firaisana ao anatin'ny olona samihafa no tanjon'ny tarika madinika dia tanjony ihany koa ny manampy olona hitombo isambatan'olona. Ny fifampizakana toetra dia fahaiza-manaiky sy manaja ny maha-samihafa antsika, indrindra fa eo

amin'ny fahalementsika. Ao anatin'izany fahalemena izany, ankoatran'ny zavatra hafa, ny:

- Fahalalana Baiboly
- Faniriana/fahaiza-mamaky amin'ny feo mafy ny Baiboly
- Ny haavon'ny fandraisan'anjara amin'ny ady hevitra
- Fahavononana hivavaka
- Fahavononana hiresaka ny amin'ny fanandraman'ny tena manokana

Farafahakeliny dia tokony hahatsiaro tena ho ao an-trano ny tsirairay rehefa ao amin'ny tarika madinika. Tsy manan-jo ny hisikotra lalina mihoatra noho izay tian'ny mambra ambara isika. Ary rehefa mifampikasoka amin'ny tsy Advantista na ny tsy kristiana ny Advantista dia tokony hitandrina ary tsy hanisy ny rivotry ny hoe "izahay sy rizareo", na mahatonga ny sasany hihevitra ho tsy mahay raha ampitahaina amin'ny hafa. Izany no maha-hevitra mety ny fanomanana mialoha ny boky kely fianarana Baiboly na drafitra: Manamora ny fianarana Baiboly hoan'izay mbola tsy zatra izany. Raha misafidy ny tsy hampiasa azy ireny ianao dia ataovy izay ahazoan'ny tsirairay avy Baiboly ary mampiasa laharam-pejy hanarahana azy, tahaka izany koa ny toko sy andininy. Aoka ho kinga.

7- Fandraisan'andraikitra. Samy mifandray andraikitra ny tsirairay amin'ny fitomboan'ny tenany sy ny fitomboan'ny tarika. Midika izany fa ilaintsika ny mandray sy ny manome ary manohana ara-pitaovana sy manome valin-kafatra. Ny tarika tsirairay avy koa dia tompon'andraikitra amin'ny fiangonana eo amin'ny vokatra aterany eo amin'ny fiainan'ny mambra sy ny vondron'ny mpiara-mivavaka manontolo. Tsy mahaleo tena ny tarika rehetra fa anisan'ny ampahany amin'ny tenan'ny fiangonana, mifandray amin'ny alalan'ny rafi-pitantanana mifandraika amin'izany.

Rafi-pitantanana azo atao ity hoan'ny Tarika Madiniky ny Fiangonana manana mambra zato

Pastora

0

0

0

Mpanara-maso ny dimy izay lehiben'ny tarika
Mpanara-maso ny dimy izay lehiben'ny tarika

00000

00000

Tarika

madinika

Tarika madinika

8- Famokarana. Natao mba hitombo amin'ny alalan'ny fomba mety tsy mahazatra azy ny tarika madinika. Mitombo isa amin'ny alalan'ny fizarazarana izy ireo. Rafitra iray natao hiteraka izy ireo. Tsy ny hahatonga azy ho lehibe arak'zay tratra no tanjony fa mba ho betsaka arak'izay azo atao. Midika izany fa rehefa mahatratra ny habe tena izy ny tarika iray (roa ambiny folo matetika no isa ambony indrindra), na mahatratra ny tanjony dia miala ny mambra sasany ao amin'ny tarika ary manangana tarika vaovao ary hisy mambra vaovao hanatevin-daharana na koa hizara ny mambra rehetra mba hiditra any amin'ny tarika hafa. Ho soa hoan'ny fitomboan'ny fiangonana dia manaiky ny hirifiry izay mety aterak'izany ny mambran'ny tarika. Misoroka mialoha ny firoboroboan'ny fitsitokotokoana ny fahalalana hatramin'ny voalohany izany foto-kevitra izany!

9- Mifanaraka amin'ny zavatra tadiavina. Mitera-bokatsoa ny tarika madinika raha mifanaraka amin'ny fiainan'ny mambran'ny tarika ny zavatra ataon'izy ireo ao sy ny fomba anaovany azy. Mialohan'ny hanasan'ny mambran'ny tarika (matetika misy

mambran'ny fiangonana dimy hatramin'ny fito) ny namany hiaraka aminy dia tokony hazava, amin'ny alalan'ny fametrahana ireto fanontaniana ireto,ny tanjon'ilay vondrona:

- Mikendry ny hisarika olona tsy kristiana, kristiana hafa, olona manana firehana hafa ve ny tarika? Tadidio fa arakaraky ny fisian'ny fahasamihafana ao amin'ny tarika no mahasarotra ny ahitana izay mifanaraka amin'ny filàn'ny tsirairay.
- Moa ve tarika mahaliana ny ray aman-dreny, tanora, mpianatry ny oniversite, mpitovo, sns; sa hatao tarika liana amin-javatra ankapobeny izay hampahazo aina ny olona avy amin'ny kolontsaina samihafa?
- Inona no ezahan'ny tarika hotratrarina ao anatin'ny fepotoana fohy, antonony sy lavitr'ezaka?
- Ahoana no fomba hanatrarana'ny tarika ny tanjony ary inona no fitaovana ho ampiasainy?

Ny famaliana ireo fanontaniana ireo dia manampy ny tarika hahazo antoka fa tena mifanaraka tsara amin'ny ilain'ny mambra ny zavatra ataony. Ambonin'izany dia ilaina ny mitandrana eo amin'ny fifidianana Baiboly (ny dikant-teny maoderina no matetika tsara indrindra) sy ny teny ampiasaina mandritran'ny fivoriana (tsy asiana kisarisarin-teny ara-Baiboly na filazana ny Advantista); tadidio fa betsaka no tsy mahalala an'i Jesosy.

10-Rivotra mampahazo aina. Afaka mianatra sy mitombo tsara isika rehefa ankafizintsika izay ataontsika. Noho izany dia tokony ho fotoana ahafahan'ny olona mahazo aina ny fivoriana'ny tarika madinika, fiaraha-miomehy, fankafizana ny fiarahana ary fianarana ny tenin'Andriamanitra. Mazava ho azy fa manana ny lafiny mahamatotra azy koa ny fiainana kristiana. Fa ny rivotra mavesatra, matotra loatra izay tsy mifanaraka amin'ny fifaliana izay nampanantenain'i Kristy dia tsy hanampy ny tsirairay sy ny tarika hitombo.

Soa toavina telo- Tsotra izy ireo, sa tsy izany? Ary tokony ho izay. Na eo aza izany rehetra izany dia izy

ireo no soa toavina izay mitantana ny asan'ny Kristy. Ny antony dia satria tsy tsotra araka ny fahitana azy izy. (Nisy olona niteny hoe sarotra nohon'ny fitandremana ny didy folo izy ireo!). Tsy tonga ho azy amin'izao ireo. Noho izany dia mety hahita olona sasany tsy hahazo aina amin'ireo ianao satria tena mitondra fanovana be teo amin'ny fomba tranainy izay nentina nitondrana ny fampianarana Baiboly sy ny vondrom-bavaka izy ireny. Mitaky fotoana sy ezaka ny fanovana. Fa ny isambatan'olona sy ny fiangonana miaraka no tsara indrindra hoan'ireo fanovana ireo- ary izany no hampahomby ny ezaka.

Ny zavatra hitan'ny mpanao nify

Misy mambran'ny tarika madinika anankiray mankafy ny fivoriana ary nilaza tamin'ny mpanao ny nifiny ny amin'izy ireo izy ka nanasa azy hanatrika. Ny Alatsinainy taorian'io dia nahazo aina ilay namana raha nahita fa betsaka tamin'izy ireo no namana mpiara-miasa, rehefa natao ny fanolorana azy tamin'ireo mambran'ny tarika. Mpitsara ilay olona nitarika ny vondrona. Tsy matotra be ny rivotra niainana tao. Nahazo aina izy.

Tao anatin'izay dia sanganehana izy. Ahoana no fomba ampianarana olona hanaiky ny Baiboly ho azo inoana- tahaka ny nataon'ireto olona ireto- ary milaza ny amin'i Jesosy sahala amin'ireny mbola velona ireny Izy? Nilaza izay nanitikitika azy izay tamin'ilay namany nanasa azy izy. Raha tokony ho niaro

tena na niezaka ny hanome porofo izy dia izao fotsiny no nolazainy: "Tongava foana manatrika ny fivoriana."

Rehefa nanatrika fanindroany izy dia nanao fihaikana tao amin'ny tarika ilay mpanao nify- fa izy ireo koa dia namporisika azy mba hiara-mizara amin'izy ireo izay novakiana tao amin'ny Baiboly.

Na teo aza ny fisalasalany dia nanohy nanatrika hatrany izy ary nankafiziny ny fivoriana tsirairay. Tsy ela dia nanaiky izy: "Tsy azoko ny zavatra miseho eto, nefa ianareo mananjavatra izay mbola tsy hitako sy nandramako taloha. Inona izany?"

Hoy izy ireo: "Manana an'i Jesosy Tompo izahay."

Nanontany izy hoe: " Ahoana no fomba ananako an'i Jesosy Tompo?" Ary teo amin'ny fivorian'ny tarika madinika no nahafahan'izy ireo nitarika azy hanaiky hoan'ny tenany an'i Jesosy Kristy ho Mpamonjy sy Tompony."³⁴

FIZARANA FAHAENINA

Tarika madinika manao asa fitoriana

"Ary ny olom-bonjena dia nanampin'ny Tompo isan'andro ho isan'ireo." (Asa 2:47)

Sarotra ny asa fitoriana. Na oviana na oviana ary n' aiza n'aiza no hahitan'ny vehivavy sy lehilahy filazana ny amin'i

³⁴ Wollan, *God at Work in Small Groups*, 99.

Jesosy Kristy eo amin'ny fiainan'izy ireo dia hisy foana ny fanoherana. Amin'ny alalan'ny asa fitoriana dia misokatra ny ady ataon'ny fiangonana amin'ny olona sy amin'ny "*fanapahana sy amin'ny fanjakana sy amin'ny mpanjakan'izao fahamaizinana izao.*" (Efesiana 6:12 NIV)

Fanampin'izay, ny kolon-tsaina sasany dia manasarotra ny asa fitoriana amin'ny toerana sasany mihoatra noho ny any an-kafa. Any Angletera ohatra dia tsy maintsy miresaka fihaikana telo manokana isika raha ohatra ka te-hahomby eo amin'ny fanatonana ny Anglisy "*any amin'ny misy azy*"³⁵. Ireto avy izy ireo:

a)Fihaikana hanatratra ny androtokony tsy mpiditra ampiangonana

Efa ela izao ny ankamaroan'ny vahoaka anglisy no tsy manana fifandraisana intsony amin'ny fiangonana kristiana, raha tsy hoe rehefa manatrika mariazy na fandevenana. Tamin'ny taona 1851 dia 40% n'ny mponina no mandeha mivavaka. Ankehitriny dia lasa nidina latsaky ny 10% (mbola latsak'izany aza any amin'ny tanàn-dehibe maro)³⁶. Satria tsy mifanaraka amin'ny sekolinay nandritran'ny taona maro ny fanabeazana fototra kristiana dia hita fa taranaka telo nifandimby amin'ireo mpifanolo-bodirindrina aminay no tsy mbola namaky Baiboly mihitsy, tsy mahalala hoe ohatry ny ahoana izany Andriamanitra izany ary tsy manana fahalalana momban'ny Filazantsara. Tsy voatery ho tsy mino ny fisian'Andriamanitra izy ireo; tsy fantatr'izy ireo fotsiny izay rehetra momban'ny kristiana.

Tato anatin'ny telopolo taona mahery izao dia vitsy monja tamin'ireo niditra ho anisan'ny fiangonana Advantista (5-10%)no avy tamin'ireo vahoaka betsaka ireo. Betsaka tamin'ireo "niova fo"nandritra io vanim-potoana no efa nanana fototra Advantista na Kristiana, na farafahakeliny efa nanana fomba fijery kristiana. Fanampin'izay, rehefa nandeha ny fotoana dia hita fa toa nihen-danja fa tsy nitombo ny fahombiazantsika teo amin'ny

³⁵ Tadio fa tsy hoe mandà ny herin'ny Filazantsara ny tenako amin'ny firesahana ny olana. Milaza fotsiny aho vahaolana ny vavaka rehefa fantatrao ny olana

³⁶ Peter Brierley, *Christian England* (Eltham, London: MARC Europe, 1991), 30.

fanatrarantsika ireo izay tsy mpiditra am-piangonana. Ilaina fantatra izany, indrindra ny fahafantarana fa ny fiangonana tsy Advantista dia maharesy lahatra ny olona tsy mpiditra am-piangonana maro.

Mazava fa mifanalavitra tsy mbola nisy toy izany ny elanelana misy ny Kristiana sy ny tsy Kristiana eo amin'ny resaka ara-moraly, toe-piainana ary ny fijery ny tontolo ankapobeny. Niova ifotony tamin'ny fomba maro ny fiaraha-monina tao anatin'izay telopolo taona mahery izay (raha misy fisalasalana dia anontanio ny olona rehetra izay mihoatra ny efapolo taona). Mandeha haingana lavitra nohon'ny taloha ny fiainana amin'ny ankapobeny. Kely kokoa izao tontolo izao. Vetivety ny fifandraisana. Noho izany ny fanandraman'ny olona ny fiainana, ny filàny sy ny olany dia tsy mitovy tamin'ny nahazatra taloha. Na ny voambolantsika aza efa niova ary amin'ny fomba hafa no ilazan'ny olona ny tenany amin'ny alalan'ireo fiteny ampiasainy, ny mozika henoiny, ny akanjo tafiany, ny fialamboliny sy ny mahaliana azy. Betsaka amin'ireo fiovana ireo no sady tsy marina no tsy diso- tsy mitovy fotsiny amin'izay efa nahazatra izy ireny.

Ny olana dia rehefa miova be ny fiaraha-monina dia zara miova ny fiangonantsika. Betsaka amin'ny ataontsika ao am-piangonana no mitovy amin'ny fomba nanaovana azy taloha. Ary mazava ho azy fa tsy misy ny maharatsy izany. Mahatsiaro ho mahazo aina isika eo amin'izay efa nahazatra antsika.

Ahoana nefa raha mampanalavitra antsika sy ny mpifanolo-bodirindrina amintsika ny fomba fiasa tranainintsika? Ahoana raha miteny amin'ny fiteny tsy azon'izy ireo isika? Ahoana raha ohatra raisin'ny olona ho tsy mivaona amin'ny mahazatra ny olona isika, nefa rehefa nifandray tamin'ny tena izao tontolo izao isika dia lasa voaray tsara mihoatra noho ny taloha ny fahamarinana izay inoantsika?

Mety midika izany fa ny fanompoam-pivavahantsika Sabata maraina na ny asa fitoriana am-piangonana/an-tranolay ataontsika dia

tsy tsara intsony ho fitarihana ho amin'ny finoana Advantista raha hoan'ny ankabeazan'ny vahoaka anglisy tsy mivavaka. Mety midika koa izany fa ny sehatra misy ny tarika madinika no mety ho fomba tsara indrindra ananantsika ankehitriny mba hitarihana ny namantsika tsy mpivavaka ao amin'ny fiangonana mamintsika. Inoana fa ny Fiangonana hafa any Angletera dia mahita fa ny tarika madinika dia natao ho fomba mahomby hisarihana ireo tsy mpiditra am-piangonana. Ny fihetsehana *Alpha* dia ohatra iray miavaka amin'izany. Taona vitsy lasa izay dia fiangonana an-jatony, tamin'ny alalan'ireo tarika madinika an'arivony manerana ny firenena, no nampiasa am-pahombiazana ny taranja *Alpha*³⁷ hoan'ny tarika madinika. Nandroso be ny tao amin'ny Fiangonana Trinite Masina (Holy Trinity Church), Brompton, Londre, tsy ampy folo taona lasa izay. Ny vokatry: ampolony maro tamin'ireo an'arivony tsy mpiditra am-piangonana no lasa mpianatr'i Jesosy ary inoana fa mbola ho betsaka no ho voatarika amin'ity fomba ity raha oharina amin'ny paik'ady hafa.

b)Ny fihaikana momban'ny fijoroana vavolombelona maharitra

Ny CMF (Christian Missionary Fellowship na firahalahiana misionera kristiana) dia fandaminana iray manolo-tena amin'ny fanorenana fiangonana vaovao any amin'ny firenena maro, anisan'izany i Angletera. Nandinika izy fa ela kokoa ny fizotran'ny fifandraisana eo amin'ny olona tsy Kristiana izay mora mandray tsara eto, raha oharina amin'ny firenen-kafa³⁸. Tena zava-misy io any amin'ny faritany sy ambanivohitra ary mila fotoana lava hanalana ny hevitra mibahana mialoha sy mba haneken'ny fiaraha-monina eo an-toerana ny vahiny avy amin'ny faritra hafa izay tonga ao. Ireo ihany no manaiky mandray ny fivavahana! Ny tarika madinika, na izany aza, no natao hiatrika ity fihaikana ity. Ireo no fomba idealy hananganana, hanorenana, hihazonana maharitra ny fifandraisana amin'ny tsy Advantista.

³⁷ Ny taranja *Alpha* sy ny fitaovana hafa (Eastbourne, England: Kingsway Publications)

³⁸ Dan Yarnell, "Where Do We Go From Here?" *Church Growth Digest* (Summer 1997), 8.

d)Ny fihaikana momban'ny fampifandraisana kolontsaina samihafa

Ny toerana ahitana fifangaroan-kolontsaina ao amin'ny fiaraha-monina dia mampahazo aina ny vahiny avy ao izay tonga mamonjy ny fiangonantsika. Na izany aza, rehefa manana kolontsaina tsy mitovy amin'ny ankamaroan'ireo izay monina ao amin'ny fiaraha-monina ny an'ny androtokon'ny mambran'ny fiangonana, dia lasa fihaikana fanampiny mila resena ny "sakana" ara-kolontsaina.

Rehefa miatrika ity fihaikana ity isika dia tokony hisy ny paik'ady lavitr'ezaka izay mirakitra ny hevitra momban'ny fananganana fiangonana samihafa mba hanatrarana karazan'olona maro ao anivon'ny fiaraha-monina. Tokony hisy sy hofanina hitarika ao amin'ity karazana asa fitoriana ity ireo olona manan-talenta sy afaka mampifandrayireo sakana ara-kolontsaina ary "mba ho tonga zavatra rehetra amin'ny olona rehetra" (1Kor 9:19-22). Mandritra izany fotoana izany dia lasa sehatra tsy mampatahotra ny tarika madinika raha oharina amin'ny trano fiangonana, ao no hihaonan'ny olona vitsivitsy avy amin'ny kolontsaina na foko samihafa mba hizarana ny Filazantsara sy hananganana tetezana mampitohy eo amin'ny fizarazarana ara-kolontsaina.

Ny tombontsoan'ny tarika madinika eo amin'ny asa fitoriana

Taona vitsivitsy lasa izay dia nitombo haingana ny isan'ny mpivavaka tsy Advantista tao amin'ity firenena ity sy tany an-toeran-kafa. Hitan'izy ireo fa ny tarika madinika no antony lehibe indrindra teo amin'ny fahombiazany. Raha arahina ny fanandraman'izy ireo dia mahazo manantena koa isika fa ny tarika madinika dia ho voaporofa ho fomba mahomby hatrany amin'ny fanohizana ny asa fitoriana izay efa

nampanandrosointsika. Eritrereto ity filazana manaraka ity ho fanazavana azy:

“ Ny programan’ny asa fitoriana izay inoana fa mila hajaina indrindra dia izay mandray ny mpihaino ho olona manana ny maha-izy azy sy manaja ny fahitsian’izy ireo; izay afaka mahita ny fari-pahalalàny; izay mamporisika amin’ny fomba maharitra, miditra lalina miaraka amin’izy ireo; izay miasa ety amin’ izao tontolo izao ho toy ny kasinga mandrafitra manontolo ny fandehanan’ny asa ataon’ny fiaraha-monina kristiana, izay vonona hampiditra ny Kristiana vaovao ho ao anatin’izany asa izany sy mandray anjara amin’ny fampandrosoana ara-panahy izany.”³⁹

Mifanaraka amin’ity fepetra takiana ity ny tarika madinika, mihoatra nohon’ny paik’ady tranainin’ny asa fitoriana. Ary raha afaka ampifandraisina amin’ireo programan’ny asa fitoriana hafa izay natao hoan’ny fiaraha-monina maoderina izy ireo (oh: fivoriana sy seminera hoan’ny daholobe izay mifanaraka amin’ny lafiny ara-koltoraly, asa fitadiavana, karazana fiangonana sy olona, sns.) dia ho voaporofa fa tsy voafetra ny tanjaky ny asa fitoriana.

Amin’ny alalan’ny tarika madinika dia tsy misy antony tsy hahatafiditra ny Advantista Mitandrana ny Andro Fahafito ho ao anatin’ny asa fitoriana. Na dia hoan’ireo mahatsiaro ny tenany ho menatra ny mizara ny finoany amin’ny hafa aza dia tsy ho ela dia hahazo toky fa hahavita izany mora foana rehefa tafiditra ho ekipan’ny tarika madinika.

Asa fitoriana amin’ny alalan’ny tarika madinika

Fanofanana ny zana-tarika

Asa fitoriana ara-pifandraisana

Oh:seminera momban’ny fanomezam-pahasoavan’ny fanahy

oh:Seminera momban’ny maha-ray aman-dreny

³⁹ Mallison, *The Small Group Leader*, 93

Atrik'asa hoan'ny fijoroana vavolombelona
Fianarana mahandro
Fanofanana ny mpitarika ny vondrona madinika
Vondrona momban'ny hain-teny

TARIKA MADINIKA FOTOTRA

Zana-tarika manao asa manokana

Zana-tarika mpanaka-davitra

Oh: Kilasin'ny batisa

Asa fitadiavana ondry

Kilasin'ny mambra vaovao

Semineran'ny apokalipsy

Antony iray mahatonga ity dia satria ny asa fitoriana voalohany ataon'ny tarika madinika dia ny mampahafantatra ny olona an'i Jesosy, manazava amin'ny teny tsotra ny dikan'ny maha-kristiana ary manampy ny Kristiana hitombo amin'ny fifandraisana Aminy. Misy ny foto-pinoana ara-Baiboly sy olana eo amin'ny fomba fiainana sasany no azo dinihina bebe kokoa any anaty zana-tarika, toy ny kilasin'ny batisa.

Ny tarika madinika sy ny tombontsoa manokan'ny asa fitoriana. Manana fomba fitoriana maro isika hanatrarana olona amin'ny asa fitoriana. Ny sasany efa nandramana tsara, ny sasany mbola vaovao sy andramana. Afaka mitana toerana lehibe, raha ohatra tsy amin'izy rehetra, ny tarika madinka. Eritrereto ireto ohatra manaraka ireto:

- **Fiangonan'ny asa mahafaobe manangana tetik'asa.** Ho famaliana ny antson'i Tompo hanao ny asany (Matio 28:19) sy ny famaritan'i Jaona ny fitoriana farany ny Filazantsara (Apokalipsy 14:6), ny Advantista dia manana tanjona goavana ny hanangana fiangonana vaovao isaky ny tanàna na tanàn-dehibe sy eo anivon'ireo vondron'olona izay mbola tsy ahitana fiangonana. Any amin'ny firenena toa an'i Angletera dia fihaikana goavana izany, indrindra

raha jerena ny fanandramana tamin'ny lasa ny amin'ny fananganana fiangonana.

Maro amin'ireo fiangonana any Angletera no mbola tsy nitombo lehibe kokoa raha oharina tamin'ny fotoana taloha izay nanorenana azy. Kely no niantombohany ary nijanona ho kely foana hatramin'izay. Vokatry ny fivoriam-bavaka tany anaty trano madinika, Sampana Sekoly Sabata na asa fitoriana hoan'ny daholobe, ny ankamaroan'izy ireny. Ny ankamaroany, raha tsy izy rehetra, dia natomboka ny fanompoam-pivavahana Sabata (izany hoe Sekoly Sabata sy fanompoam-pivavahana) raha vantany vao misy olona vitsivitsy maniry ny hiara-hivory eo amin'ny toerana anaovana asa fitoriana. Atomboka ny fanompoam-pivavahana Sabata rehefa aoriana kelin'ny ampianarana ny lohahevitra momba izany. Mety tsy ity angamba no paik'ady tsara indrindra raha oharina tamin'ny nisy taloha. Mety hiseho ny hoe ny fahakelezan'ireo zana-piangonana ireo no nametra ny fitomboan'izy ireo amin'ny hoavy.

Toa voamarina izany noho ny amin'ireo matihanina amin'ny fananganana fiangonana izay mamporisika ankehitriny fa tokony hotohizana ny fivoriana hafa miendrika asa fitoriana mandram-pahafeno ho dimy amby fitopolo hatramin'ny zato ny isan'ny olona mba hananganana antoko mpiara-mivavaka. Aorian'izay no tokony hatomboka ny fitohizan'ny fanompoam-pivavahana⁴⁰. Misy antony roa ao ambadik'izay eritreritra izay:

- i. Fanompoam-pivavahana Sabata natao hoan'ny besinimaro. Ny endri-piankohofana arahin'ny ankamaroan'ny fiangonana Advantista- izany hoe ny fisafidianana ny hira ao amin'ny fihirana, ny fitorian-teny, ny fifantohana amin'ny "halehibeazan'Andriamanitra", sns.- dia samy novolavolaina hoan'ny olona betsaka. Mahomby kokoa izany eo amin'ny besinimaro raha oharina

⁴⁰ oh. Robert Logan, *Beyond Church Growth* (Grand Rapids, MI: Fleming H. Revell, Division of Baker Book House, 1989)

amin'ny tarika madinika. Ny fiezahana hanao "ireo zavatra hoan'ny besinimaro" ho ao anatin'ny tarika madinika dia mety hampihena ny akony amin'ny ankapobeny eo amin'ny isambatan'olona ao amin'ny tarika madinika. Raha mbola tsy zatra ny tarika ireo olona ireo (oh: raha izay izy vao namangy na liana), dia mety tsy hanentana azy tsara ny fanandramana ny amin'ny fiankohofana na tsy nahafa-po ary tsy hiverina intsony izy ireo- na eo aza ny mety ho hafanan'ny fifankatiavana.

- ii. Natao kokoa hoan'ny mpino fa tsy hoan'ny tsy mpino ny fanompoam-pivavahana fiankohofan'ny fiangonana. Vokatr'izany dia mahatsiaro ho mahazo aina ny mambran'ny fiangonana satria efa mahazatra azy ireo ny zava-drehetra ary mahatsiaro ho anisan'ny fianakaviana izy. Na izany aza dia mety hisy akony mifanohitra amin'izay eo amin'ny tsy mambra, indrindra fa ny tsy kristiana, ireo zavatra izay mampahazo aina ny mambra ireo. Mety hatahotra ireo vahiny ao amin'ny fiangonantsika satria mahatsiaro ho tsy mitovy amin'ny olona hafa ao izy ireo. Mila "toerana" koa izy ireo- satria toerana hahafahany mitazana fotsiny aloha ka tsy mbola voatery hiaraka amin'ny besinimaro. Arakaraky ny maha-vitsy ny mpiara-mivavaka no mahasarotra ny fanamboarana toerana mety hoan'ny tsy mambra ary misy aza kivy rehefa nanatrika.

Ny paik'ady tsaratsara kokoa fananganana fiangonana amin'ny hoavy:

- Amboary ny fototry ny fiangonana vaovao amin'ny alalan'ny tarika madinika (miaraka izay mety ho fomba fijoroana vavolombelona ampahibemaso mety indrindra) mba hitomboany

ho tonga amin'ny habe ilaina, mba hahatonga ny fiaraha-mivavaka Sabata ho lasa fiangonana misy fanompoam-pivavahana mitohy hatrany.

- Atombohy ny fivoriana Sabata tahaka ny fihaonana fitoriana filazantsara, natao kokoa hoan'ny tsy mambra noho ny mambra izany mandram-pahatonga ny isan'ny mpivavaka hahatratra ny hamaroana ilaina.
- Hevero ny fanohizana hatrany ny fanompoam-pivavahana Sabata ho tahaka ny fivoriana fitoriana ny filazantsara amin'ny fotoana tsy voafetra.
- **Manangana fiangonana hoan'ny iray fiaviana vitsy an'isa.** Ho fanampin'zay efa nodinihantsika ny amin'ny fampifandraisana kolontsaina isan-karazany amin'ny ankapobeny dia ilaintsika ny mahatsiaro fa misy ireo foko vitsy an'isa ao anatin'ny fiaraha-monina lehibe izay misy antsika ary tsy mbola vitan'ny fiangonantsika ny manatratra azy ireny. Tsy isalasalana fa amin'ny ampahany dia satria misy ny sakana ara-kolontsaina sy fiteny ary ny ampahany hafa dia satria tsy mikendry manokana mba hifanojo amin'izay ilain'izy ireo ny programan'ny fiangonantsika. Ny any Londres ohatra dia betsaka ny isan'ny Sinoa, Koreana, Aziatika, Grika sy Iraniana, raha tsy hilaza afa-tsy ireo, izay tsy mifanaraka amin'ny hetsika fandratoana ataontsika.

Taona vitsivitsy lasa izay dia tafatsangana soa aman-tsara ny fiangonana Galiana sy Espaniola tao amin'izany tanàndehibe izany, tahaka ny hafa marobe maneran-tany. Fa maro amin'ny vondron'olona hafa no mbola mila tratrarina. Ahoana no ampitombointsika haingana ny fiangonan'ny iray fiaviana toy izany? Azo atao ny manafatra pastora avy any ivelany mba hiasa hoan'ny olony. Mety hahomby izany, nefa lafo. Noho izany dia tsy vahaolana izany raha hoan'ny vondron'olona isan-karazany izay tiantsika takarina.

Vahaolana ny mampiasa ny tarika madinika. Amin'ny tranga maro dia manana Advantista iray na maro isika izay avy amin'ny antokon'olona toy izany izay mamonjy fiangonana, ary ny ankabeazany amin'izy ireo dia efa mambran'ny fiangonana tamin'izy tonga tao amin'io firenena io. Afaka mandroso haingana ny fiangonan'ny iray fiaviana izay tarihin'ny pastora laika raha ohatra ka azo hofanina ao amin'ny fahaiza-mitariky ny tarika madinika izany.

- **Programa amin'ny Internet.** Amin'ny toerana sasany dia tsara ny misarika ny fahalianan'ny tarika madinika amina horonan-tsary, mialohan'ny hanasana azy ireo ao am-piangonantsika.
- **Feon'ny Faminaniana/ Sekoly fianarana Baiboly.** Amin'ny ankapobeny, ny paik'adintsika taloha dia nifototra tamin'ny fifandraisan'ny isam-batan'olona, alohan'ny hanasana azy ireo ho any am-piangonana na any amin'ny kaonferansa lehibe. Nefa rehefa lasa zatra mianatra Baiboly irery any an-tranony ny mpianatra dia betsaka no lasa tsy maharisika ny hanatrika fotoana iarahana amin'ny besinimaro (mety mahasarika ny saron-kenatra ny fianarana an-taratasy ifandefasana). Fomba iray haingana kokoa itondrana miaraka ny mpianatra mifanakaiky trano ny tarika madinika, indrindra amin'ny fianarana ny lesony.
- **Fifandraisana isan-karazany amin'ny toerana mitoka-monina.** Mety ho gaga angamba isika ny amin'ny hoe firy ny fifandraisana azon'ny fiangonana atao any amin'ny toerana mitoka-monina raha toa ka manokana fotoana isika handrindrana ireo fitaovana isan-karazany ananantsika. Ao anatin'izany:
 - Ny mambra mitoka-monina
 - Fianakaviana sy naman'ny mambra
 - Fifandraisana amin'ny alalan'ny AWR
 - Mpianatry ny Feon'ny Faminaniana

taloha

-Mpampiasa Internet

-Mambran'ny fiangonana taloha

Raha afaka manao fampianarana sy fanofanana ho azy ireo tahaka ny ataontsika amin'ny fianarana Baiboly isika, na amin'ny taratasy ifandefasana na amin'ny Internet, na ao amin'ny ambohi-pihaonana dia mety hahita mpitarika mahay hipoitra amin'ireo olona iseraserana ireo isika ho fampandrosoana ny tarika madinika na dia amin'ny toerana tsy misy ny fanaraha-mason'ny pastora aza.

Tarika madinika sy ny asa vita. Ninoantsika foana fa ny famitana ny asa fitoriana ny Filazantsara mialohan'ny fiavian'i Kristy dia hitovy tamin'ny tany am-piandohany tamin'ny andro Pentekosta, ary mbola ho be voninahitra kokoa aza. Fotoana hanaovana planina izao mba ho vory lanina ho amin'izany fijinjana tsy misy toa azy izany.

Antony iray nampahomby ny asan'ny Fanahy Masina teo amin'ny fiangonana voalohany ny rafitra mifehy ny tarika madinika izay fototra iorenan'ny fiangonan'ny Testamenta Vaovao, izay nahafahan'ny fiangonana nifantoka, nanabe sy nampivelatra haingana ny mpianatra maro hanao ny asa. Mety hisy hanontany tena hoe inona no zava-nitranga tamin'ireo mpino vaovao maro raha tsy natsangana ny tarika madinika; mety hisy koa hanontany tena hoe inona no hiseho raha mahery vaika ny asan'ny Fanahy Masina amin'zao fotoana misy antsika izao, nefa isika tsy manana rafitra mifanaraka amin'izay tiany ataontsika. Nefa mazava ho azy fa hanana isika.

Mahaliana fa i Ellen White, ao amin'ny famaritany ny vahoakan'Andriamanitra sisa mialohan'ny fanavotana azy ireo dia mampiseho fa miandry ny fiverenan'I Kristy ao anatin'ny tarika madinika⁴¹ izy ireo. Araka ny fantatsika ny amin'ny androm-pahoriana amin'izany fotoana izany dia tsy ho ao amin'ny fitantanan'asa sy ny trano fiangonana no hifantohan'ny fiainan'ny fiangonana araka ny hita ankehitriny. Fotoana izao

⁴¹ White, *Early Writings*, 282.

hampiroboroboana ny fiangonan'ny tarika madinika izay ho tafavoaka velona ao anatin'ny safotofoto.

Alaivo sary an-tsaina fotsiny...Ampy hananganana tarika madinika miisa mihoatra ny dimanjato sy roa arivo ny isan'ny Advantista Mitandrana ny Andro Fahafito any Angletera. Raha ny antsasaky ny mambrantsika fotsiny no voaofana sy tafiditra tsara ao anatin'ny dia mety hisy tarika miisa 1250 ary misy mambra eo amin'ny fito isan'isany, izay manolo-tena hizara ny finoany. Raha ny tarika tsirairay no manana mpianatra iray hoan'i Jesosy mandritran'ny taona voalohany, ary mitombo ny isan'ny tarika arakaraky ny hitomboan'ny isan'ny olona, dia mety hisy mpianatra vaovao miisa 27 000 rehefa afaka folo taona monja! Avo iray sy tapany heny ny isan'ny mambra ankehitriny izany.

Nefa ahoana raha mahazo mpianatra roa avy fa tsy iray ny tarika tsirairay? Tsy ho avo roa heny ihany ny vokatry azo fa mpianatra maro. Rehefa tapitra ny folo taona dia mety hanana mpino vaovao miisa 103 500 eo eo isika!! Ankoatr'zay dia mety hisy tarika madinika miisa 16 250 manerana ny firenena, vokatry ny fitahian'Andriamanitra izay mbola hisy fitomboana mahagaga isaky ny taona mifanesy.

Tadidio fa ny tanjona lehibe indrindra dia ny manao ho mpianatra, tsy voatery ho ny mambran'ny fiangonana ihany. Amin'ity paik'ady fitoriana ny filazantsara ity dia tsy tena olana raha tsy atao batisa sy voasoratra ao amin'ny bokim-piangonana ny olona, aorian'ny dimy herinandro nanaovana kaonferansa. Ny zava-dehibe dia efa tafiditra ao anatin'ny izy ireo, mamonjy ny fivoriam-bavaky ny tarika ary angamba ny fanompoam-pivavahana Sabata. Mitombo amin'ny fahalalana sy fanandramana miaraka an'Andriamanitra izy ireo ary mitombo ny fifandraisany eo am-pianarana ny Soratra Masina. Na ho haingana na ho ela dia ho vita batisa izy ireo. Ny tena mpianatr'i Jesosy dia ho lasa mambran'ny fiangonana amin'ny fotoanan'Andriamanitra irery ihany.

**Kely lasa lehibe tao anatin'ny roapolo taona
Matihanina iray momban'ny tarika madinika i Carl
George⁴². Inoany fa antonony ny salan'isam-
pitomboana 20% isan-taona. Midika izany fa afaka
mitombo ho roa ambiny folo ny tarika misy olona
folo. Midika koa izany fa ny mambra 50 afaka
mitombo ho
100 ao anatin'ny efa-taona
310 ao anatin'ny folo taona
770 ao anatin'ny dimy ambiny folo taona
2358 ao anatin'ny roapolo taona**

Nofy fotsiny ve izany sa vina? Mety mbola tsy nisy teo amin'ny tantaran'ny Advantista ny fitomboana toy izany. Fanampin'izay dia nianarantsika tamin'ny fanandramana fa sarotra azo sy mora votsotra ny fanahy. Izany no mampisalasala antsika amin'izany nofinofy lehibe izany. Nefa mino koa isika fa "raha tsy misy fahitana dia atondraka hanaram-po amin'izay tsy mety ny olona"(Ohabolana 29:18). Raha misy faminania na fahitana mampiseho izay tian'Andriamanitra atao amin'ny alalan'ny fiangonany, ny zava-misy dia kely ny vokatry traotra rehefa tsy misy tanjona mivelatra ao an-tsaina. Raha lehibe ny nofinofy-raha azo tanterahana- dia lehibe kokoa ny fahafaha-manatanteraka izany.

Azo atao izany! Miaraka amin'ny fitahian'Andriamanitra dia azontsika atao izany. Tena azo tratrarina foana izany. Efa nisy izany tamin'ny Andro Pentekosta. Efa miseho amin'ny tarika madiniky ny fiangonana sasany izany. Manana ny teny fikasan'ny Fanahy Masina isika fa mbola hiseho indray izany, na eo isika na tsia eo. Inona ary no andrasantsika?

⁴² George, *Prepare Your Church for the Future*, 100

Tsara mihoatra ny torintenin'ny pastora!

Misy lehilahy iray atao hoe Jack niteny tamiko: "tamin'ny ianao nitory teny ny amin'ny ampahafolony dia hoy aho tamin'ny vadiko: 'tsy hanao izany mihitsy aho! Mila ny volantsika fotsiny izy'. Avy eo dia nankany amin'ny tarika madinika misy anay izahay, ary nanomboka niresaka sy nizara fanandramana momban'ny ampahafolony izy ireo- ny amin'ny fitahiana nandraman'izy ireo hatramin'ny nanombohany nanao ampahafolony , ny amin'ny fifaliana tsapany eo amin'ny fiainany sy ny fahafantarany fa mpiara-miombon'antoka amin'Andriamanitra izy ireo amin'ny alalan'ny ampahafolony. Talohan'ny nahalalako izany dia nanao sonia aho mba ho anisan'ireo mpandao ampahafolony! Ankehitriny dia afaka miteny aho fa iray amin'ireo zava-dehibe indrindra eo amin'ny fiainako izany. Nefa ry pastora, tsy ho nanao izany mihitsy aho raha tamin'ny alalan'ny torinteninao. Nanao izany aho vokatry ny fijoroana vavolombelona tao amin'ny tarika madinika misy anay."⁴³

⁴³ Told in Galloway, *The Small Group Book*, 67.

FIZARANA FAHAFITO

Fandaminana ny tarika madinika

"Fa maty ny tena raha tsy misy fanahy , ary maty toy izany koa ny finoana, raha tsy misy asa."

(Jakoba 2:26)

Raha vakianao manontolo ity dia ho fantatrao fa ny fampandrosoana ny asan'ny tarika madinika ao amin'ny fiangonantsika dia midika ho mihoatra kokoa ny fomba fiasa ivelambelany izay ataontsika ankehitriny. Mitady fiovana ifotony isika- fialana amin'ny rafitra tranainy mankany amin'ny rafitra hafa. Ho fampahatsiahivana dia ireto misy fiovana vitsivitsy izay ho andraman'ny mambran'ny fiangonantsika:

- Fiovan'ny famaritana ny anjara asa na andraikitra ny olona sasany toa ny an'i pastora.
- Fiovan'ny anjara asan'ny mambra laika izay indraindray diso ny fiheverana fa mampitombo ny vesatra/andraikitra efa sahanin'izy ireo izany.
- Fiovan'ny endrika sy ny fomba fiasa- ohatra ny fomba atao sy ny asa atao. Mety ilaintsika ny mianatra ny fileferana kokoa mihoatra ny tamin'ny lasa, ny amin'ireo olona avy amin'ny finoana hafa, mianatra ny manatona olona any amin'ny misy azy fa tsy miandry azy ireo hanatona antsika any amin'ny misy antsika.
- Fiovan'ny rafitry ny fiangonana sy ny fenitra arahina eo amin'ny fandraisana fanapahan-kevitra. Ohatra, mety lasa tsy ilaina ny sampana sasany ao amin'ny fiangonantsika ka mety hiova ny firafitry ny mambra ao anatin'ny komitin'ny fiangonana sy ny andraikiny.

Tsy mora ny mitondra fanovana amin'ity karazany ity. Mitaky fotoana, vavaka betsaka sy fisainana malina ary drafitra izany.

Noho izany dia hijery ireo fizotran'ny fampandrosoana ny tarika madiniky ny fiangonana amin'ny sehatra roa samy hafa isika:

- a) Ao amin'ny fiangonana izay efa niorina an-taonany maro ary efa manana fomba fiasa mipetrapetraka tsara, sy
- b) Ao amin'ny fiangonana vao vao hatomboka na "haorina" any amin'ny toerana vaovao.

a) Mampandroso ireo tarika madinika ao amin'ny mpiara-mivavaka

Efa nanana fanandramana ny amin'ny tarika madinika ny ankamaroan' ny mambra Advantista, raha tsy izy rehetra, na toy inona endriny. Misy ny tsara amin'izany fanandramana izany, misy koa ny ratsy. Inoana fa samy tsy mitovy amin'ny asan'ny tarika madinika dinihantsika ato amin'ity boky ity izy ireo. Ny fahadisoana lehibe indrindra mety ataontsika dia ny mihevitra fa efa haintsika avokoa ny momban'ny tarika madinika. Amin'ny ankabeazan'ny zava-misy, dia midika ho fanombohana amin'ny zavatra kely ny fampandrosoana ny tarika madinika eo anivon'ny mpiara-mivavaka. Ary toerana tsara indrindra izany hanombohana ny asa amin'ny alalan'ireo paik'ady manaraka ireto (tsy voatery hanaraka ny tombambiny ny filaharany):

1-Mivavaha isaky ny dingana lalovana. Mety ho anisan'ny planin'Andriamanitra ny asa fanompoana ataon'ny tarika madinika, nefa mitaky fahendrena bebe kokoa, faharetana ary tanjaka mba hanatanterahana izany. Ilaina ny vavaka, indrindra fa eo amin'ny fisafidianana ny mpitarika ny vondrona sy ny fananganana ekipan'ny mpitarika. Mila ny fitarihan'Andriamanitra ny ekipa mpitarika rehefa manasa ny mambra hiditra ho ao anatiny; ary mila mivavaka ny tarika tsirairay avy mba hazava amin'izy ireo ny sitrapon'Andriamanitra ho an'ilay tarika sy ireo olona tokony asaina ho ao.

2-Ampitomboy ny fahalalanao ny amin'ny tarika madinika amin'ny alalan'ny famakiana arak'izay tratra ny boky momban'ny fahaiza-mitarika.⁴⁴ An'ny mpanoratra tsy Advantista ny ankamaroan'izy

⁴⁴ Anisan'ny azo vakiana ny: Burrill's *Revolution in the Church, Radical Disciples, and The Revolutionized Church of the 21st Century* natao hoan'ny asan'ny laika; Beckham's *The Second Reformation* fototra ara-teolojia

ireny, nefa miresaka ny amin'ny fanandramana izay azontsika angalana lesona izy ireny. (Iangaviana ianao tsy hihevitra fa tsy ilaina intsony ny mamaky hafa rehefa mamaky ity boky ity). Raha mbola tsy nanandrana niaraka tamin'ny tarika ianao dia miresaha amin'ireo izay efa nanana. Manaova "tarika andrana" miaraka amin'ny namana vitsivitsy na mpiara-miasa, raha azo atao, na midira ao anaty tarika izay tarihan'ny fiangonana hafa (Advantista na tsia).

3- Mitomboana, aza miditra any anaty tarika madinika. Tsy mety raha ny mpitarika fiangonana no mizara ny mambran'ny fiangonana ho tarika sy manome ny lisitra eny amin'ny tabilao ireo izay hiditra any amin'ny tarika hisy azy tsirairay avy. Teo amin'ny fampandrosoana ny hetsika fanovana ny fiainan'ny fiangonany dia Jesosy tenany mihitsy no:

- Nanomboka izany tamin'ny olona telo na efatra mpitondra fanovana (izay nijanona ho olona nitokisany indrindra nandritran'ny Asany)
- Nanangona vondrona mpitarika misy olona roa ambiny folo (ny tarika madinika izay Azy)
- Nanampy tamin'ny fifanohanan'ny ireo fitopolo lahy
- Nanangana vondron'ny mpivavaka misy mpino 120 izay
- Nitombo ho an'arivony taorian'ny andro Pentekosta


Mihoatra ny telo taona ny fizotran'izany. Ary inoana fa hanaraka tsara izany modely izany koa isika rehefa atomboka amin'ireo olom-bitsy izay mahay sy manana vina mitovy.

Mety misy olona mpitari-kevitra mahay isaky ny fiangonana izay mety ho mpitondra fiangonana na tsia, nefa mety hitarazoka sy ho sarotra kokoa ny fizotry ny fanovana raha tsy misy ny fanohanan'izy ireo. Voalazan'ity diagrama⁴⁵ manaraka ity fa olona roa na telo ao anatin'ny zato, ao anatin'ny sarambaben'ny mpivavaka no mety voafaritra ho "mpanetsika sy

sy ara-Baiboly ny amin'ny tarika madinika; ary Mallison's *The Small Group Leader* hofanazavana antsipiriany eo amin'ny fananganana tarika madinika ao amin'ny fiangonana eo an-toerana. Ny boky telo voalohany dia hita ao amin'ny Misiona Angletera Atsimo (PM Dept.) sy ny fivarotam-boky Advantisata ary ny roa farany hita ao amin'ny biraon'ny S.E.C. sy ny fivarotam-boky kristiana eo an-toerana.

⁴⁵ Statistikan'i Mallison ao amin'ny, *The Small Group Leader*, 90

mpanotsakotsana". Tsy tiany ny fandehan-javatra misy ankehitriny. Tian'izy ireo raha miova ny zavatra tsirairay avy. Tsy ireo no olona hangatahana hanampy anao handresy lahatra ny fiangonana hanatanteraka ny mombamomban'ny asa ataon'ny tarika madinika. Tia manova ifotony loatra izy ireo, ary na dia manana ny rariny aza izy amin'ny androtokon'ny(na amin'izy rehetra) zavatra lazainy dia tsy ho raisin'ny besinimaro am-pahamatorana izany.



Avy amin'ny sokajy faharoa- ilay 14,4% izay hiditra sy hanova haingana ao anatin'ny hetsika - no tokony ifidianana ny mpanohana sy mpandresy lahatra tsara indrindra. Malala-tsaina sy tia fandrosoana izy ireo. Mahatoky azy ireo ny ankabeazan'ny mambra.

Tadidio fa mety hahatonga fandavana mahery vaika ny fanovana- ka mety ho maro no tsy hanaiky mihitsy ny fanovana ifotony any amin'ny fiangonana sasany. Betsaka ny fiangonana efa nisy efa ela ary nampiroborobo fomba tranainy eo amin'ny fanompoam-pivavahana, vavaka, fianarana Baiboly sy amin-javatra hafa izay ataony. Mety ho raisin'ny olona sasany voakasik'izany ho fihemorana hiala amin'ny fahamarinana ilay hevitra vaovao.

Ilaintsika ny mihaino ny hevitra sy ny fihetseham-pon'ireo izay tsy mankasitraka antsika.

Antony iray mazava ny amin'ny tsy maintsy anaovana tsikelikely ny fanovana dia ny tsy maintsy hanohizana ny asa atao sy ny programa rehefa misy ny fotoana tetezamita. Antony iray faharoa ny tsy maintsy hanohizana mandritra izany vanim-potoana izany ny andraikitra ny pastora efa nahazatra hatrizay izay tsy azo hodian-tsy fantatra. Fomba iray hampiharana ny fiovana eo amin'ny sehatry ny pastora ny fanovana 20 % isan-taona mandritran'ny dimy taona ny andraikitra, araka ny toro-hevitra ato amin'ity diagrama ity.

Lasa fiangonan'ny tarika madinika: Andraikitra ny pastora

Taona 1- 80% andraikitra sahanina, 20% tarika madinika

Taona 2- 60% andraikitra sahanina, 40% tarika madinika

Taona 3- 40% andraikitra sahanina, 60% tarika madinika

Taona 5- 20% andraikitra sahanina, 80% tarika madinika

Taona 6 ary mandeha hatrany
hatrany araka ny zava-misy eo an-toerana

4- Mahazo ny fankatoavan'ny fiangonana. Ilain'ny fiangonana ny fahafaha-miady hevitra sy manaiky ny planina mba hirosoan'ny asan'ny tarika madinika. Mety miandry elaela rehefa tonga ny fotoana hanolorana azy amin'ny fomba ofisialy eo anatrehan'ny komity isan-karazany (asa ataon'ny tena manokana, tanora, Komitin'ny Loholona, Komitin'ny Fiangonana, fivoriana fitadiavam-bola sns.) sy tsy ofisialy amin'ny fotoana hafa.

5- Manampy ny hafa hanatratra ny vina. Raha natao handray fanapahan-kevitra voahevitra tsara momban'ny tarika madinika ny fiangonana dia ilainy ny mahafantatra ny zava-misy. Tena ilaina ny:

- Manisy raki-tsoratra azo vakiana hoan'ny loholon'ny fiangonana, komitin'ny fiangonana, filohan-tsampana ary ny mambra manana fahaiza-mitarika. Betsaka ny tantaram-pahombiazana hoan'ny

tarika madinika sy boky azo ananana mifanaraka amin'izany tanjona izany.

- Manaova atrik'asa momban'ny tarika madinika. Efa misy ny fitaovam-panofanana vita an-tsoratra, horonan-tsary sy raki-peo.
- Ataovy torinteny manokana ny lohahevitra tokony hotoriana mifanaraka amin'izay. Fanandramana mahaliana ny andian-tantara momban'ny fiangonana voalohany sy ny bokin'ny Asan'Apostoly, raha mamaky ny boky "The Revolutionised Church of the 21 st century"(Fiangonan'ny taon-jato faha-21 nohavaozina) ny mambran'ny fiangonana.
- Asao hizara ny fanandramany amin'ny fiangonana ireo olona izay nandray fitahiana tamin'ny alalan'ny tarika madinika
- Manaova dokam-barotra kely ny amin'ny asan'ny tarika madinika ao amin'ny filazan-draharahan'ny fiangonana ary manomàna sary tsotra nefa manaitra eo amin'ny tabilao misy filazana samihafa.
- Omany ny kilasin'ny sekoly sabata mba hiasa any anaty tarika madinika (rehefa nahazo toro-marika tsara ny mpampianatra)
- Aoka hamolavola paik'ady natokana hoan'ny tarika madinika ny ao anaty fivorian'ny komity mba hanokana fotoana lavalava hanaovana fianarana Baiboly, vavaka, fifampizarana fanandramana.

6- Fantaro ireo sehatra manokana ilaina izay azon'ny tarika madinika iasana. Mahatonga ny fiangonana handini-tena tsara koa ny atrik'asa ijerena ny fiainam-piangonana, miompana amin'ny lafiny efatra amin'ny fanabeazana, fiankohofana, fiaraha-monina sy iraka manokana. Ilaintsika ny mahalala izay zavatra nataontsika tsara sy ny tsy natao tsara, raha natao avokoa izany rehetra izany. Tokony hanao fihaikana ny fiangonana efa

niorina an-taonany maro mba hamaritra indray ny asa tokony ataony sy ny tanjona, izay ao anaty fifanarahana azo tanterahana sy manokana.

Fanontaniana fitarihana efatra hamantarana ny asa atao sy ny tanjona

1-“avy aiza isika?”, izany hoe, nahoana no natsangana ity fiangonana ity ary inona no efa vita tamin’ny lasa?

2-“Aiza isika izao?” izany hoe Karazana fiangonana inona isika? Mifankafantatra tsara ve isika? Inona no ataontsika? Tiantsika ve izao hitantsika izao?

3- “Ho aiza isika”? izany hoe “Inona no tiantsika hovitaina ao anatin’ny telo/dimy/folo taona, ary ahoana no fomba tsara indrindra hanatrarana izany?

4-Ahoana no fomba ahazoantsika izany avy amin’ny toerana misy antsika hatrany amin’ny toerana tiantsika hisy antsika? Izany hoe fiovana inona no tsy maintsy ataontsika, inona no tsy maintsy natao nefa tsy nataontsika, mba hanatanterahana ny vina?

Amin’ny alalan’ny famantarana ny sehatra manokana ahitana ny kilemantsika sy izay ilaintsika ary iatrehana fihaikana sy tanjona manokana dia afaka mijery mazava ny mambra ny amin’ny fomba hanampian’ny tarika madinika ny fiangonana ho tonga amin’ny endrika tian’Andriamanitra ananany.⁴⁶

7- Manangana komitim-pitantanan’ny tarika madinika. Hanara-maso ny fizotran’ny fampandehanana sy ny fampandrosoana rehetra momban’ny asan’ny tarika madinika hoan’ny fiangonana no ataon’ity komity ity. Olona telo hatramin’ny dimy manan-tsaina, tia mamorona sy manana vina dia ampy. Raha ny idealy dia ny pastora no tokony ho ao anatin’ny mba ho mpitarika sy mpiaramandrindra ankapobeny ity asa ity. Ny sasany kosa azo fidiana avy amin’ireo mpitarika ny fiangonana (loholona, mpitarika ny

⁴⁶ Jereo ny fanombanana ny tena nataon’ny fiangonana, Tovana D

asa ataon'ny tena manokana, mpitarika tanora sns.) ary/na mambra laika liana na havanana amin'izany.

8- Soraty ny asa atao. Raha tokony hanana hevitra mazava ny amin'ny zavatra tiany hatao ny vondrona tsirairay dia tena ilaina ireo mpitondra ny tarika sy ny komity mpitantana mba hanomana tatitra hoan'ny fiangonana eo an-toerana, izay ho atao tari-dalana feno ampiasaina amin'ny hoavy.⁴⁷

9- Manangana ekipa fanofanana ho mpitarika hoan'ny tarika madinika. Tsy tokony ho andraikitra ny vaomiera mpanendry no manao ny resaka fifidianana, fa ny komity mpitantana no tokony na:

a) mifidy mpitarika, mpitarika lefitra sy mpampiditra olona ao amin'ny ekipa tsirairay na

b) mifidy ny mpitarika fotsiny sy manasa azy ireo hifidy ny ekipan'ny fitarihan'izy ireo.

10- Atombohy amin'ny kely. Amin'ny ankabeazan'ny fiangonana dia tarika miisa telo no idealy hanombohana azy. Amin'ny fiangonan-dehibe dia azo atomboka amin'ny tarika enina ny dingana raha toa ka tarika iray dia mety ampy hoan'ny fiangonana kely.

11- Hofano ny mpitarika. Ny endri-panofanana fototra tsara indrindra momban'ny fahaiza-mitarika hoan'ny ekipan'ny tarika madinika dia azo avy ao anaty tarika izay misy azy ireo, vantany vao fantany ny fahalalana fototra ny amin'ny asa ataon'ny ao. Afaka miara-manangana tarika madinika ny ekipa telo mpitarika (ireo mpitarika, mpitarika lefitra, mpampandroso olona) sy ny pastora na mpanofana/mpandrindra ary mianatra ireo fototry ny hetsiky ny vondrona madinika amin'ny alalan'ny fifandimbiasan'andraikitra, ao anatin'ny enina ka hatramin'ny valo herinandro. Na dia ekipa mpitarika iray monja aza no anombohana azy dia atsangano ny tarika kely iray misy olona telo na efatra fanampiny ary makà lesona amin'ny andrana sy ny fahadisoana rehefa manao fandalinana miaraka amin'ny boky.

⁴⁷ Jereo ny santionan'ny tatitry ny asa ao amin'ny pejy

Nefa tadidio fa mitovy amin'ny dingana fanofanana ho pastora ny famolavolana ireo ho mpitondra ny tarika madinika- misy foana ny toerana hoan'ny fanatsarana sy ny fitomboana. Tokony atao foana ny fanofanana.⁴⁸ Any aoriana any dia tokony ho lasa pastora laika ny vondron'ny mpitarika. Ireo "mpitarika olona folo" lasa "mpitarika olona dimam-polo" na "zato" aoriana kely. Tokony hihaona amin'ireo mpitarika ny vondrona kely ny pastoran'ny fiangonana na ireo tompon'andraikitra hafa momban'ny tarika madinika hanofanana azy ireo, farafahakeliny isam-bolana, raha vantany vao mandeha ny tarika.

12- Manangàna tarika foibe misy mambra enina hatramin'ny sivy feno fanoloran-tena, nofidiana sy nantsoin'ireo mambran'ny vondrona mpitarika manokana. Tokony hisy mambran'ny fiangonana sivy, farafahabeny, ao anatin'ny tarika foibe, ao anatin'izany ny ekipan'ny mpitarika, satria farafahakeliny tsy mainsty asiana toerana hoan'ny tsy Advantista miisa telo any anaty tarika madinika.

Farafahakeliny dia tokony handany enina ka hatramin'ny valo herinandro ireo tarika foibe mba ho zatra amin'ny fiainan'ny tarika, mampitombo ny maha-izy azy ny tarika sy ny fankafizana ny asa iarahana amin'ny alalan'ny vavaka sy fianarana Baiboly-izay tian'Andriamanitra ho vitaina amin'ny alalan'ny tarika. Misy milaza fa satria "andrana" ity sehatra ity dia tokony haharitra fotoana lava ny fihaonan'ireo tarika ireo mba hanoatra nohon'ny fotoanan'ny "volatantely" sy hanandrana ny tena zava-misy marina (anisan'izany ny fifandirana) ao amin'ny tarika. Mety ho marina izany, nefa misy koa ny zava-doza ateraky fandanianana fotoana be loatra tsy iarahana amin'ireo tsy Advantista. Hanampy antsika mihoatra nohon'ny olona hafa mba hianatra izay ilaintsika fantarina izy ireo!

13- Mampahafantatra ny namana. Mialohan'ny anasan'ny mambra ny namany ho ao amin'ny tarika misy azy dia tokony hitady fomba izy ireo hifankafantaran'ireo namany ireo amin'ny mambra roa,

⁴⁸ Manome lohahevitra dimampolo isa momban'ny asa sy ny fanofanana i Galloway ao amin'ny *The Small Group Book*, 94,95

farafahakeliny, ao amin'ny fiangonana. (Fanararaotra hitondrana ny mambra sy ny tsy mambra miaraka ho ao amin'ny sehatry ny tsy ara-pivavahana ny fankalazana tsingerin-taona sy fetimpianakaviana hafa. Raha manara-maso ny fianarana Baiboly ny mambra iray, ny iray na roa hafa kosa afaka manampy amin'ny famangiana.) Raha misy namana voahasa any amin'ny fivoriana voalohan'ny tarika dia inoana fa hanaiky ny fanasana izy ireo raha hitany fa efa misy olona fantany ao amin'ny tarika.

14- Manasa namana ny tarika foibe. Mitombo ny tarika madinika rehefa manasa ny tsy mambra hiaraka amin'izy ireo ny mambra. Raha ny tena izy dia tsy tokony hihoatra ny roa ambiny folo na telo ambiny folo ny isan'ny iray tarika ary tokony hisy tsy Advantista roa no idealy isan-tarika. Amin'ny ankapobeny dia tokony ho:

- Olona izay miditra am-piangonana ka mbola tsy nanolotena hoan'i Kristy na tsy mbola mambran'ny fiangonana
- Namana sy fianakaviana izay efa mifankafantatra amin'ireo mambran'ny tarika foibe tamin'ny alalan'ireo karazam-pifandraisana ara-tsosialy voafaritra tao amin'ny "13" tetsy ambony.
- Olona ao amin'ny fiaraha-monina izay efa nifandray tamin'ny fiangonana tamin'ny alalan'ireo hetsika fidirana ho mpikambana, na kaoferansa na fianarana ny Feon'ny Faminaniana, sns, na koa, ny tsara, olona izay efa nifankafantatra amin'ny mpikambana hafa ao amin'ny tarika
- Olona (kristiana na tsia) izay avy amin'ireo sokajy voalaza tetsy ambony ary fantatra ny zava-mahaliana azy sy ny ilainy, izay lohahevitra natao hojeren'ny tarika akaiky, ary olona afaka hikoroka izay azo atao miaraka amin'ny tarika manontolo.

Inoana marimarina fa tsy misy azo ampitahaina amin'ny fifaliana iainan'ny tarika rehefa manomboka miseho ny tena fiovampiainana marina vokatry ny tarika madinika misy azy ireo!

15- Tombano. Tsy misy izany hoe fiangonana hahazo ny zavatra rehetra izany dieny any am-boalohany. Amporisiho ny isambatan'olona ao amin'ny tarika mba hanombana ny fanandraman'izy ireo aorian'ny fiafaran'ny fianarana Baiboly voalohany - inona no nataony tsara, ahoana no mety hanatsarana, inona no tena nanampy sy ny tsy tena nanampy indrindra, sns. Rehefa mihamitombo isa ny ao anaty tarika madinika dia tombano amin'ny ankapobeny ny fahombiazana teo amin'ny fanatrarana tanjon'ny fiangonana. Tokony hitohy foana ny fanofanana sy ny fanombanana.⁴⁹

16- Aoka hanolo-tena hatrany hanatratra ny vina. Mora lefy ny vina, indrindra rehefa sendran'ny fanoherana, na rehefa misy zavatra maro hafa misarika ny fijery. Noho izany dia tokony hazavain'ny mpitarika matetika sy hataony mafy orina ny vinan'izy ireo, amin'ny alalan'ny vaky boky, fandinihan-tena sy vavaka ary mampahatsiahy matetika ny fiangonana ny tanjony amin'ny alalan'ny torinteny, fojoroana vavolombelona sy atrik'asa, sns.

Amin'ny maha-zava-dehibe azy dia ilain'ny mpikambana ao amin'ny tarika ny manao ho lohalarana eo amin'ny fandaharam-potoanany ny asan'ny tarika madinika mba ho lasa zana-piangonana. Aza kivy raha misy olana mitranga eny an-dàlana eny. Fantatry ny devoly ny zavatra azon'ny tarika madinika atao hoan'ny fiangonanao. Noho izany dia ataony izay hanoherana azy ireo. Tadidio nefa fa anisan'ny planin'Andriamanitra ny tarika madinika, noho izany dia natao handresy izy amin'ny farany rehefa manaraka ny toro-làlana omeny.

17- Manaova drafitra sy paik'ady hitomboana. Inoana fa tsy misy rafi-pitantanana ho fampitomboana fiangonana tsara indrindra

⁴⁹ Santionan'ny fanontaniana momban'ny fanombanana sy ny fanaovana tatitra ao amin'ny boky isan-karazany, anisan'izany ny an'i Mallison, *The Small Group Leader*, 177-179; McBride, *How to Build a Small Group Ministry*, 198; Donahue, *Leading Life-Changing Small Groups*, 137-141.

azo ampiasaina mihoatra noho ny voarafitra ao amin'ny Eksodosy toko faha-18. Nefa tsy miseho irery ny fitomboana. Raha amporisihina hanorina fisakaizana amin'ireo izay asainy ny mpikambana ao amin'ny tarika dia ilaina ny mampiditra programa mampahery ao amin'ny fandaharam-potoanan'ny fiangonana, ao anatin'izany ny:

- i. Hetsika fifankafantarana izay ifandraisan'ny fiaraha-monina voalohany amin'ny fiangonana. Mety ao anatin'izany ny antsam-panahy, horonan-tsary momban'i Jesosy, asa fitoriana antaratasy, fampirantiana, fijoroana vavolombelona an-dalam-be, programa amin'ny alalan'ny onjam-peo, programa momban'ny toro-hevitra mahaso sy asa soa isan-karazany hoan'ny fiaraha-monina, fianarana Baiboly mandritran'ny fotoana fialantsasatra, karazana dokam-barotra an-gazety, asa fampandrosoana ataon'ny ADRA, sns. Mampitombo ny fahafantaran'ny olona ny fisiansika ny hetsika fampahafantarana ary maneho sary tsara hoan'ny fiangonantsika, nefa tsy dia tena mampiditra ny olona ho ao anatin'ny asa ataontsika.
- ii. Ny hetsika fampidirana ho mpikambana dia mampifandray bebe kokoa ny olona amin'ny mambran'ny fiangonana. Mety ao anatin'izany ny fianarana mahandro, fianarana momban'ny rarintsaina (stress), fiainam-pianakaviana sy seminera hafa izay maharitra herinandro maromaro; fanompoam-pivavahana sy fomba fanaratoana olona manaraka ny toetr'andro mba hampahalalàna ny Filazantsara hoan'ireo tsy Kristiana; fianarana "Baiboly" semineran'ny Apokalipsy (hetsika fijinjana ihany koa), etc.

Ny hetsika fijinjana, hoan'ireo izay efa ao anatin'ny tarika madinika sy ireo izay mbola tsy ao anatiny, dia afaka mitarika

ho amin'ny fanapahan-kevitra. Matetika dia ireo olona tonga ao amin'ny tarika no manapa-kevitra hoan'i Kristy sy miditra ho mambran'ny fiangonana, vokatry ny fidirana ao amin'ny tarika fotsiny ihany, fa fanampian-tosika kosa ny kaoferansa hoan'ny hafa.

Ity toro-làlana ho fampandrosoana ny paik'ady fitomboana ity dia ny hahatonga ny asan'ny tarika madinika ho ivon'ny fiainan'ny fiangonana fa tsy lasa ankilabao. Midika izany fa tsy manelingelina ny fivoriana ataon'ny tarika madinika ireo programa notanisaina tetsy ambony ary tsy ho voakorontana matetika izy ireo rehefa misy hetsika maro atao.

Fandaharam-potoana azo atao hoan'ny fiangonana manomboka ny asan'ny tarika madinika

Volana 1 Zarao amin'ireo olona manan-kevitra tsara ny hevi-dehibe mahakasika ny tarika madinika

Volana 2,3 Zarao amin'ny fiangonana, amin'ny alalan'ireo komitin'ny loholona, komitin'ny fiangonana, seminera sy atrik'asa, fivoriana fiheveran-draharaha ny hevi-dehibe.

Manamboara fitaovana famakiam-boky, horonam-peo sy sary

Mifidiana mpitarika hoan'ny tarika madinika voalohany

Volana 4,5 Atsangano sy hofano amin'ny alalan'ny fanoroan-kevitra sy famolavolana ny ekipan'ny mpitarika. Mangataka fahendrena ny ekipan'ny mpitarika eo amin'ny fifidianana ny mpikambana ao amin'ny tarika foibe.

Volana 6,7 Manasa ny mambra hafa ny ekipan'ny mpitarika mba hanangana tarika foibe hafa.

Atsangano ary hofano amin'ny toro-làlana ireo tarika foibe.

Mampiasa ny hetsika ara-tsosialy ho fanararaotra ireo mpikambana ao amin'ny tarika foibe mba hampidirana ireo namany tsy Advantista ho isan'ny

mambran'ny tarika foibe hafa.

Volana 8 Manasa ireo namany tsy Advantista hiditra ho mpikambana ny mambran'ny tarika foibe

b) Fananganana tarika madinika sy zana-pianganana

Ny tarika madinika dia idealy amin'ny fananganana fianganana vaovao any amin'ny toerana mbola tsy nidirana na amin'ny antokon'olona vaovao. Ny tombontsoa lehibe amin'ny fanombohana ity paik'ady ity dia satria ho lasa fomba fiasan'ilay fianganana vaovao izany arakaraky ny handrosoany. Ary tsy hovaina intsony ny fanao mahazatra.

Mety hisy na tsy hisy Advantista hanampy ny tetik'asa toy izany eo amin'ilay toerana, nefa azo ampiasaina ny paik'ady toy ity na inona na inona toe-java-misy. Betsaka amin'ireo foto-kevitra vita drafitra tetsy ambony momban'ny fanovana miandalana ny fianganana no ampiharina koa eto amin'ity tranga iray ity. Fa ireto tondro-zotra manaraka ireto koa dia:

1-Mamantatra ny tarigetra sy ireo zavatra ilaina. Na dia natao hoan'ny tsirairay aza ny Filazantsara dia hitantsika fa tsy ho azo amin'ny fotoana sy paik'ady iray ny olona tsirairay. Samy manana izay zavatra tadiaviny sy ny ankafiziny ny olona eo amin'ny programa isan-karazany. Hahomby kokoa amin'ny fomba maharitra isika rehefa mikendry vondron'olona manokana ary manangana fianganana izay mifanaraka amin'ny zavatra ilainy.

Noho izany-moa ve isika hikendry olona efa kristiana sa olona mbola tsy mahalala an'i Kristy? Hikendry fianakaviana manan-
janaka kely na olon-dehibe, mpianatra na mpampiasa vola ve isika? Raha vantany vao manapa-kevitra ny amin'izay olona hiantefan'ny asantsika isika dia tokony hanokana fotoana hahafantarana tsara izay ilain'ilay vondron'olona. Mamaritra ny ho programan'ny tarika madinika ny fahafantarana ny filan'ny vondron'olona kendrena (ny karazan-kira ampiasaina, ny endriky fanompoam-pivavahana, sns.). Fintinin'i Robert Logan amin'ity fomba ity ny maha-zava-dehibe ity fomba fiasa ity:

*"Ny ho fahombiazan'ny fiangonan'ny taon-jato fahairaika amby roapolo sy ny manaraka izay dia ny fianarana mihaino ny olona, manangana filozofiampanompoana mifanaraka amin'ny kolontsaina ary mampifanaraka ireo paik'ady enti-miasa hifanaraka amin'ny fanovana ilaina."*⁵⁰

2-Manao ny olona ho mpianatra aloha. Manao ny olona ho mpianatra no tanjona voalohan'ny asa ataon'ny tarika madinika. Eo amin'ny sehatra manokana fananganana fiangonana dia tsy tokony ho maika loatra amin'ny "foto-pinoana". Ny tanjona eo no eo, aorian'ny finamanana, dia ny fahazoana olona maro arak'izay tratra hivory ao amin'ny tarika madinika mba hianatra Baiboly sy hanangana fifandraisana. Hanaraka ho azy ny sisa rehefa mitranga izany.

3-Atombohy amin-javatra kely. Heverina ho mora indrindra ny mamory Advantista maro avy amin'ny fiangonana samihafa mba "hanomboka fiangonana vaovao" nefa raha ny tena marina dia tsy izany velively no fomba fanombohana fiangonana vaovao-famindrana toerana ilay tranainy fotsiny izany. Ny fanafarana fiangonana efa tonga dia vonona dia midika ihany koa ho fanafarana fomba fiasa tranainy, ny filàna fanabeazana indray ary fandavana ny fanovana. Ny mambra vitsy an'isa izay manolotena ny hiala tanteraka ao amin'ny fiangonany fahiny- ary mety hifindra trano sy hiova asa- mba hanampy amin'ny fananganana fiangonana vaovao dia tsara kokoa nohon'ny manana olona maro izay te-hiverina any amin'ny fiangonana niaviany rehefa aty aoriana.

4- Ataovy mifanaraka amin'ny tokony ho izy ny fanompoampivavahana Sabata. Manana fomba tranainy isika ny amin'ny fanompoampivavahana fiankohofana rehefa Sabata, izay mety tsara amintsika amin'ny ankapobeny. Na izany aza, eo amin'ny sehatra fananganana fiangonana dia mahomby kokoa ny fanompoampivavahana Sabata raha atao endrika seminera, atrik'asa raha

⁵⁰ Robert Logan, *Beyond Church Growth* (Grand Rapids, MI: Fleming H. Revell, 1995), 74.

mbola vitsy ny isan'ny mambra, na amin'ny endrika kaonferansa raha betsaka kokoa ny isan'ny olona. Ny endriky ny fiankohofana/fiderana izay misy ny hira iarahana sy ahitana ny fandraisan'anjaran'ny mpiara-mivavaka dia tokony hanaraka ao aoriana. (Jereo ny fanazavana fanampiny momba izany ao amin'ny fizarana fahaenina ao anatin'ny "Asa mahafaobe eo amin'ny tetik'asa fananganana fiangonana.")

Ny fahaiza-mitarika

Fomba fanaonay taloha ny mandray ny fanasan'ny Tompo isaky ny Alahady voalohan'ny volana. Velarinay eo amin'ny latabatra izany ary manatona ny olona, maka ireo kasinga ilaina ary miverina eny amin'ny toerany. Ny fizotran'ny fotoana dia miankina amin'ny fahitana izay zavatra ataon'ilay olona voalohany mba hanarahan'ny sisa rehetra araka ny tokony ho izy. Mandeha tsara amin'ny fomba mahagaga ny rafitra. Na izany aza dia misy ireo trangan-javatra manokana.

Indray Alahady maraina dia nitsangana ny rehetra. Nandeha ny olona iray ary nanaraka azy ny hafa rehetra. Nampalahelo fa nankany amin'ny efitra fidiovana ilay olona voalohany. Nanaraka azy avokoa ireo olona teo amin'ny dabilio voalohany. Tany amin'ny dabilio faharoa sy fahatelo vao nifanotona avokoa ka teo vao samy nahita fa hay notarihina hankany amin'ny làlan-diso izy ireo.⁵¹

⁵¹ Galloway, *The Small Group Book*, 16.

FIZARANA FAHAVALO

Ny mpitarika ny tarika madinika

“dia toy izany no nahazoto anay, noho ny fitiavanay anareo indrindra, hanome anareo, tsy ny filazantsaran’Andriamanitra ihany, fa ny ainay koa aza, satria efa malalanay hianareo.”

(1 Tesaloniana 2:8 NIV)

Nahoana no mila mpitarika ireo tarika madinika? Mety ho fanontaniana hafahafa izany nefa indraindray dia misy ny manoro fa tsy ilaina ny manisy mpitarika ny tarika madinika- Mitarika ny tenany ny vondrona ary “mifandimby mitarika ny tsirairay”. Niresaka kisarisary an’ohatra momban’ny “vondrona tsy misy mpitarika” i Colin Marshal rehefa nampianatra momban’ny fitarihana tao amin’ny vondrona madinika iray izy. Nazavainy fa tsy misy izany fikambanana tsy misy mpitarika izany, ka tsy

anendrena mpitondra, “izay karazana fikambanana rehetra dia miteraka fomba fitarihana ho azy manokana”.⁵²

Ny “angano momban’ny tarika tsy misy lohany” dia avy amin’ny fahatahorana fa hisy ireo mpitarika izay hanjakazaka ao amin’ny tarika misy azy ary hanakana ny fifampizarana malalaka eo amin’ny samy mpikambana- izay tena zavatra natao hozarain’ny tarika madinika. Noho izany dia tena mila mpitarika voafantina sy voahofana tsara izy ireo. Raha tsy misy azy ireo dia tsy marin-toerana, tsy mahita ny lalan-kombana sy faharisihana maharitra ny tarika madinika. Ny tena ratsy aza dia ny iafaran’izy ireo ho lasa voan’ny tsindry hazo lenan’ny mpitarika!

Tadidio fa tsy zavatra natao kisendrasendra ny tarika madinika, na fivoriana Kristiana tsy misy lamina izay fihaonana tsotra anaovana hetsika samihafa; natao ho isan’ny asa fanavaozana ny fiangonana izy ireny. Fitaovana izay ahafahan’ny mambra laika (olon’Andriamanitra) ireny mba hanatanterahana ny asa izay natokan’Andriamanitra azy ireo ary ao anatin’izany fotoana izany dia lasa anisan’ny fanavaozana farany ilaina ao amin’ny fiangonana, ary raha tsy misy azy dia tsy ho vita ny asa maneran-tany. Ny tarika madinika dia afaka manampy ny fiangonana hiala eo amin’ny toerana misy antsika ka mankany amin’ny toerana tian’Andriamanitra hisy antsika. Mitaky fahaiza-mitarika izany.

Mety hisy olona eo amin’ny fiangonana Advantista any aoriana any izay tena mahasarika eo amin’ny asa fanovam-piainana, miaraka amin’ny pastora sy ny loholona, ho lasa ho mpitondra ny tarika madinika. Mety hisy ho lasa loholona sy mpitondra fiangonana ireo mpitarika ny vondrona madinika.

Ireo toetoetry ny mpitondra ny tarika madinika

Ny toetry ny mpitondra fiangonan’ny Testamenta Vaovao izay faritan’i Paoly ao amin’ny taratasiny hoan’i Timoty sy Titosy

⁵² Colin Marshall, *Growth Groups: A Training Course in How to Lead Small Groups* (Kingsford, NSW, Australia: Matthias Media, 1995), 79

(1Timoty 3:1-13; 5:17-25; Titosy 1:5-16)dia manana ireto toetoetra ilaina manaraka ireto:

- Tsy tokony ho olona vao niova fo vao haingana, fa olona efa matotra amin'ny finoana
- Tokony ho tsara laza eo amin'ny toe-piainany sy fitondran-tena toa ny an'i Kristy izy ireo
- Tokony ho tsara fanahy izy ireo
- Tokony ho tia mandray olona izy ireo
- Tokony ho mahafehy tsara ny fampianaran'I Kristy izy ireo
- Tokony ho mahay mampianatra izy ireo

Noho izany dia tokony ho sady modely sy mpampianatra , tahaka ny mpitondra fiangonana ireo mpitarika ao anatin'ny vondrona madinika.

a) Ny mpitondra ny tarika madinika amin'ny maha-modely azy.

Satria hanao ny olona ho mpianatra no tanjona voalohan'ny tarika madinika dia tokony ho mpianatra modely eo anivon'ny mpianatra hafa rehetra ny mpitarika. Iza no mendrika? Soa ihany ho antsika fa nifidy ireo mpianany voalohany roa ambiny folo avy tamin'ny olon-tsotra Jesosy, arak'izay maha-izy azy ireo. Samy nanana ny kilemany izy ireo. Ary rehefa nitombo tamin'ny maha-mpianatra izy ireo dia nirahina mba hanohy ny asa efa natombok'i Jesosy. Mamporisika ny mpianatr'i Jesosy ankehitriny izany. Amin'ny maha-modely azy dia tsy tokony hilaza sy hiseho azy ho lafatra ireo mpitondra ny tarika, fa kosa hanaiky ho mpanota novonjen'ny fahasoavan'Andriamanitra tsy manam-paharoa.

Manana ny kilemany ireo mpitarika Kristiana. Manana ady ataony ireo, ny fisalasalany, ny fahakiviany sy ny tahony. Nefa manana zavatra hafa fanampiny izy ireo, izay manampy azy hiatrika ireo zavatra ireo- izay hanampy azy ireo hanarin-tena rehefa lavo, mampijoro azy ireo eo ambonin'ny tsy fahombiazany ary mitari-dàlana ny fiainan'izy ireo na

dia eo anivon'ny fisalasalana aza. Mazava ho azy fa Jesosy izany zavatra hafa izany.

Resahiko eto izany satria ny tarika madinika dia miankina amin'ny fahombiazan'ny mpitarika tena izy. Tsy voaentana ny olona ary tsy hanaraka zavatra kisarisariny. Ny tena mpitarika dia manaiky ny fahadisoany sy ny famelan-keloka avy amin'Andriamanitra (1 Jaona 1:8,9). Samy mahafantatra ny tsirairay avy fa iaraha-manana ny olam-pahotana; mandainga isika raha mandà izany. Ny tian'ny olona hofantarina dia ny hoe: Ahoana no fomba iatrehana izany. Ilain'ny mpitarika ny mahay manoro ny lalan-kombana marina.

Noho izany dia tsy ilain' ny mpitarika ny ho tonga lafatra. Nefa araky ny voalazan'ny Baiboly hoe: “ny fitiavana manarona fahotana maro.”(1Petera 4:8). Tsy mahagaga, noho izany, raha tia olona ny mpitondra tarika madinika mahay. Mety hilaza isika fa manana fitiavana telo lehibe izy ireo eo amin'ny fiainany:

- **Tian'izy ireo Jesosy**, milamina izy ireo ao amin'ny fifandraisany Aminy ka tsy ilainy ny mampahafantatra ny tenany eo amin'ny andraikitra maha-mpitarika azy. Manana fiainana mazava, tsotra izy ireo mba hilazany izay nataony teo amin'ny fiainany.
- **Tia olona izy ireo**, ary afaka miresaka tsara. Tsy voatery hidika hoe olona misokatra be, sy hankafy ny “fiainampilanonana”izy ireo. Midika izany fa mihevitra ny hafa izy, mihevitra izay ilainy ary afaka mifandray amin'izy ireo ara-panahy, izay mikendry ny haneho ny fitiavan'Andriamanitra antsika tsy misy fepetra. Tsy mora tohina ary mahay mampifalifaly.
- **Tia ny fiangonana izy ireo**, ary mety tsy hahatsapa ny tenany ho mendrika ny hitarika izany izy ireo. Na eo aza izany dia maharisika amin'izay ijoroan'ny fiangonana izy ary vonona ny hanome izay tsara indrindra ho azy.

Zava-dehibe ny fanolorana ny tenantsika. Maniry ny hizara ny fiainany ny mpitarika ny vondrona, tahaka ny fizarana ny Filazantsara. Anisan'ny paik'ady nampiasain'i Paoly tamin'ny asa fanompoana izany ary tsy isalasalana fa antony iray nahombiazany. Ambonin'izany dia tsy maintsy "mitarika" amin'ny alalan'ny fanomezana modely ny mpitarika mba hahatonga azy ireo hanantena ny mpikambana ao amin'ny tarika handray anjara sy hifandray. Raha tiany ny ho mpampahery tokony ho azo antsoina, misokatra, marina sy tsara toetra izy ireo. Tahaka ny voafaritra ao amin'ny fizarana fahaefatra ato amin'ity boky ity dia ilain'ny mpitarika ny ho "modely" maneho ireo soa toavina ireo.

Iray amin'ireo sehatra mampidi-doza eo amin'ny fitarihana ny tarika madinika ity. Indrindra fa mandritran'ireo fivoriana voalohandohan'ny tarika iray izay mety misy mambra ao tsy tia milaza betsaka ny momban'ny tenany. Raha misy olona iray (oh: ny mpitarika) mizara ny fanandramany manokana, ka na dia misy sasany aza vonona ny hanao tahaka izay koa, dia hanaraka tahaka izay koa ny endriky ny hetsika manaraka.

b) Ny mpitarika ny vondrona amin'ny maha-mpampianatra.

Mahafaoka fahaiza-manao roa ny fampianarana mahomby ao amin'ny sehatry ny tarika madinika

Fahalalana. Tsy voatery hahay ny valiny rehetra ny mpitondra ny tarika madinika ary tokony tsy hiseho hahay izany izy. Amin'ny maha-mpampianatra azy ireo dia mpianatra koa izy, maniry ny hianatra amin'ireo olon-kafa ao anaty tarika ary mamporisika ny fandraisan'anjara betsaka arak'izay tratra. Arak'izay efa hitantsika dia mahazo toerana ny fianarana tsara indrindra hoan'ny tarika rehefa mifampizara ny fanontaniana, ny fahalalany sy ny fanandramany ny mpikambana tsirairay ao amin'ny tarika.

Na izany aza dia tsy maintsy mahay Soratra Masina tsara, ny lâlana nizorany, ny firafiny, ny fampianarana fototra sy ireo lohahevitra goavana ao ny mpitarika. Ny tena marina dia

fahalalana izay lohahevitra mahaliana sy mampiaiky ao amin'ny Baiboly no mahatonga ny fianarana azy, indrindra fa hoan'ny tarika. Zavatra iray ny miaro ireo foto-pinoantsika fito amby roapolo ao amin'ny Baiboly; ary zavatra hafa koa ny milaza ny Soratra Masina eo anatrehan'ny fitaka, mampifandrindra ny fampianarana toy ny piozilan'Andriamanitra izay feno kisarisary miparitaka ary mampifanaraka izany amin'ny fihaikana goavana kokoa amin'ny fahalalana ny marina momba an'Andriamanitra sy milaza ny Aminy manokana.

Fifandraisana. Mety handeha ho azy ny fitenenana fa miankina betsaka amin'ny fahaizana mifandray ananan'ny mpitarika no hahazany mampianatra. Nefa mbola misy mihoatra noho izany. Na dia mampianatra amin'ny alalan'ny ady hevitra aza izy ireo, ny mpitarika dia tsy maintsy mahay mitantana ny tarika ao anatin'ny olana miseho ka manao izay hisian'ny fandravonana marina. Ny fifandraisana dia sady mizara ny vaovao ilaina no manangana tetezana mba hahafahan'ny hafa mandray sy misaina izany vaovao izany. Amin'ny fiteny mahazatra, araka ny voalazan'i Colin Marshal, *“Raha toa ka mahazo tsara izay lazaintsika ny olona dia miankina betsaka amin'ny fomba fijeriny antsika sy ny eritreriny momba antsika izany. Ny hevitra mibahana mialoha, ny fironan'ny saina ary ny*

Ny hafatra dia...

*toetra dia samy miasa toy ny sivana eo amin'ny fifandraisana sy manova ny hafatra alefa sy voaray.*⁵³

Ny fifandraisana, araka ny hita eo amin'ny diagrama ⁵⁴etsy ambony, dia mihoatra nohon'ny teny. Izay lazaintsika dia tsy manan-danja firy raha oharina amin'ny fomba ilazantsika azy. Ny hafatra avoakan'ny fihetsika- ny hafatra entin'ny tarehy, ny fihetsiky ny maso, ny fironana mankany aloha sy aoriana, sns.- dia mbola manan-danja kokoa. Fa ny hoe iza isika no tena sarobidy indrindra amin'ny fiteny rehetra ka mampahafantatra ny tenantsika miaraka amin'ny toetra, teny sy ny fihetsika.

Manangana sakana ara-pifandraisana isika rehefa mody asehontsika ny toetra izay tsy tena maha-izy antsika ary mametraka ny tenantsika ho ambony noho ny hafa eo amin'ny manodidina antsika. Amin'ny lafiny hafa dia manangana tetezana isika rehefa manokana fotoana hianarana sy ampiasana anaran'olona, hevero ny fiainan'izy ireo ivelan'ny fivorian'ny tarika, omeo azy ireo ny fahatsapana fa manan-danja amintsika izy ireo, miresaha amin'izy ireo mandritran'ny fisakafoana ary aseho azy fa "izay hitany amintsika no tena maha-izy antsika". Ny tena zava-dehibe momban'ny toro-hevitry'i Paoly momban'ny mpitarika dia nataony eo akaikin'ny "mpandefitra sy lian'ady" ny hoe "mahay mampianatra". (1 Timoty 3:2,3). Tsy manery ny olona handray anjara ny mpitarika ny tarika madinika, fa mitaona azy ireo moramora.

Ny famaritana ireo asa ataon'ny mpitarika ny tarika madinika.

Ambonin'ny andraikitry ny modely sy ny mpampianatra, ny mpitarika eo anivon'ny vondrona kely dia matetika manana ireto andraikitra manokana ireto:

- a) Mihevitry ireo tanjona ankapobenin'ny tarika, ny fandaharam-potoana sy ny fitomboany ao amin'ny fitiavana sy ny firaisana.
- b) Mitarika amin'ny fianarana Baiboly ary mizara foana izany amin'ny hafa

⁵³ ibid, 79.

⁵⁴ Mallison, *The Small Group Leader*, 77

d) Mamantatra ireo fahaiza-manao sy ny talentan'ny hafa ary mitady ny fomba ampiasana azy ao amin'ny asa'ny tarika

e) Mandamina ny ady ao anatin'ny tarika

f) Mampitombo ny fahalalana eo amin'ny haavo ara-panahy misy eo amin'ny mambran'ny tarika tsirairay, na kristiana na tsia ary mitady ny hanamorana ny fitomboana

g) Miasa eo ambanin'ny fanaraha-mason'ny pastora sy ny hafa mba handinihana ny olana ivelan'ny sehatry ny tarika

h) Mampahafantra ny tanjona sy ny vinan'ny tarika any amin'ny fiangonana ary ny an'ny fiangonana mankany amin'ny tarika raha ilaina.

i) Mampahatsiaro hatrany ny tanjon'ny fitomboana ao an-tsain'ny mambra na mamindra izany andraikitra izany amin'olon-kafa

j) Manofana mpitarika mpanampy mba ho vonona hitondra ny tarika vaovao

k) Miara-miasa amin'ny **mpampiditra olona** ho toy ny ekipa iray. Tokony ho olona mahay maneho fikarakarana marina ny hafa izany olona izany ary mahay manao izay ahatamana ny olona. Tompon'andraikitra amin'ny iray na maromaro amin'ireto voalaza manaraka ireto izy, arakaraky ny fahaiza-manaony sy ny fotoana ananany (tokony omena ny mpikambana hafa ao amin'ny tarika ny andraikitra tsy ataon'ny mpampiditra olona, ary tsy ataon'ny mpitariky ny vondrona):

- Fandraisana ny mambran'ny tarika
- Mitarika ny "fanentanana " na ny fotoana fifampizarana
- Ny resaka vavaka ao amin'ny tarika
- Ny fitandremana ankapobeny ny mambra

Mafana loatra raha vimbinina? Nolazaina avokoa izany rehetra izany eo amin'ny resaka toetra sy andraikitra mba tsy hahamora kivy ny mpitarika. Ny mampahery dia ny hoe samy mahatsapa toy izany avokoa ireo rehetra izay antsoin'Andriamanitra hitarika! Tokony hotsaroantsika fa ny fampandrosoana ny asan'ny tarika

madinika dia miompana avokoa amin'ny fanokafana ny asa hoan'ny olon-tsotra "kristiana". Ary tian'Andriamanitra ny mandray ny zavatra tsotra sy manao zava-mahagaga miaraka amin'izy ireny.

Toy ny fianakaviana

Iray tamin'ireo mpianatra valo i Sheila, izay mihaona isan-kerinandro mandritran'ny taona, amin'ny maha-tarika madinika kristiana ao amin'ny Oniversite an'izy ireo. Nandritran'ny iray tamin'ireo fivoriana voalohany ny taona manaraka an'iny dia tapa-kevitra ny hizara ny tantarany izy.

"Ilaiko ny miteny aminareo ny amin'ny zava-nisy teo amiko sy ny ray aman-dreniko, satria havako ianareo," hoy ny nanombohan'i Sheila. Rehefa nitangorona teo aminy ireo namany dia raisiny ho anadahiny sy rahavaviny ao amin'i Kristy izy ireo ankehitriny ary notohizany hoe: "Manaraka fitsaboan-tena aho efa ho herinandro vitsy izao satria tapa-kevitra aho nony farany fa hiatrika ny zava-nitranga tamiko tamin'ny fahakeliko- nanolana ahy ny raiko. Mila mihaona amin'ny ray aman-dreniko aho ary tiako ianareo raha mivavaka ho ahy."

Nipetraka teo amin'ny sezany teo afovoan-trano izy ary nivory nanodidina azy izahay .Izay teo akaikiny dia nametraka ny tanan'izy ireo teo amin'ny sorony. Ny sasany tsy nahatana ny ranomasony raha nivavaka ho azy sy ny ray amn-dreniny izy ireo. Herinandro maromaro taty aoriana, rehefa niresaka tamin'ny ray aman-dreniny tao amin'ny biraon'ny mpitsabony i Sheila, dia nivory tao amin'ny trano iray izahay mba hivavaka. Taorian'ny fotoana, rehefa tonga tao aminay i Sheila dia nitomany izy aloha. Nolazainy anay ny zava-nitranga ary nisaotra anay izy nohon'ny fanohananay azy.

Tsy hoe lasa fianakaviany ara-panahy ihany izahay fa amin'ny lafiny sasany dia manaoatra nohon'ny fianakaviana izay naha-be azy. Anisan'ny tao anatin'ny fiaraha-monina iray i Susan.⁵⁵

FIZARANA FAHASIVY

NY FIVORIAN'NY TARIKA MADINIKA

“Ary izy ireo naharitra tamin'ny fampianaran'ny Apostoly sy ny fiombonana sy ny famakiana mofo ary ny fivavahana.”(Asa 2:42)
Ny endriky ny fivoriana ataon'ny tarika madinika dia maharitra eo amin'ny ora iray na ora iray sy tapany eo, tsy tokony hisy endrika raikitra momban'ny fivorian'ny tarika madinika na dia misy tsipiriany hafa aza itovian'ny ankamaroan'ny fivoriana. Matetika no atao ao an-trano ny toeram-pivoriana, fa tsy any am-piangonana. Ao amin'ny efitra fandraisam-bahiny no tena tsara indrindra, izay misy seza ary mety misy karipetra voalamina amin'ny endrika faribolana. Misy tarika sasany tia ny mipetraka manodidina ny latabatra ao amin'ny efitrano fisakafoanana. Hatao mafana tsara sy misy rivotra ny efitrano (tsy mafana loatra na mangatsiaka be).

⁵⁵ Nalaina tamin'ny tantara nolazain'i Nina Thiel, ao amin'ny bokin'i Jimmy Long, *Small Group Leaders' Handbook*, 39,40

Rehefa tonga ny vahiny dia raisin'ny mpampiditr'olona amin'ny fomba mafana izy ireo. Aroso ny tsindrin-tsakafo raha toa ka misy olona vao tonga avy niasa na nohon'ny antony hafa dia azo omena rano fisotro mafana na mangatsiaka. Atao'ny mpampiditr'olona ny fampahafantarana an'ireo izay vao tonga manatrika, ary mampisy ny rivotra mampifankatia sy mampiala voly izany raha mbola miresaka avokoa mialohan'ny iantombohan'ny fivoriana ny olona.

Miovaova arakaraky ny tarika ny endriky ny fivoriana, nefa manaraka drafitra fototra izy rehetra, ao anatin'izany ny karazana fanafanana ny fotoana hanombohana azy, fianarana Baiboly, vavaka sy tsindrin-tsakafo. Betsaka ihany koa ny tarika no manokana fotoana hiderana sy hiankohofana amin'ny alalan'ny hira.

Amin'ny fiafaran'ny fotoana dia zaraina ny tsipiriany momban'ny fivoriana manaraka, miaraka amin'ireo hetsika hafa efa voalamin'ny tarika.

Andeha hojerentsika akaiky ny votoatin'ny fivorian'ny tarika madinika.

a)Ny fanafanana fotoana eo am-panombohana

Atomboka amin'ny folo ka hatramin'ny roapolo minitra fifampizarana ny fivoriana, ary asiana fanontaniana iray na roa efa voamana mialoha ho fanafanana ny fotoana⁵⁶, na koa asiana fizarana fanandramana nandritran'ny herinandro talohan'io. Io fotoana "famohazana" io dia tena fizaram-potoana manan-danja isaky ny fivorian'ny tarika madinika tsirairay. Ary aoka tsy ho alaim-panahy hanao maimaika ny "fianarana Baiboly" isika. Ilaina ny fanontaniana efa voamana mialoha, indrindra mandritra ireo herinandro voalohany eo amin'ny fiainan'ny tarika, satria:

- Manampy ny tsirairay hiteny izany (na dia ireo saro-kenatra indrindra aza)
- Olona mazava fo izy ireo matetika ka manampy ny tarika hiala voly

⁵⁶ Jereo ny Tovana A

- Manampy ny mambra hifankafantatra tsotsotra izy ireo
- Afaka manao fampidirana ho amin'ny lohahevitra ny fianarana Baiboly izy ireo.

Azon'ny mpampandroso olona atao ny fanafanana ny fiantombohan'ny fotoana na dia azon'ny mambra hafa atao aza izany andraikitra izany.

b)Ny Fianarana Baiboly

Mety haharitra 30-45 minitra izany (mety hihoatra raha toa ka efa nifanaiky ny hanaovana azy lava kokoa ny tarika) ary tarihan'ny lehiben'ny tarika na olona roa na mihoatra, ao anatin'ny tarika izay efa voatendry mialoha.

Betsaka ireo tari-dàlana fianarana Baiboly efa vonona izay mitaky fanomanana mafy. Saiky mahakasika ny haavo rehetra ny fianarana Baiboly, hatramin'ny fianarana fampidirana eo amin'ny fototry ny fivavahana Kristiana, ka hatramin'ny fianarana efa lalina hoan'ny tarika efa mahay. Mahakasika lohahevitra mivelatra bebe kokoa izany. Betsaka ny tari-dàlana natao hoan'ny tarika mandritran'ny fivoriana enina ka hatramin'ny valo voalohany, mba hanampiana ny mpikambana hifankahalala sy hifandray. Manampy ny olona ho zatra ny endrika sy ny hetsika fifandraisana ateraky ny fianarana Baiboly izany tari-dalana izany. Ary mamporisika azy ireny hoan'ny tarika vaovao sy ny lehibeny.

Eo am-panombohan'ny fianarana Baiboly dia tokony omena ny taratasy misy ny drafitra ny mambra tsirairay ary asiana penina sy penina hazo raha atao an-tsoratra ny valiny. (Miovaova ny tari-dàlana fianarana Baiboly nefa miankina amin'ny torohevitra ny mpitarika izany.) Amin'ny ankapobeny dia aseho manontolo ny andalan-teny ao amin'ny Baiboly. Noho izany dia tsy ampiasaina ny Baiboly ary tsy hanana olana eo amin'ny fijerena andalan-teny ireo tsy Kristiana.

Ireo tarika misafidy ny hampiasa fitaovana efa tonga dia vonona dia tokony hitandrina amin'ny tsy fahamatorana izay tsy mifanaraka amin'ny paik'ady fianarana Baiboly, na dia ny

“Baiboly ihany” aza no tsara indrindra hoan’ny mpiarika mahay sy efa manana traik’efa. Tena tsara ho amin’izany ny Baiboly “Serendipity”⁵⁷ : mikasika ny andalan-teny ao amin’ny Baiboly NIV (New International Version) izany, izay feno endripanontaniana hoan’ny tarika madinika eny amin’ny sisin’ny pejy-hatrany amin’ny Genesisy ka hatrany amin’ny Apokalipsy. Araky ny fitsipika ankapobeny dia andalan-tenin-tSoratra Masina fohy-tsy mihoatra ny toko iray- no mety kokoa noho ny lahatsoratra lava isaky ny fivorian’ny tarika. Betsaka ny toko azo ianarana mihoatra ny indray mandeha.

Tokony hanana Baiboly ny olona tsirairay. Hoan’ny tarika izay maniry ny hanana tontolo “milamina”, hoan’ny olona tsy mpiditra am-piangonana dia tokony ampiasaina ny Baiboly “a contemporary English version” (Baiboly dikan-teny Anglisy maoderina) tahaka ny “Good News Bible”(Baiboly Vaovao Mahafaly) na “New International Version”(Dikan-teny vaovao iraisam-pirenena). Tokony hividy Baiboly betsaka mitovy ho amin’izany ny fiangonana ka ny laharan’ny pejy misy ny andalan-teny no omena fa tsy ny toko sy andininy. Vao zatra mampiasa Baiboly ny tarika dia tombontsoa izany rehefa mampiasa dikan-teny isan-karazany ny mpikambana rehetra. Tsy misy olona tokony asaina mamaky mafy raha tsy azo antoka fa afaka na vonona hanao izany ilay olona.

Tokony amporisihina hanao lesona enti-mody ny mambran’ny tarika amin’ny fotoana anelanelan’ny fivoriana, raha tsy hoe efa misy ny drafitra fototra arahana. Endrika tsara anaovana ny enti-mody ny fampamakiana andalan-teny isan’andro, anelanelan’ny fivoriana. Azo angatahana hikaoka sy hizara izay hitany momban’ily ampahana andalan-teny ny rehetra.

Na inona na inona fomba fianarana Baiboly dia tokony fidian’ny tarika na tarika foibe, fa tsy ny mpitarika fotsiny, ny lohahevitra mandritran’ny fotoana voatondro. Ho fehin’izany, ny fianarana Baiboly dia tokony:

⁵⁷ *The NIV Serendipity Bible for Study Groups*, USA: Zondervan Publishing House, hita ao amin’ny fivarotamboky kristiana

- mampiray- natao mba hampiorina ny fifandraisana, fa tsy fampitana hafatra fotsiny
- mifanaraka amin'ny filàna sy ny tombontsoan'ireo mpikambana ao anaty tarika
- mitondra fihaikana sy manova fiainana
- mora tadidiana- tokony mampiasa fitaovam-pampianarana toy ny taratasy lehibe, sy fitaovana fanalehibeazan-tsary (projecteur) sns...ny mpitarika.
- Mahatonga ny tena ho tia hamorona- misy fomba maro mihoatra ny iray ny fianarana Soratra Masina

Ny karazam-panontanianana mety

Zava-dehibe tokoa ny fanontanianana tsara ho fanetsehana ny fianarana Baiboly ao amin'ny tarika madinika. Ny tena marina dia roa ihany no fanontanianana fototra ao amin'ny fianarana Baiboly mampifandray. Fanontanianana hoan'ny saina ny voalohany ary manontany hoe: *"Inona no tena ambaran'ny Baiboly?"* Ny tena fianarana Baiboly dia tsy maintsy mametraka izany fanontanianana izany. Matetika miaraka amin'ny fitaovana fianarana Baiboly isan-karazany, ny tanjona dia ny hitady ny zava-miseho marina, izay tena tian'Andriamanitra ambara tamin'izany fotoana izany, iza no niresahany azy ary nahoana.

Ny fanontanianana faharoa dia hoan'ny fo ary manontany hoe: *"Inona no ambaran'Andriamanitra amiko/amintsika amin'ny alalan'ny Soratra Masina?"* Tsy manova n'inon'inona eo amin'ny fiainantsika sy ny fifandraisantsika- amin'Andriamanitra sy amin'ny olona- ny fianarana Baiboly raha tsy ampiharintsika izany. Amin'ny alalan'ny fianarana Baiboly mampiray dia mianatra ny mametraka fanontanianana toy izao isika: *"Aiza ho aiza an'ity tantara ity no misy ahy?"*, araky ny voalazan'ity andalan-teny ity, inona no tian'Andriamanitra ho tsapako/lazaiko/ataoko eo amin'ny fifandraisako/fifandraisanay Aminy sy amin'ny samy izahay mba hitomboana?"

Mazava ho azy fa ireo fanontaniana fototra roa voalaza etsy ambony ireo dia apetraka amin'ny fomba isan-karazany. Hampiasaina koa ny fanontaniana hafa mba hisian'ny fifampiresahana sy ny ady hevitra. Ireo fanontaniana tsara ho amin'izany tanjona izany dia ireo izay:

a) Misokatra ny fiafarany, fa tsy mikatona (oh: "Inona no voafaoka ao anatin'ny hoe lasa mpianatra?" fa tsy hoe "Inona avy ireo dingana efatra tsy maintsy ataontsika mba ho tonga mpianatra?")

b) Tsy mitaona- tsy manoro ny valiny (oh: "Inona no ambaran'ity toko sy andininy ity momban'i Jesosy?" fa tsy " Jesosy dia Mesia, sa tsy izany?")

d) Tokana fa tsy maro (oh: "Nahoana no zava-dehibe ny hoe atao batisa?" fa tsy "Inona no antsoina hoe atao batisa, ahoana no maha-zava-dehibe azy ary maka lesona avy amin'ny batisan'i Jesosy ve isika?")

e) Atao tsotra fa tsy sarotra ny fanontaniana. Mety ho lalina ny fanontaniana nefa tsy voatery ho sarotra (oh: Inona no maha-diso ny fitandremana ny didy mba ho voavonjy?" fa tsy "araka ny taratasy nosoratan'i Paoly hoan'ny Galatiana dia olana ara-telojika inona no tiany aseho an'ireo kristiana tamin'ny taon-jato voalohany eo amin'ny fifandraisan'ny fanamarinana sy fanamasinana?")

Eo amin'ny ara-pifandraisana dia tsy tokony hamaly fanontaniana ny mpitarika na dia asaina mametra-panontaniana aza ny mambran'ny tarika. Ny andraikitry ny mpitarika dia ny misarika ny vondrona hitady ny fahamarinana sy mahazo fahalalana amin'ny alalan'ny fieritreretana sy ny manao fanazaran-tena. Ny fomba tsara indrindra famaliana fanontaniana na fidirana lalindalina kokoa amin'ny fanontaniana teo aloha ary mametraka iray hafa toy izao:

1) Manazava fanontaniana ("Azonao hazavaina bebe kokoa ve izany? Inona no tianao ambara amin'izany?")

- 2) Fanontaniana fanaporofoana ("Ahoana no hiheveranao fa marina izany?")
- 3) Fanontaniana mitari-dàlana ("Inona no eritreretin'ny sisa rehetra?" "Jane! Inona no hevitra momba ity?")
- 4) Fanontaniana mampieritreritra ("teboka manan-danja izany. Tianao ambara ve fa...?")

Misy boky maro momban'ny tarika madinika, toy ny tari-dàlana nosoratan'i Willow Creek, ahitana fitaovana tena tsara amin'ny fahaiza-mametraka fanontaniana.⁵⁸

d) Vavaka

Folo minitra farafahakeliny no atokana hivavahana, ary matetika atao aorian'ny fianarana Baiboly izany. Misy ny tarika sasany manao lava kokoa noho izany. Any amin'ny vondrona sasany dia hitan'ny mpitarika fa mila fotoana bebe kokoa atokana hoan'ny vavaka raha oharina amin'ny mahazatra ka lasa afohezina ny fotoana fianarana Baiboly. Any amin'ny tarika sasany kosa izay misy vahiny maro tsy Kristiana, dia mety tsy misy vavaka mihitsy mandritra ny fivoriana.

Azon'ny mpampandroso olona na ireo mpitarika hafa voatendry ny mitarika ny fotoanan'ny vavaka ao anaty tarika madinika ary misy ny tombontsoa eo amin'ny fandraisan'ny lehiben'ny vavaka an-tsoratra ny antom-bavaka sy ny valim-bavaka.

Ny vavaka ao anaty tarika madinika dia afaka manana izao endrika izao:

- i. Vavaka toy ny fifampiresahana, izay inoana fa malaza indrindra ary mifanaraka tsara amin'ny fihetsehana sy ny soa toavin'ny tarika. Tena resaka ifanaovana mihitsy izany - fifampiresahan'ny mambran'ny tarika sy Andriamanitra. Misy vavaka tokana izany ka iray ny fanombohana ary iray ny famaranana. Afaka mandray anjara fohy indray mandeha na maromaro ao anatin'izany izay te-hanao rehetra rehefa

⁵⁸ Donahue, *Leading Life-Changing Small Groups*, 112-116.

mampiditra karazam-bavaka toy ny fiankohofana, fankasitrahana, fiaiken-keloka sy fangatahana ny lehiben'ny vavaka. Faranan'ny lehiben'ny vavaka amin'ny "Amena"izany.

Ao anatin'ny vavaka fifampiresahana dia afaka mitarika hira ny mambra eny anelanelany eny. Mety hisy ny fotoana hanginana rehefa miandrindra ny fanatrehan'Andriamanitra sy ny fahafantarana ny sitrapony ny tarika. Mety haharitra minitra vitsy na lavalava kokoa ny fotoana lany amin'ity vavaka mampahazo aina ity.

- ii. Rojom-bavaka, mivavaka tsirairay ny mambra rehetra ao amin'ny tarika. Azo sorohana ny tsy fahazoan'aina misy eo amin'ireo izay tsy te-hivavaka ka toroina hevitra izany olona izany hikitika fotsiny ny olona manaraka ho marika fa afaka mitohy ny vavaka.
- iii. Vavaka an-tsoratra, izay manampy an'ireo izay taitaitra rehefa mivavaka miaraka amin'ny daholobe. Azo angatahana mba hanomana mialoha vavaka an-tsoratra ny iray tarika mba ho zava-baovao sy hanomezana endrika isan-karazany eo amin'ny fiainam-bavaky ny tarika.
- iv. Vavaka misy mamaly, izay omanina mialoha, adika ary zaraina amin'ny tarika. Amin'ity karazam-bavaka ity dia maneho fiankohofana, fiderana, fangatahana sns...ny mpitarika ary miara-mamaly amin'ny fomba mifanaraka amin'izay.
- v. Vavaka tsiroaroa na tsitelotelo izay ahafahan'ny mambran'ny tarika mifampivavaka. Mialohan'ny hanaovana izany dia aoka ho azo antoka fa mahazo aina amin'ny fivavahana miaraka amin'ny besinimaro ny tsirairay avy.
- vi. Vavaka iarahana tahaka ny vavaka nampianarin'ny Tompo, izay vakiana na tononin'ny tarika iray

manontolo. Ilaina ny vavaka tahaka izany raha toa ka manana karazany hafa izay tsy misolo toerana ireo karazany manara-penitra voalaza etsy ambony.

Toy ny voalaza teo aloha dia iray amin'ireo toetoetran'ny fivoriana ny tarika madinika ny fisiana ny seza banga. Ny mambra Kristiana dia hivavaka hatrany ny mba hitomboan'ny tarika ka Andriamanitra no hameno ny seza banga.

Ny fihetsika fidiana rehefa hivavaka, dia tokony hirindra amin'ny fiovaovana misy eo amin'ny fiainan'ny tarika madinika. Amin'ny fitsipika ankapobeny, ny vavaka atao aloha, mandritra na aorian'ny fianarana Baiboly dia tsara indrindra raha atao eo am-pipetrahana. Ny fitadiavana firaisana ety dia ety sy fifanohanana dia manampy be rehefa mifandray tanao eo am-pivavahana ny mambra. Tsy ilaina ny manery ny olona handahalika rehefa hivavaka.

Indraindray misy olona ao amin'ny tarika mangataka vavaka manokana. Amin'izay tranga izay dia tsara kokoa raha manao faribolana eo amin'ilay olona ivavahana ny hafa rehetra, sy raha ilaina izany. Afaka mikasika ny sorok'ilay olona ny roa na telo izay eo akaikiny eo. Na izany aza dia tsy maintsy atao ampitiavana ity vavaka manokana ity. Tsy ny rehetra, indrindra ny vahiny, no hahazo aina amin'izany.

d)Tsindrin-tsakafo

Matetika no aroso aorian'ny fivoriana ny tsindrin-tsakafo ary afaka mifidy ny mambra na hody na hijanona sy hiresaka. Azo atao koa ny mandroso ny sakafo alohan'ny fiantombohan'ny fivoriana, indrindra fa raha nisy mambra sasany vao avy niasa na voatery tsy maintsy tonga tara. Ny tombontsoa amin'ny alalan'ny famaranana amin'ny tsindrin-tsakafo dia mahatonga ny tarika hiala vokona tamin'ireo fotoana fianarana sy fivavahana. Na amin'ny fomba ahoana na amin'ny fomba ahoana dia zava-dehibe ny fotoanan'ny tsindrin-tsakafo mba hampahomby ny fivoarian'ny tarika madinika ary tokony ho atao amin'ny fotoana rehetra

izany. Manampy ny olona haka aina eo am-piresahana izany, ary indraindray dia manala ny sakana rehetra mety tsy hampitombo ny firaisan-kina. Noho izay antony izany dia ataon'ny tarika sasany ho fotoana ifankahalalana amin'ireo vahiny ny fivoriana voalohany, atao amin'ny alalan'ny fiaraha-misakafo arahin'ny kilalao mifanaraka amin'izany.

Teny fampitandremana: Ataovy tsotra ny sakafo. Rano fisotro mafana na mangatsiaka sy bisky dia ampy, raha tsy hoe angaha fotoana manokana.

Jereo ny ora. N'inon'inona mety ampidirina ao anatin'ny fivorian'ny tarika madinika ary na amin'ny fomba na ahoana no mety nizarana ny fotoana (vantany vao nanapa-kevitra ny ho halavan'ny fivoriana ny tarika) dia fitsipika roa no tokony arahina raha te-hitombo ny tarika:

Fitsipika voalohany: Atomboy ara-potoana

Fitsipika faharoa: Farano ara-potoana

NY TSINGERINA MISY EO AMIN'NY FIAINAN'NY TARIKA MADINIKA

Eo am-panombohana dia tokony ho azon'ny fiangonana mampandroso ny tarika madinika tsara fa ny tarika dia midika ho fiovana maharitra rehefa mitombo sy mizara izy mitondra akony eo amin'ny fiangonana ny fisiany. Ho zavatra mitohy foana ny fahombiazan'ny tarika madinika tany aloha sy ny sy ny fidiran'ny mambra ho ao anatin'ireny vondrona ireny. Tsy maharitra ny fisian'ny tarika madinika.

Voafetra ny androm-pisian'ny tarika madinika. Tahaka ny selan'ny vatana dia tsy maharitra mandrakizay ny tarika madinika. Ny zana-piangonana izay nahita traik'efa nandritran'ny taona maro dia manaiky fa ny salan'isa momban'ny androm-pisian'ny tarika madinika dia roa ambiny folo ka hatramin'ny valo ambiny folo volana. Amin'ny ankapobeny dia tsy tokony hitohy mihoatra ny roa taona ny tarika. Misy dingana efatra ny fiainan'ny tarika madinika:

Dingana voalohany: Misantatra

Mandritra ity dingana ity dia mazoto avokoa ny mambran'ny tarika, tia mianatra ary mahatoky fa mitondra fitahiana hoan'ny rehetra ny tarika. Antsoin'ny sasany ho "volatantely" izany dingana izany, ary amin'ny maha-volatantely azy dia tsy maharitra, tokony ankafizina, na dia mety tsy ho tanteraka aza ireo fikasana ireo.

Dingana Faharoa: Mitrandraka

Amin'ity dingana ity dia misy ny fiverenana amin'ny zava-misy marina- ny tontolo misy ny olona maro. Hitantsika fa olombelona ny mambran'ny tarika ary samy manana ny kilemany. "Tsy misy zavatra azo raha tsy misy fangirifiriana", hita ho manakaiky kokoa ny marina izany; hita ho asa mazana fa tsy mahafinaritra ny andraikitra sy ny fitomboana ary midika ho fanoloran-tena marina ny fiarahana mandritran'ny herinandro na volana maro. Mety hisedra fihaikana ny fahaiza-mitarika. Mety hiala ny mambra sasany ao amin'ny tarika ary hitady tarika hafa izay mifanaraka amin'ny tiany. Ekena amin'ny maha-izy azy ity dingana ity ary ilain'ny mambra ny mahafantatra fa ny tarika madinika tsy manana olana dia inoana fa tsy hisy fitomboana sy fiovana.

Dingana Fahatelo: Fandrosoana

Vao voavaha ny olana voalohany ary manaiky ny tsara sy ny ratsy ny mambran'ny tarika dia manomboka misy ny fitomboana, ka toherin'ny mpikambana amin'ny tanjany ny kilemany ary ho hitany ny talentany sy fanomezam-pahasoavana ananany izay mifanaraka amin'ny tanjony.

Ao anatin'ity dingana ity dia azon'ny mpitarika zaraina amin'ny mpikambana hafa ny andraikiny amin'ny fomba fitarihana. Mety hijery izay fomba hanampiany ny fiaraha-monina koa ny tarika, amin'ny fomba ankapobeny na mifandraika manokana amin'ny tombotsoany. Ny andraikitra ny ekipa mpitarika mandritra io vanim-potoana io dia ny manaiky fa azo atao tsara ny mampandroso sy manampy amin'ny fanatanterahana izany.

Ny dingana fandrosoana dia ny lava indrindra amin'ireo dingana efatra ireo. Midika izany fa mahery vaika kokoa ny fikatsorany fa tsy ny fitomboany, ny fitotonganana ho amin'ny fahazarana fa tsy amin'ny fihaikana mitohy. Izay no anton'ny toro-hevitry ny matihanin'ny tarika madinika izay milaza fa tokony hivory mandritran'ny fotoana fohy matetitetika ny tarika mandritra ity dingana ity ary manaraka ireo dingana fianarana Baiboly, fa tsy hoe manohy tsy misy farany ny tarika.

**Ohatra ny amin'ny dingana fianarana Baiboly hoan'ny tarika
madinika**

Dingana Voalohany: Lesona enina hananganana ny maha-izy azy ny tarika

Dingana Faharoa: Lesona enina hitadiavana ny fototry ny fivavahana kristiana

Dingana Fahatelo: Lesona enina momban'ny Filazantsaran'i Marka

Dingana fahaefatra: Lesona enina momban'ny Filazantsaran'i Marka

Dingana fahadimy: Lesona valo izay manampy sy manome fanantenana isan'andro

Dingana fahaenina: Lesona roa ambiny folo ny amin'ny fiainana any am-parany

Dingana fahafito: Lesona enina momban'ny vavaka

Dingana fahavalo: Lesona folo momban'ny fampianarana goavana ao amin'ny Baiboly

Dingana fahasivy: Lesona enina momban'ny Efesiana (momban'ny Fiangonana)

Ny vondron'ny ray aman-dreny, ohatra, dia afaka mivory mandritran'ny fotoam-pialan-tsasatry ny sekoly. Ny enina, valo na folo herinandro dia azo atokana anaovana lohahevitra ankapobeny. Ireo fotoana tsirairay ireo dia mety hahafeno roa amby enimpolo herinandro (valo ambiny folo volana) ary misy fiatoana kely eny anelanelany. Tadidio fa ny tarika no mifidy ny lohahevitra arakaraky ny androsoany; tsy ny mpitarika no

mifidy mialoha ny lohahevitra (afa-tsy amin'ireo fianarana atao voalohany izay ny ekipan'ny mpitarika no matetika mifidy izany). Ireto avy ny tombontsoa azo avy amin'ity paik'ady ity.

- Mazoto kokoa ary afaka manolo-tena ny mambra
- Afaka mandao ny tarika ny mambra amin'ny fiafaran'ny dingana iray rehefa tsy faly amin'ny tarika izy
- Misy mambra vaovao foana tonga manampy isa ny tarika rehefa manomboka fianarana vaovao. Miaro ny tarika tsy hikorontana izany rehefa lasa lalina ny fifandraisana raha tonga foana ny vahiny.

4. Dingana Fahaefatra: Fahamatorana

Marina ny filazana fa afaka manao zavatra betsaka hoan'ny mambra ao aminy ny tarika madinika fa tsy misy ankoatr'zay. Rehefa avy nandany valo ambiny folo ka hatramin'ny roapolo volana tamin'ny fianarana Baiboly mampiray ny olona maro dia fotoana ho azy ireo izao mba hifindra hanao fihaikana hafa any amin'ny tarika vaovao, izay mety misy fitomboana vaovao.

Amin'ity tontolo mirimorimo ity dia mora leo sy afa-po isika. Raha tsy manokana fotoana ho an'ny tanjona dia ho mora lefy ny faharisihantsika tany am-boalohany. Ny famaritana mialoha ny fotoana famaranana dia azo atao tanjona. Na dia tsy mitombo arak'isa sy tsy misy fiovam-po aza ny tarika, ny mambra kosa dia ho afa-po tamin'ny fijoroany sy ny fitomboany amin'ny fifankatiavany niaraka tamin'Andriamanitra. Tsy hita refesina ny tombambidin'izany fitomboana izany.

Ny ankabeazan'ny tarika, na izany aza, dia mahazo manantena zavatra azo tsapain-tànana hitranga. Ary inoana fa hotanteraka izany raha vita drafitra sy nivavahana tao anatin'ny fotoana tsy voafaritra, raha oharina amin'ny hoe tsy nisy fotoana mihitsy natokana hoan'izany. Mahazo manantena ny hitombo ny tarika maro izay nanana mambra valo tany am-piandohana, ka lasa folo hatramin'ny roa ambiny folo ao anatin'ny valo ambiny folo volana. Tsy maintsy vonona ho amin'io fotoana faratampony io ny

tarika ary hanapa-kevitra ny hamorona tarika roa vaovao, na hizara ka hamonjy tarika hafa efa misy.

Mazava ho azy fa hisy tsy hazoto ny hamarana ny fivoriam-bavaka ny sasany. Nefa azo ahenana ny ratra aterak'izany fanandramana izany raha:

- a) Ampahatsiahivina tsindraindray ny tarika fa ny amin'ny hisian'izany
- b) Raha atao fety ny fivoriana farany mba hampahatsiahivana ny zava-bita sy hisaorana an'Andriamanitra.
- d) Ampahatsiahivina ny mambran'ny tarika fa hitohy ny fifankatiavana na dia tsy hitohy aza ny tarika
- e) Hisy fivoriana afaka herinandro vitsivitsy
- f) fivoriana tsindraindray ho fifampirarian-tsoa sy fifampizarana fanandramana ary ny Sabata dia natao ho tombontsoa hampahafantarana ny mambra ny zava-bitan'Andriamanitra tamin'ny alalan'ny tarika madinika.

Avy amin'ny fomba fijery mahazatra, rehefa tonga amin'ny fetra tokony izarany sy iterahany vondrona faharoa ny tarika iray dia lasa lehibe ao ny mpitarika lefitra tao amin'ilay vondrona tany am-boalohany ary lasa mpitarika ao amin'ny vondrona vaovao ny mpitondra tao amin'ny vondrona tany am-boalohany.

Samy afaka manohy ny fivoriana ao amin'ny tokantrano iray ny tarika roa, raha ampy ny toerana, ary mampiasa efitra roa samy hafa. Afaka herinandro maromaro dia tsy tokony hisy olana ny famindrana ny antoko iray any amin'ny trano hafa.

31 Janoary 1929

Martin Van Buren

Governoran'i New York

Hoan'i Filoha Jackson:

Tandindomin-doza ny fifamoivozana an-dranomasina vokatry ny fitaterana vaovao antsoina hoe "fiaran-dalamby". Tsy maintsy miaro ny lalan'ny sambo ny governemanta federaly noho ireto antony manaraka ireto:

Voalohany. Raha soloina "fiaran-dalamby" ny fitaterana antsambo dia ho betsaka ny fahaverezan'asa. Tsy hanana foto-pivelomana ny kapiteny, mpahandro, ny mpanao hotely, ny teknisiana ary ny mpiandraikitra ny fiantsonan'ny sambo, tsy lazaina intsony ireo tantsaha maro miasa mamboly bozaka hoan'ny soavaly.

Faharoa. Hijaly ny mpanamboatra sambo, hahantra ny mpitarika kalesy sy ny mpanamboatra fitaovam-piasana.

Fahatelo. Faran'izay ilaina ny sambo ho fiarovana ny Amerika. Na dia ny ady tamin'ny Angletera aza dia ny lakandranon'i Erie no hany fitaovana nentina namatsiana izay niankinan'ny aina tamin'ny niatrehana ny ady.

Araky ny efa fantatrao tsara, Andriamatoa Filoha, ny lamasinina dia sarihana amin'ny "milina"manana hafainganam-pandeha dimy ambiny folo maily isan'ora, izay ho fanampin'ny loza mananontanina ny aina sy ny vatan'ny mpandeha, dia mitabataba izany eny an-dalany mankany ambanivohitra, mandoro ny zava-maniry, mampatahotra ny biby fiompy sy ny zaza amam-behivavy. Inoana fa Ilay mahay ny zava-drehetra

*dia tsy mankasitraka mihitsy ny hanaovan'ny olona dia lavitra amin'ny hafainganam-pandeha mahafaty toy izany.*⁵⁹

FIZARANA FAHAFOLO

NY ZAVA-MISY MARINA SY IREO FANKAHALANA AO AMIN'NY TARIKA MADINIKA

Eto amin'ny faran'ity boky, ahoana no fijerinao ny fikasana hampiditra ny tarika madinika ho ao anatin'ny fiangonana Advantista misy anao? Teo amin'ny fifampiresahana natao tamin'olona samihafa momban'ny tarika madinika dia nisy valiny isan-karazany, hatramin'ny fahazotoana amin'ny fo manontolo ka hatramin'ny fiahiahiana tanteraka. Tsy mahagaga izany.

Tsy hita isa ireo olona voatahy vokatry ny fidirany tany anaty tarika- zara raha nisy ny lasa Kristiana amin'izao fotoana izao raha tsy noho ny amin'ny finoana vaovao hitan'izy ireo tao amin'ny fivoriam-bavaka feno fitiavana sy fikarakarana Kristiana niaraka tamin'ny tarika madinika. Na izany aza dia misy olona sasany tohina tamin'ny alalan'ny fidiranay ho tao anaty tarika.

Nosoratana ity toro-làlana fohy ity mba hanazavana ny tena tarika madinika marina, ny fomba fiasany sy ny zavatra mety vitany mba hampiharina ny mambra Advantista any Angletera, raha tsy izy rehetra, ny paik'ady momban'ny tarika madinika hoan'ny fiainan'ny fiangonana ary hifaly amin'ny tombontsoa goavana azony omena.

⁵⁹ Herb Miller, ed., "Letter to President Jackson," *Net Results Magazine*, March 1991, voalaza ao amin'ny bokin'i William A. Beckham, *The Second Reformation: Reshaping the Church for the 21st Century*, p. 19

Nefa misy ireo resaka misongadina izay mila resahana sy fanontaniana mila valiana izay tsy voatery voalaza tao amin'ireo fizarana tany aloha. Andeha ary hojerentsika eto izany. Ary vao avy mijery izany isika, ny zavatra azoko lazaina dia: ny fihinanana azy no ahitana ny tsiron'ny mofo. Midira ho anisan'ny tarika madinika ary andramo! Voalohany ny mahaliana sy ny fanontaniana.

1. ***"Tsia. Tsy mila fanafody hafa mahasitrana intsony"*** Iray amin'ireo fandavana mateti-pitranga eo amin'ny fandraisana ny tarika madinika am-pahamatorana ny fanaovana azy ho vahaolana miserana ho amin'ny fihaihana atrehantsika amin'ny maha-fiangonana antsika.

Noho izany dia "Eny" sy "Tsia"no valin'izany. "Tsia" satria ny tarika madinika dia tsy mpisolo toerana ny asa mafy sy ny fanoloran-tena ary tsy manova zavatra amin'ny fomba tampoka. Betsaka amin'ny fiangonana no hitady telo taona farafahakeliny, mialohan'ny hanombohana ny tarika madinika mba hahombiazany eo amin'ny asany. Ankoatr'izay dia tsy "programa" ataon'ny tsirairay avy amin'ny fomba mitovy ny tarika madinika. Ny tarika madinika dia rafitra-maneho modely manova ny fijerintsika ny fiangonana. Izay no maha-samy hafa azy.

"Eny"koa ny valiny satria raha vao miorina sy miasa aradala ny tarika voalohany dia ho tsapan'ny tsirairay avy ao amin'ny tarika sy eo amin'ny fiangonana ny fiovana. Raha ny ankamaroan'ny mpiangona no tafiditra ao dia ho hita sy tsapa amin'ny endriny rehetra ny fiovana:- kalitaon'ny fifankatiavan'ny fiangonana, ny isan'ny vao niova fo, ny tahan'ny fihemorana, ny toetra te-ho ao anatiny, fampidirana ny tanora amin'ny asa fanompoana, sns.. Tahaka izay ny fomba niasany tamin'ny fiangonana an'arivony maneran-tany; ohatr'zay koa no azony hiasana ao amin'ny fiangonanao.

2. **"Mpisofo toerana ny Fanahy Masina izy ireo!"** Raha misy ny olana eo amin'ny fiangonana dia ny vavaka, fifadian-kanina, ny Fanahy Masina no vahaolana amin'izany- Tsy misy mahasolo toerana ny hery sy ny fanatrehan'Andriamanitra eo amintsika. Nefa ahoana raha anisan'ny fomba ampiasainy hanakaikezany antsika sy tari-dàlana ary hery mampiasa antsika ny tarika madinika? Ahoana raha ferantsika ny Fanahy Masina amin'ny alalan'ny tsy firarahiantsika ny toro-heviny ary zara raha mampiasa ireo paik'ady izay voalaza fa tokony ampiasaina isika? Tsy misy mahasolo toerana ny Fanahy Masina ary tsy misy ihany koa afaka mahasolo ny paik'ady tsara!

Tadidio fa mitandrana ny Sabata amin'ny andro Sabotsy isika ary mamporisika ny hafa hanao toy izany satria ara-Baiboly izany ary anisan'ny planin'Andriamanitra ho antsika. Lavintsika ny maha-Sabata ny Alahady satria hitantsika ho safidin'olombelona tsy azo ekena izany. Antony mitovy amin'izay ihany koa no tokony hiverenantsika amin'ny tarika madinika: Satria ara-Baiboly, anisan'ny planin'Andriamanitra ary tsy afaka ny hahomby arak'izay azontsika atao eo amin'ny fitoriana ny Filazantsara isika raha tsy misy azy.

3. **"Maka tahaka ny fiangonana hafa isika."**Mety ho marina izany. Mety ho ara-dalàna ny hoe tokony hanao zavatra isika satria manao izany ny fiangonana sasany. Nefa ndeha hanetry tena isika amin'ity iray ity. Betsaka amin'ireo inoantsika sy ataontsika ary ny rafitry ny fiangonana misy antsika ankehitriny no tsy isika no nanomboka azy. Nalaintsika tahaka avy tamin'ny fiangonana hafa izany. Ary mbola tsy nilaza isika fa isika ihany no manana ny Fanahy Masina- Tena mino isika fa lehibe noho isika Andriamanitra ary manatanteraka ny planiny hoan'izao tontolo izao Izy amin'ny alalan'ny rafi-pandaminana tahaka ny misy antsika.

Tsy isalasalana fa manao zava-mahagaga amin'ny alalan'ny tarika madinika sy amin'ny fomba hafa ihany koa Andriamanitra. Inoantsika fa lohany isika fa tsy rambo; nefa raha afaka mianatra amin'ny hafa isika dia andeha atao izany.

4- “Ny fomba taloha no tsara indrindra!” Tiantsika ny hira tranain'ny fihirana, ny fizotran'ny fanompoam-pivavahana tranainin'ny fiangonana- sy ny rafitra tranainy. Mahazatra antsika ary ahazoantsika aina tsara izany. Noho izany dia mora tsy mahazo aina isika rehefa misy zavatra mety hanolo ny fanao nahazatra taloha.

Andeha tsy hohadinoina mihitsy fa niantomboka tamin'ny fihetsehana fanavaozana ny fiangonantsika. Raha niteny isika fahiny fa nampianatra ny fanaon-drazana fa tsy ny fahamarinana nyhafa dia andeha tsy ho tafalatsaka amin'ny fahadisoana mitovy amin'izany- dia ny afa-po ny amin'ny tenantsika nefa mandà ny Fanahy Masina rehefa miezaka ny mampanakaiky antsika amin'ny idealin'Andriamanitra izy.

Arak'izay efa nomarihantsika dia hita fa mila ovaina ny zavatra sasany eo amin'ny fomba fiasan'ny tarika. Tsy azontsika atao ny miara-mampiasa ny rafitra taloha sy ny vaovao. Afaka manao betsaka ny mambran'ny fiangonana. Ny mpahay momban'ny fitomboan'ny fiangonana, Carl George dia mino fa *“ny ankamaroan'ny olona dia afaka manana andraikitra roa sy tapany: fahaiza-mitarika eo amin'ny asa iray, fandraisan'andraikitra mavitrika amin'ny hafa ary fandraisan'anjara tsindraindray amin'ny fahatelo.”*Noho izany dia misy olona afaka manao loholona, mampianatra Sekoly Sabata ary manohana amin'ny fivoriam-bavaka. ny mangataka izany olona izany hanao zavatra hafa fanampiny kosa dia midika fa tsy hisy zavatra handeha araka ny tokony ho izy intsony.

Noho izany dia “eny”, ny tarika madinika dia midika ho fanesorana ny tranainy mba hametrahana ny vaovao. (ohatra:

ny manompo amin'ny maha-loholona mety ho afaka manompo ao amin'ny tarika madinika, ary tsy misy ankoatr'izay.) Nefa olana ve izany raha tsara noho ny taloha ny vaovao? Ary ahoana ilay tranainy raha tsy mandeha intsony toy ny nampiasana azy taloha? Tsy vao voalohany no tsy maintsy nanoloana ny divay tranainy mba hihazonana ny vaovao.

5-“Raha tsy simba izany, nahoana no amboarina?” Betsaka amin'ny zavatra ao am-piangonana no mbola mety tsara amintsika ary mety hitohy foana tsy misy fahataperany. Tsy natao hanafoana ireny ny tarika madinika. Raha toa ka mandeha tsara ao anatin'ny fotoana fohy ny asa fitoriana sy ny fijinjana, dia andeha tohizana ny fampiasana azy ireny. Raha fotoan-dehibe mahavory ny ankamaroan'ny mambra ny fivoriam-bavaka ary mitondra fiainana sy hery hoan'ny fiangonana, tazomy izany. Afaka manampy ny tanjona foana ny tarika madinika mba ho rojo mampitohy ny fanombohana(vina) sy ny farany(zava-bita) eo amin'ny sehatry ny fifankatiavana, fijoroana vavolombelona sy fiankohofana, sns.

6. “Tsy aharihariko ny lamba malotoko!” Mahatonga tahotra ny miditra ao amin'ny tarika madinika satria midika ho fampihanjahanjana ny fanahinao ary mamela ny olon-kafa hiditra amin'ny tsiambaratelon'ny fahadisoana eo amin'ny fiainanao izany. Kanefa tsy izay no izy. Mandeha ho azy toy ny misy eo amin'ny mpinamana ny fifampizarana ao anaty tarika madinika. Tsy misy fanerena an-kolaka na mivantana, fa tena faniriana ny hifanampy sy hifanohana eo amin'ny samy mambra. “Koinonia”no iantsoana azy ary faritan'ny Testamenta Vaovao matetika izany. (oh: Asa 2:42-47; 4:32-37)

7-“Ahoana ny amin'ny ankizy?” Mety betsaka ny olona tehiditra any anaty tarika madinika nefa mahatsiaro ho voasakana nohon'ny amin'ny zanany. Na izany aza dia mila fitahiana mihoatra noho isika izy ireny amin'ny alalan'ny

fidirana ao anaty tarika madinika! Ireto misy fomba vitsivitsy azon'ny tarika omena ny ankizy ao aminy:

- Asiana fivoriana ao am-piangonana amin'ny fotoana hivorian'ny ray aman-dreny amin'ny tarika madinika
- Misy tarika madinika iray mikarakara ny ankizy ao amin'ny tarika iray hafa, sy mifamadika amin'izay, mba ahafahana mivory amin'ny fotoana samy hafa.
- Raha mbola misy efitrano malalaka hafa ao amin'ilay tokantrano ivorian'ny tarika dia ampiasain'ny mambra izany mba ikarakarana ny ankizy
- Makà olona tsara sitrapo ao am-piangonana mba hitaiza
- Tafiditra ao anaty tarika ny ankizy raha mahazaka ny vokany ny tsirairay (!)

8-“Tsy zakantsika mihoatra noho ny zavatra hafa rehetra izany!” Ny vaovao tsara dia eo an-dalam-pihenana ny vola lanin'ny fiangonana amin'ny asan'ny tarika madinika. Ora hoan'ny ora, vola hoan'ny vola, hiverina ny vola ampiasaintsika amin'ny tarika madinika raha ny tombony hoan'ny fiangonana no jerena ary mihoatra noho ny mety ho fampiasam-bola ataontsika hafa izany. Ny tena izy dia tsy mila fandaniam-bola ny tarika madinika. Baiboly sy olona ihany no ilaina. Ny ankoatr'izay no ilaina ny fiangonana hampiasa volany amin'ny:

- Boky tari-dàlana vitsivitsy atao ao amin'ny toeram-pamakiam-boky
- Fitaovana fanalehibeazan-tsary (projecteur)
- Solaitra lehibe fotsy/ taratasy lehibe iray na roa
- Famatsiam-bola hoan'ny tari-dàlana fianaran'ny tarika raha ilaina (na dia betsaka amin'ny olona aza no maniry ny handoa vola rehefa mampiasa azy)

9- “Izany dia midika ho fanaovana dingana iray mianaoatra mba hanaovana dingana roa mandroso.”Inoana fa tsara izany fandinihana izany. Ny fotoana sy ny ezaka atao mba hampamokatra

tsara ny rafitry ny tarika madinika any amin'ny fiangonana maro dia midika fa tsy betsaka toy ny taloha ny fotoana sy ny hery azo natokana ho amin'ny zavatra hafa. Ny vokatr'izany dia mety hita eo amin'ny taona voalohany na faharoa izay mety nisian'ny fihenana kely teo amin'ny isan'ny batisa araka ny hitantsika. Na izany aza, ny zava-dehibe, araky ny nohazavaina tao amin'ny fizarana fahaenina ao amin'ity boky ity, dia hiakatra hatrany ary hihoatra noho izay efa nisy taloha ny batisa, manomboka amin'ny taona faharoa sy fahatelo noho miakatra. Ilaintsika ny mijery ny fotoana sy ny hery lany eo amin'ny fananganana tarika madinika. Arakaraky ny mahabetsaka ny fampiasam-bola no mahabetsaka ny vola miverina.

Tsy izany ve no tena ilaintsika eo amin'ny resaka fampitomboana ny fiangonana?

***Hitari-dàlana anao anie Andriamanitra ary
hampahomby ny fiangonany rehefa
mieritreritra zavatra goavana ianao ka mihevitra
ny tarika madinika***

TOVANA A

FANONTANIANA AZO AMPIASAINA HO FANAFANANA NY FOTOANA FANOKAFANA

- 1- Taiza ianao no nipetraka tamin'ny ianao fito ka hatramin'ny roa ambiny folo taona...ary nanahoana ny hatsiaka tamin'izany?
- 2- Ahoana no nanafananao ny tranonao tamin'izany fotoana izany?

- 3- Inona no ivon'ny hafanan'ny fiainanao nandritra izany fotoana izany? (mety ho toerana ao an-trano izany, fotoana tao anatin'ny taona na olona)
- 4- Oviana Andriamanitra no lasa olona "mafana" ho anao ary ahoana no fomba nisehoan'izany?
- 5- Inona no programan'ny fahitalavitra ankafizinao ary nahoana?
- 6- Raha tsy misy olana ara-bola ka asaina mifidy toerana iray eto amin'izao tontolo izao hitsangatsanganana mandritran'ny herinandro ianao, aiza izany toerana izany ary nahoana?
- 7- Iza no mpanoro hevitra anao voalohany indrindra eo amin'ny fiainanao ary nahoana?
- 8- Iray amin'ireo zavatra tsy tiako indrindra ny
-----.
- 9- Mety ho gaga ny olona mahita fa izaho dia-----
- 10- Manana faniriana telo ianao. Inona no zavatra irianao?
- 11- Raha lasa jamba tampoka ianao, inona no mety zavatra alahelovanao indrindra?
- 12- Inona no zavatra sahisahy indrindra efa nataonao?
Inona no nahatonga izany ho sahisahy ?
- 13- Ny fomba fandaniana fotoana tiako indrindra dia-----.
- 14- Inona no zavatra alahelovanao indrindra momban'ny fahazazanao?
- 15- Inona teo amin'ny fiainanao no mbola tianao iainana indray? Nahoana?
- 16- Inona no toerana kely indrindra nipetrahanao? Toy ny ahoana izany?
- 17- Mba ampihomehezana/ampitahorana fotsiny, alohan'ny ahafatesaka dia tiako ny-----
- 18- Amin'ny maha-mpanao dia lavitra ahy , dia ny mitsidika ny -----no tiako indrindra satria-----

- 19- Tsara kokoa amiko ny amin'ny herintaona
satria-----.
- 20- Mety ho olana ny amin'ny herintaona
satria-----.
- 21- Mety tsy -----intsony aho, nefa
hahafinaritra ihany izany raha azoko atao.

TOVANA B :

Andiana fanontaniana momban'ny fiainam-pianganana

Mba hahafahan'ny mpianakavin'ny fianganana hiasa sy hitombo miaraka dia mila sary mazava ny amin'ny fomba fahitantsika ny tenantsika isika. Iangaviana anao hamaly ireto hevitra manaraka ireto araky ny tena eritreritrao sy ny fahatsapanao marina, fa tsy hoe ahoana no tokony hamalianao azy.

_____Mpamangy

_____Mambra_____Lahy_____Vavy

_____Latsaky ny 15 taona _____16-20_____21-35_____36-50

_____Mihoatra ny 50 taona

A. FIFANKATIAVANA

1- Ny mambra eto dia:

MAFANA SY AZO ISAKAIZANA _____ MANGATSIKA SY TSY

AZO ISAKAIZANA

MIKARAKARA _____

TSY MIRAHARAH

TARIKA IRAY TSY MIVAKY _____ TARIKA

MARO "MIZARAZARA"

FALY

_____ **TSY FALY**

2- Ao amin'ny fifankatiavan'ity fiangonana ity dia hitako ao koa ny tenako araka ny asehon'ny "X"

3- Ny vahiny ao amin'ity fiangonana ity dia__a) mahatsiaro ho ekena avy hatrany

b) mahatsiaro ho ekena aorian'ny fotoana fohy

c) mahatsiaro ho ekena—— rehefa ela aty aoriana

B-FOTOAM-PIVAVAHANA

1- Ny Sekoly Sabata dia

MAHALIANA

MANKALEO

ISAN-KARAZANY

TSY MISO FIOVANY

MANARAKA NY TOETRA'ANDRO

TOETRA'ANDRO

2- Tsy manatrika Sekoly Sabata ny sasany satria

3- Ny fotoam-pivavahana fiankohofana dia matetika:

VELONA _____MATY

MAMPIAIKY_____ TSY MAMPIAIKY

MIFANARAKA AMIN'NY ILAINA _____TSY MIFANARAKA AMIN'NY ILAINA

4-Ny hira ampiasaina amin'ny fotoam-pivavahana dia

a)Tsara araka ny tokony ho izy-----

b)Tokony ho isan-karazany_____

d)Tokony asiana hira fiankohofana maoderina_____

5-Ny fandraisan'ajaran'ny mambran'ny fiangonana eo amin'ny asam-piangonana dia:

METY _____ TSY MIFANARAKA AMIN'NY ILANA AZY

6- Mety ho be mpanatrika kokoa ny fivoriam-bavaka antenantenan'ny herinandro raha

7- Karazana torinteny inona no ahazoanao tombontsoa kokoa?

andavanandro___Fanoloran-tena___Fomba
kristiana___Hafa___

fiaianana

1- Mino aho fa ny mambra tsirairay ao amin'ny fiangonana dia manana anjara eo amin'ny fijoroana ho vavolombelon'ny fiangonana, ary heveriko fa fantatro ny anjarako, Eny____Tsia____Tsy azo antoka____

a) Latsaky ny herinandro lasa____b) Latsaky ny iray volana
lasa____

3- Ny fotoana farany nanasako olona tany am-piangonana dia:

4- Teo amin'ny fizarako ny finoako dia nahatsapa aho fa:

5- Amin'ny maha-fiangonana, inona no tena ilaintsika hampitomboana ny fahombiazan'ny fijoroantsika ho vavolombelona? Alaharo manaraka ny tombambidiny ireto manaraka ireto.

b) Vavaka sy fanoloran-tena bebe kokoa _____

d) Fampahafantarana misimisy sy bebe kokoa_____

e)Fitaovana fijoroana vavolombelona bebe sy tsaratsara kokoa

f) Fiangonana maha-te hinamana sy miray hina_____

g) Fotoam-pivavahana manentana sy mifanaraka amin'ny ilaina

D. FITANTANAN'ASA

1-Manana tanjona/asa atao mitombina tsara izay fantatra sy iarahan' ny mambra rehetra ve ny Fiangonana? Eny ____
Tsia____

Tsy azo antoka____

2- Ahoana ny amin'ny fandaminana? Moa ve ny fiangonana
VOALAMINA TSARA_____MIKORONTANA

AHOANA NY AMIN'NY PASTORA?

Raha ny hevitrao, inona avy ireo laharam-pahamehan'ny pastoran'ny fiangonanao? Miangavy anao mba hanisy laharana ireto manaraka ireto araky ny lanjany.

Torinteny, fitarihana ny mambra eo amin'ny fotoam-pivavahana_____

Fahaiza-mitarika ny fiangonana sy ny fitantanana'asa (fiaraha-miasa amin'ny komitin'ny fiangonana, komity, fandaharan'asa, fandaharana ny programa)_____

Fampianarana, fanofanana, fanomezana fitaovana ny mambra eo amin'ny asa fanompoana_____

Hetsika asa fitoriana- asa fitoriana ataon'ny tena manokana/besinimaro, fianarana Baiboly, famangiana ny tsy mambra_____

Fikarakarana ara-pastoraly- famangiana ny mambran'ny fiangonana, fanoroana hevitra, famangiana ny marary, asa fanompoana ny malahelo_____

MISY TORO-HEVITRA Hafa ve?

Miangavy anao hilaza fohifohy izay eritreretinao momban'ny fiainan'ny fiangonana mba hanatsarana azy mihoatra noho ny
misy ankehitriny

TOVANA D :

NY FILAZAN'I ELLEN WHITE NY AMIN'NY TARIKA MADINIKA

"Ny fitsanganan'ny tarika madinika ho fototry ny ezaka Kristiana dia nasehon'Ilay Tokana ahy, izay tsy mety diso. Raha betsaka ny isan'ny olona ao amin'ny fiangonana, dia avelao ny mambra hanangana tarika madinika mba hiasa, tsy hoan'ny fiangonana ihany fa hoan'ny tsy mpino koa. Raha misy amin'ny toerana iray tsy misy afa-tsy roa na telo mahafantatra ny fahamarinana, dia avelao izy ireo hamorona tarika miasa. Avelao izy ireo hihazona ny fifatorany tsy ho tapaka, mivondrona ao amin'ny fitiavana sy ny firaisana, mifamporisika mba handroso ary mahazo faharisihana sy tanjaka avy amin'ny fanohanan'ny hafa. Avelao hiasa amin'ny fahari-po sy faharetana toa an'i Kristy izy ireo, tsy ho faingam-piteny, hampiasa ny fahaiza-miteny ka hifampivoatra ao amin'ny finoana masina indrindra. Avelao izy ireo hiasa toy ny fitiavan'i Kristy an'ireo izay any ivelan'ny vala, ka manadino ny tena eo amin'ny faniriana lalina ny hanampy ny hafa. Rehefa miasa sy mivavaka amin'ny anaran'I Jesosy izy ireo, dia hitombo isa izy, satria ny Mpamonjy milaza fa: " Raha misy roa aminareo mifanaiky ety ambonin'ny tany na amin'inona na amin'inona ka hangataka izany, dia ho azony avy amin'ny Raiko Izay any an-danitra izany." Matio 18:19 Testimonies Volume 7, p. 21,22

"Nisy fifohazam-panahy momban'ny asa fitoriana tao amin'ny fiangonana. Naseho ny faniriana lalina hianatra ny fomba fiasa hoan'ny Tompo. Nivory ny tarika madinika mba hivavaka sy hianatra Baiboly. Niara-niroso ny rehetra ary niaraka tamin'ny fihetsika mirindra. Ireo mpino dia nankany amin'ny toerana izay tsy nahafahan'ny olona naheno ny Tenin'Andriamanitra ary nanangona ny ankizy hanao ny Sekoly Sabata. Natao ny ezaka hanampiana ireo fianakaviana mitokamonina. Natao ny planina mba hihaonan'ireo fianakaviana ireo

amin'ny fianakaviana hafa mba hianatra Baiboly." The Indiana Reporter, 25 Febroary 1903

Avelao ny tarika madinika hivory amin'ny hariva, atoandro, na vao maraina mba hianatra Baiboly. Avelao izy hanana fotoana ivavahana mba hampahery, hanazava ary hanamasina azy amin'ny alalan'ny Fanahy Masina... Raha ny tenanao no manokatra ny varavarana mba handray izany dia hisy fitahiana goavana ho tonga amina. Hisy Anjelin'Andriamanitra ao amin'ny fivoriana. Hihinana amin'ny ravin'ny hazon'aina ianao. Inona no fijoroana vavolombelona entinao eo amin'ny fifankahazoana feno fitiavana nataona tamin'ny namana mpiara-miasa tamin'ireo fotoana sarobidy nitadiavana ny fitahian'Andriamanitra. Avelao hilaza ny fanandramany amin'ny teny tsotra ny tsirairay. Hitondra fampaherezana sy fifaliana hoan'ny fanahy izany, mihoatra noho ireo mozika mahafinaritra izay mety ampidirina ao am-piangonana. Hidiratra ao am-ponareo Kristy. Amin'ny alalan'ity fomba ity ihany no hitehirizanao ny fahitsinao." Testimonies Volume 7, p.195

"Ny Kristiana dia lehilahy sy vehivavy toa an'i Kristy, izay mavitrika amin'ny asan'Andriamanitra, manatrika ny fivoriana ara-tsosialy ary mampahery ny hafa ny fanatrehany. Tsy voafaoka ao anaty fivavahana ny asa fa ny fivavahana miasa; tsy mipetra-potsiny izany." SDA Bible Commentary, vol.7,935.

"Miara-mivory isika mba hifanatsara amin'ny alalan'ny fifanamboarana toe-tsaina sy fihetseham-po, hanambatra ny hery, hazavana ary fahazotoana mba hifankahalala fanantenana sy haingam-panahy; amin'ny alalan'ny vavaka matotra avy ao am-po, asandratra am-pinoana dia mandray famelombelomana sy hery avy amin'ny loharanon'ny tanjantsika isika... Ireo rehetra izay manara-dia an'i Kristy dia hanana fanandramana velona, vaovao ary mahaliana. Ny fanandramana velona dia miaraka amin'ny fisedrana isan'andro, ady sy fakam-panahy, ezaka matanjaka sy fandresena, fiadanana lehibe sy fifaliana azo avy amin'i Jesosy. Ny fifandraisana tsotra amin'izany

fanandramana izany dia hanome hazavana, tanjaka sy fahalalana izay hanampy ny hafa eo amin'ny firosoany amin'ny fiainana miaraka amin'Andriamanitra." Testimonies Volume 2, p.572,579.

"Ataovy kely ny torinteny ary ampitomboy ny fanabeazana amin'ny alalan'ny famakiana Baiboly sy fivavahana miaraka amin'ny fianakaviana sy ny ankizy." " Iza no ambarako amin'ireo izay miara-miasa amin'i Kristy: N'aiza n'aiza no ahafahanao manatona ny olona eo am-pitanin'afo dia araraoty izany. Raiso ny Baiboly ary sokafy eo anoloany ny fahamarinana lehibe. Tsy miankina betsaka amin'ny fahalalanao sy ny zava-bitanao ny fahombiazanao, fa amin'ny fahaizanao maka ny fony. Amin'ny alalan'ny fahaizana mifandray sy manatona akaiky ilay olona dia mety hanova haingana ny fisainany nahazatra azy ianao, mihoatra noho ny kabary tsara lahatra indrindra. Ny fampahafantarana an'i Kristy ao amin'ny fianakaviana, eo akaikin'ny afo sy ny fivoriana kely an-tokantrano dia mazàna mahomby amin'ny fandresena fanahy hoan'i Jesosy, mihoatra noho ny torinteny an-kalamanjana, eo amin'ny olona mifamezivezy na koa any amin'ny efitrano lehibe sy fiangonana." Gospel workers, p.193.

Ny asan'Andriamanitra dia atao araky ny làlany sy ny Fanahiny. Amin'ny toerana isan-karazany dia natao hanokana ny tenany, fanahiny hoan'Andriamanitra ny tarika madinika ary mifikitra amin'ny seza fiandrianan'Andriamanitra am-pinoana izay mahatonga azy hiasa am-pahazotoana sy hihazona ny fanahiny ao amin'ny fitiavana an'Andriamanitra. Ho tsapa ny hery mahavelona avy amin'ny fitiavany ary ho ekena ny maha- avy any an-danitra izany eo amin'ny asa tsaran'ny olony. Ireo vondrona madinika mahalala ny fahamarinana ireo dia tokony hanao amin'ny feo iray ny fampielezana ny asany ho any amin'ny ondry very eo amin'Israely. Ny tsirairay avy dia tokony hitady izay hanompoany ny hafa.Tsy misy na dia iray izay nanandrana ny

fahatsarana, ny famindrampo sy ny fitiavan'Andriamanitra no afa-tsiny tsy hanao ny asa hoan'ny fanahin'ny hafa." Ho lasa Misionera ny mpanara-dia an'i Kristy, Advent Review and Sabbath Herald, 8 Janoary, 1895.

"Na dia zava-baovao aza ny fivoriana ara-tsosialy dia mianatra ao amin'ny sekolin'i Kristy izy ireo ary mandresy ny tahotra sy ny hovitra. Ho asehontsika azy ireo fa ny fivoriana ara-tsosialy (mitovy amin'ny tarika madinika) dia fivoriana tsara indrindra izay ahafahan'izy ireo miofana sy beazina mba ho vavolombelona hoan'i Kristy." Manuscript 32 1894.

"Nefa amin'ny fotoana tahaka izany, toy ny lasy fivoriana isantaona, dia tsy tokony hamela fotsiny ireo tombontsoa azo atao ho fampianarana ny mpino ny amin'ny fomba fanaovana asa fivoriana any amin'ny toerana ipetrahany. Amin'ny tranganjavatra maro dia tsara raha manokana lehilahy hitondra ny vesatry ny asa fanabeazana amin'ireny fivoriana ireny. Avelao ny sasany hanampy ny olona hianatra ny fomba fampamakiana Baiboly sy ny fitarihana fivoriana an-tranokely. Avelao ny sasany hitondra ny vesatry ny fampianarana ny olona, ny fomba fampiharana ny foto-kevitra ara-pahasalamana sy fahalalana onony ary ny fomba fanomezana fitsaboana hoan'ny marary. Mbola misy koa ny mety miasa ho tombontsoan'ny pejy voasoratra sy asa fanaovam-boky." Testimonies for the Church , Vol.9, p.82,83.

"Nahoana ny mpino no tsy mahatsapa sy tsy matotra eo amin'ny fiheverana ny hafa izay ivelan'i Kristy? Nahoana no tsy mivory ny roa na telo mba hitalaho amin'Andriamanitra hamonjeny olona iray manokana sy ny hafa koa? Aoka hitsangana ny vondrona ao amin'ny fiangonantsika mba hofanina ho amin'ny asa. Aoka ny tsirairay avy hiara-hiasa ho mpanarato olona. Aoka izy ireo hitady izay hanangonana fanahy hiala amin'ny fahalovan'izao tontolo izao ka hiditra ao amin'ny fahadiovan'ny fitiavan'Andriamanitra." Testimonies, vol.7,21.

"Hitako ireo olo-masina mandao ny tanàn-dehibe sy ny tanàna, miombona ao anaty vondrona ary mipetraka any amin'ny toerana

faran'izay mitokana. Mamatsy sakafo sy rano azy ireo ny anjely, ny ratsy fanahy kosa mijaly amin'ny hanoanana sy ny hetaheta." Early Writings, p.282.

TOVANA E :

SANTIONANY AMIN'NY FIFANEKENA MISY EO AMIN'NY TARIKA

Ny tarika madinika dia manome tombontsoa antsika hivelatra amin'ny fifandraisana, ny fifankatiavana izay ilaina ao amin'ny tenan'i Kristy. Azo tanterahana izany, miaraka amin'ny fanampian'Andriamanitra, amin'ny alalan'ny fanoloran-tenantsika manokana sy ny fifanoloran-tena, ny fifankatiavana marina ara-Baiboly. Mba hanampiana antsika amin'ny maha-mambran'ny tarika antsika eo amin'ny fanatrarana ny tanjona fifankafantarana, fitiavana, fikarakarana, andraikitra hoan'Andriamanitra ary hitarihana hifanolo-tena toy ny mpirahalaha sy mpirahavavy ao

amin'i Jesosy Kristy dia Ekentsika ny hanaraka ireto fanekena manaraka ireto.

- 1- **FANEKENA MOMBAN'NY FANAMBARANA:** Manome toky aho ny hanaiky anao. Mety misy hevitrao na fihetsikao tsy ekeko fa hiezaka aho ny hanao izay vitako mba hilazana ny fitiavan'Andriamanitra . Mila anao aho; mifampila isika.
- 2- **FANEKENA MOMBAN'NY FANOLORAN-TENA:** Ny fananako fotoana, hery, fahalalana, dia samy azonao ampiasaina raha mila izany ianao. Manaiky koa aho ny hihaona foana amin'ity tarika ity.
- 3- **FANEKENA MOMBAN'NY VAVAKA:** Mampanantena aho fa hivavaka foana hoan'ny mambran'ny tarika
- 4- **FANEKENA MOMBAN'NY FAHATOKIANA:** Manaiky aho ny hiezaka mba ho olona misokatra sy mahatoky, hizara arak'izay tratra ny hevitra marina, ny fihetseham-poko, ny tolona, fifaliana, ny zavatra nahatohina.
- 5- **FANEKENA MOMBAN'NY FANDRAISAN'ANDRAIKITRA:** Mianiana aho ny hanaiky sy hanome toro-hevitra, raha ilaina, eo amin'ny fitomboan'ny tarika na ny mambra tsirairay, ary mahafantatra fa " hanaraka ny marina amin'ny fitiavana ka hitombo amin'ny zavatra rehetra ho amin'Izay Loha, dia Kristy (Efesiana 4:15). Manaiky koa aho fa amin'ny mahatarika dia manan'andraikitra eo amin'ny mambran'ny fiangonana aho eo amin'izay atao sy ny zavatra tsy vita.
- 6- **FANEKENA MOMBAN'NY HATSARAM-PANAHY:** Satria tiako ianao hahalala sy hahazo tsara ahy dia vonona aho ny ho tsara fanahy amina sy hihevitra izay ilainao arak'izay azoko atao. Te-hihaino anao aho, hijery ny fomba fijerinao sy hahazo ny fihetseham-ponao.
- 7- **FANEKENA MOMBAN'NY FIAHAZONANA TSIAMBARATELO:** Manome toky aho fa tsy hanaparitaka izay tsiambaratelo tato anaty tarika ho any ivelany. Mianiana aho fa tsy hangataka anao hizara ny momba tsiambaratelon'ny fiainanao.

Amin'ny fankatoavana tanteraka ireto fanekena ireto dia apetrako amin'ity antontan-taratasy ity ny anarako ho fanekena ny fanoloran-tenako ho an'Andriamanitra sy ny mambran'ity tarika ity. Hotehiriziko ity taratasy ity ho fampahatsiahivana hoan'ity fanekena an-tsitraro ity atomboko amin'ity daty ity izany

Sonia

Daty

(Hoan'ny fanoloran-tenanao manokana ny soniana; tazoninao ity taratasy ity.)

BOKY NANOVOZAN-KEVITRA

Barna, George. Turn Around Churches. U.S.A.: Regal Books: A Division of Gospel Light, Ventura, California.

Beckham, William A. The Second Reformation: Reshaping the Church for the 21st Century. U.S.A.: Touch Publications, P. O. Box 19888, Houston, TX 77224, 1995.

Bilezikian, Gilbert. Community 101: Reclaiming the Local Church as Community of Oneness. U.S.A.: Zondervan Publishing House, Grand Rapids, Michigan., 49530,1997.

Brierley, Peter. 'Christian' England: What the English Church Census Reveals. London: MARC Europe, Vision Building, 4 Footscray Road, Eltham, London SE9 2TZ, 1991.

Burrill, Russell. Radical Disciples for Revolutionary Churches. U.S.A. Hart Research Centre, Fallbrook, California, 1996

Burrill, Russell. Revolution in the Churches: Unleashing the Awesome Power of Lay Ministry. U.S.A.: Hart Research Centre, Fallbrook, California, 1993

Burrill, Russell. The Revolutionized Church of the 21st Century: The Explosive Power of a

Church Built on Relationships. U.S.A.: Hart Research Centre, Fallbrook, California, 1997.

Carey, George. Planting New Churches: Great Britain: Eagle, Williams Building,
Woodbridge Meadows, Guildford, Surrey GU1 1BH

Coleman, Lyman. Bible Studies for Small Groups. London: Scripture Union, 130 City
Road, London EC1V 2NJ

Cousing, Don & Poling, Judson. Leader's Guide 1 (Walking with God Series). U.S.A.:
Zondervan Publishing House, Grand Rapids, Michigan 49530

Cotterell, Peter. Small Groups, Big Results: All About House Groups. Kingsway Publications
Ltd, Lottbridge Drove, Eastbourne, E. Sussex BN23 6NT

Davis, Deena. Discipleship Journal's 101 Best Small-Group Ideas. Navpress Publishing
Group: P. O. Box 35001, Colorado Springs, Colorado 80935, U.S.A.

Donahue, Bill. The Willow Creek Guide to Leading Life-Changing Small Groups. U.S.A.:
Zondervan Publishing House, Grand Rapids, Michigan.

Dossman, Craig A. From House to House: A New Testament Model for Church Growth.
U.S.A.: Sr. Baby Boomer Ministries Resource Center NAD
Distribution Center, Lincoln, Nebraska 68506.

Evans, Larry R. From Cell to Celebration. U.S.A.: The
Neighborhood Home Bible
Study, 13455 SE 95th Avenue, Clackamas, OR 97015, 1989.

Finney, John. The Well Church Book: A Practical Guide to
Mission Audit. England:
Scripture Union, 130 City Road, London EC1V 2NJ, 1991.89

Galloway, Dale with Millis, Kathis. The Small Group Book: The
Practical Guide for
Nurturing Christians and Building Churches. U.S.A.: Fleming
H. Revell, A
Division of Baker Book House CO. Grand Rapids, Michigan
49516.

George, Carl F. Prepare Your Church for the Future. U.S.A.
Fleming H. Revell, A
Division of Baker Book House CO., Grand Rapids, Michigan
49516.

George, Carl F. with Warren Bird. The Coming Church Revolution:
Empowering
Leaders for the Future. Fleming H.Revell, A Division of
Baker Book House,
Grand Rapids, Michigan 49516, U.S.A.

George, Carl F. with Warren Bird. Nine Keys to Effective Small
Group Leadership:
How lay leaders can establish dynamic and healthy cells,
classes, or teams.
U.S.A.: Kingdom Publishing, Lambs Creek Road, P.O. Box
486, Mansfield, PA16933.

Geok, Ong Swee. Cell Leader Intern Guidebook: The Critical Path
for Successful

Leadership. Touch Publications, Inc., P.O. Box 19888,
Houston, Texas, 77224-9888, U.S.A.

Gibbs, Eddie. Ten Growing Churches: MARC Europe, 146 Queen
Victoria Street, London
EC4V 4BX

Hamlin, Judy Dr. Welcome to Your First Small Group!
U.S.A.:Victor Books/SP Publications, Inc..

Hybels, Bill. InterActions Small Group Series. AUTHENTICITY:
Being Honest with God
and Others. (Six Sessions). U.S.A.: Zondervan Publishing
House, Grand Rapids,
Michigan, 49530.

Johnson, Kurt W. Small Group Evangelism Guide: For Successful
Nurture and Outreach
Ministry. U.S.A.: The Neighborhood Home Bible Study, 13455
S.E. 97th Avenue,
Clackamas, OR 97015

Johnson, Kurt W. Small Group Outreach (A Step-by-step guide to
successful Small Group
Bible study). U.S.A.: Review and Herald Publishing
Association: Hagerstown, MD 21740.

Logan, Robert. Beyond Church Growth: Action Plans for
Developing a Dynamic Church.
U.S.A.: Fleming H. Revell, A Division of Baker Book House,
Grand Rapids,
Michigan 49516.

Logan, Robert E. and Short, Larry. Mobilising for Compassion: Moving People into

Ministry: United States of America: Fleming H. Revell, A Division of Baker Book

House CO., Grand Rapids, Michigan 49516

Lond, Jimmy Beyerlein, Ann, and others. Small Group Leaders' Handbook: The Next

Generation. U.S.A.: InterVarsity Press, Downers Grove, Illinois.

Mallison, John. Creative Ideas for Small Groups in the Christian Community. (Methods for

Prayer, Bible study, experience-centred learning and building relationships.)

England: Scripture Union: 130 City Road, London EC1V 2NJ.90

Mallison, John. The Small Group Leader. London: Scripture Union, 130 City Road,
London EC1V 2NJ

Marshal, Colin. Growth Groups: A Training Course in How to Lead Small Groups.

Australia: Matthias Media: P.O. Box 225, Kingsford NSW 2032.

Mead, Loren B. The Once and Future Church: Reinventing the Congregation for a New

Mission Frontier. U.S.A.: The Alban Institute, Inc., 4125 Nebraska Avenue, NW,

Washington, DC 20016, 1994.

Mc Bride, Neal F. How to Build A Small Groups Ministry. U.S.A.:
NavPress, P.O. Box
35001, Colorado Springs, Colorado 80935.

Neighbour, Ralph W. Jr. With Jenkins, Lorna. Where Do We Go
From Here?: A Guidebook
for the CELL GROUP CHURCH. Touch Publications, Inc., Box
19888, Houston,
TX 77224, U.S.A.

Nyquist, James F. and Kuhatschek, Jack. Leading Bible
Discussion. England: Scripture
Union: 130 City Road, London EC1V 2NJ.

Paulien, Jon. Present Truth in the Real World: The Adventist
struggle to keep and share
faith in a secular society. Canada: Pacific Press
Publishing Association, Boise,
Idaho, Oshawa, Ontario, 1993.

Roebert, Ed. Cell Leader Intern Guidebook: The Critical Path
for Successful Leadership.
U.S.A.: Touch Publication, In., P. O. Box 19888, Houston,
Texas, 77224-9888.

Schilt, W. Clarence. Dynamic Small Groups: How to Make Them
Happen. U.S.A.: Review
and Herald Publishing Association, Hagerstown, MD 21740

Shawchuck, Norman and Kotler Philip. Marketing for
Congregations: Choosing to Serve
People More Effectively. Abingdon Press, 201 Eighth Avenue
South, Nashville, TN

37203.

Strobel, Lee. Inside the Mind of Unchurched Harry & Mary.
U.S.A.: Zondervan Publishing
House, Grand Rapids, Michigan, 1993.

Snyder, Howard A. Radical Renewal: The Problem of Wineskins
Today. U.S.A.:
Touch Publications, P. O. Box 19888, Houston, TX 77224.

Wagner, C. Peter. Leading Your Church to Growth; The Secret of
Pastor/People Partnership
in Dynamic Church Growth. Cox & Wyman Ltd, Reading, Berks,
for MARC, 1988

Warren, Rick. The Purpose Driven Church: Growth Without
Compromising Your
Message and Mission. U.S.A.: Zondervan Publishing House,
Grand Rapids,
Michigan, 49530.

Williams, Dan. Starting (& Ending) A Small Group: for leaders &
group members.
U.S.A.: InterVarsity Press, Downers Grove, Illinois 60515.

Wollen, Albert J. God at Work in Small Groups. England:
Scripture Union, 130 City
Road, London EC1V 2NJ, 1985.

Mieritrereta BE, eritrereto ny TARIKA MADINIKA

Manan-danja ireo tarika madinika. Inona no zava-bita azo lazaina ho goavana indrindra hatramin'ny famoronana- ny fananganana ny fokon'ny zanak'Israely araky ny Eksodosy sy ny fananganana ny fiangonana Kristiana taorian'ny nahatongavan'i Kristy voalohany- nampiasain' Andriamanitra amin'ny fomba miavaka ny tarika madinika. Nampiasainy imbetsaka izy ireo ary ankehitriny dia mbola mampiasa azy ireny indray Izy, eo ampanomanana antsika ho amin'ny andro goavana indrindra amin'ny rehetra- ny Fiverenany fanindroany sy ny fanorenana ny fanjakany.

Ity boky tari-dàlana ity dia manazava ny maha-izy ny tarika madinika, ny asa ataony, ny fomba fiasany. Manome toro-làlana fampiasa eo amin'ny fomba hivoaran'ny asan'ny tarika madinika izay hahalalina ny fifandraisanao amin'Andriamanitra, hitomboan'ny fifandraisanao amin'ny mpino hafa sy mizara ny finoanao amin'ny fomba tsotra amin'ny olona te-hahafantatra ny zava-drehetra fivavahana Kristiana.

Manam-pinoana aho fa ity no lalana aleha. Ny boky tari-dàlana dia voasoratra tsara amin'ny endrika mahaliana, ara-panahy sy arak'asa fitoriana. Farany tsara ny votoatiny. Misy andiana boky tsara amporisihana hovakiantsika sy fitaovana tena manampy ao.

- Bertil Wiklander, Filohan'ny Diviziona Eoropeana

Boky tari-dàlana tena tsara. Manome toro-làlana tena mazava hoan'ny pastora sy ny mambran'ny fiangonana Mitandrana ny Andro Fahafito mba hifindra any amin'ny zana-piangonan'ny tarika madinika. Mampiseho ny fototra ara-Baiboly momban'ny tarika madinika izany ary manampy feo hafa amin'ny antso maika mba hanekena ny tarika madinika ho fototry ny firaisan'ny fiangonana.

- Peter Roennfeldt, Sekreteran'ny Fikambanan'ny Pastora, Diviziona Eoropeana

Iray amin'ireo fandinihana tsara indrindra momban'ny fitahiana avy amin'ny asan'ny tarika madinika izay efa hitako. Nosoratana bebe kokoa hoan'ny mambra tsotra ao amin'ny fiangonana eo an-toerana ary mino aho fa tsara izy ity.

-Martin L. Anthony, Asa ataon'ny tena manokana, Diviziona Eoropeana

Ity boky ity dia miresaka ny fiainam-piangonana izay, raha arahana, dia afaka miteraka fahamatorana ara-panahy hoan'ny Kristiana sy ny fitomboana arak'isa izay entina am-bavaka hatramin'izao. Amin'ny alalan'ny tarika madinika dia afaka mahafaoka ny mambra tsirairay am-pitiavana ny tanaan'ny fiangonana ary izy ireo dia lasa mavitrika amin'ny fanaovana mpianatra vaovao hoan'ny Tompo.

-Don McFarlane, Filoha, Misiona Angletera Atsimo

Ity boky tari-dàlana izay nosoratan'I Pastora David Cox ity dia mameno ny banga eo amin'ny paik'adintsika eo amin'ny fitoriana ny filazantsara hoan'ny taon-jato faha-iraika amby roapolo. Ny fahombiazan'ny Fanavaozana Protestanta dia nisy akony teo amin'ny mpivavaka maro sy ny rafi-pitantanan'asa midadasika. Tsara izany nefa tsy hitantsika ny tombambidin'ny fatorana ara-panahy sy ny fihetsehan'ny tarika. Niasa tamin'ny fomba mahagaga teo amin'ny andron'ny Fiangonana apostolika izy ireny ary mbola hiasa indray eo am-piandrasantsika ny Pentekosta faharoa.

- Cecil R. Perry, Filoha, Misiona Angletera

FISAORANA

Tsy tompon'andraikitra tanteraka tamin'ity boky tari-dàlana ity aho!

Eto am-panombohana dia mety tsy ho azo natambatra ity boky ity raha tsy nampiasain'ireo mambran'ny tarika madinika voalohany izay nisy ahy, rehefa niaraka tamin'ny fiangonana Advantista tany Wimbledon aho. Nataon'izy ireo ho fanandramana tsara ity

ka nihiratra ny masoko teo anatrehan'ireo asa azon'ny tarika madinika atao amin'ny hoavy.

Nanomboka tamin'izay dia nisy olon-kafa maro tao amin'ny fiangonantsika nihazona ilay hevitra tamin'ny alalan'ny fanandramana niaraka tamin'ny tarika, ny fizarana ny fanandramany sy ny faharesen-dahatra nananany. Ny vadiko Velda dia nentanin'ny Fanahy rehefa nampiasa ny fanomezam-pahasoavany avy amin'Andriamanitra ny amin'ny fahaizana mandray olona ao an-tokantrano ary nitarika vondrona maro misy ny asan'ny vehivavy amin'ny toerana maro.

Rehefa nitombo sy nivoatra ny vina ho amin'ny asan'ny tarika madinika dia mila misaotra olona efatra manokana aho: Don Mac Farlane, tamin'ny nanohanany ny Tarika madinika tany amin'ny Misiona Angletera Atsimo; ary Humphrey Walters, Aris Vontzalides ary Ellis Guthrie tamin'ny vavaka nataony sy ny fanoloran-tena mafana mba hisian'ny tarika madinika. Mankasitraka koa ny famporisihan'ny pastora maro hafa aho sy ny mpitarika ny vondrona madinika izay samy nanana izany vina izany sy mitarika ny mambra mba ho tonga zana-piangonana avy amin'ny tarika madinika.

Ny tari-dàlana tahaka izao dia boky tsy mora vakiana indrindra, noho izany dia mankasitraka an'I Laurent Grisel aho izay nanamora ny sary an'ohatra , sy an'i Wendy Goodman izay nanolotra ny talentam-pamorony teo amin'ny fanomezan'endrika ny fonon'ny boky izay mahasarika. Misaotra koa an'i Donna Bernard, ny sekreterako, izay nitahiry ny antontan-taratasy araka ny filaharany na dia teo aza ny fanovana maro natao tamin'izany.

Rehefa voalaza sy vita avokoa izany rehetra izany, na izany aza, raha mahita zavatra sarobidy amin'ny ity laharana ity ianao dia noho ilay Iray izay nanao antsika ho zanany sy nitondra antsika ho fianakaviana iray eo amin'ny toerana voalohany. Ireo tarika madinika dia fomba entin'Andriamanitra hanampiana antsika sy ny ankohonany mba hitombo.

